


黎大總統

書牘彙編



MG
K258.206



黎大總統
書牘彙編



3 1762 4664 7

序

廳遊獨立華盛頓之勳業偉哉坊仰紀功拿破命之威聲遠矣抗懷二傑騰
譽五洲非獨當代所推崇抑亦後人所景慕然而驚人奇論終嫌象譯之鮮
通經世名言轉見鴻文之罕覩其有發摛政見鞏固邦基功則旋乾而轉坤
文則經天而緯地孰爲我黃陂黎公者乎黎公性情寬厚智勇深沈其舉義
也有項籍沉舟之概其聲討也有陳琳草檄之風其弔民也有尙父揚鷹之
烈其招士也有燕昭市駿之誠故其黃鉞揮來權迎萬衆白麾指去響應四
方華夏澄清大漢之衣冠復見荆襄扼守上流之旗鼓獨當惟是無定者天
心靡常者人事舊朝腥穢既掃蕩而無遺新國規模自經營而難緩所惜抗
顏議士反同毀室之鴟漫云託體國民轉似害羣之馬挾意氣以從事害更
深於宋黨人擁土地以稱豪禍戰烈於唐藩鎮遞推遞嬗五千餘年之華胄
將奴相訐相攻卅兆方里之神州欲裂公乃鑒茲變態發爲讜言談笑定國

會大綱。一院何如。兩院慷慨論都城要點。南京不若北京。於皖事則善爲調停。於黔事則速爲解決。指陳時事。賈長沙流涕同悲。整飭官常。張江陵救時。何媿公債辦而國用舒。洋烟禁而民生裕。倡軍民分治。語必規時。釋黨派爭端。文能見道。雖野心勃勃。不少破壞。暴烈之徒。而予口曉曉。常存悱惻。纏綿之意。嗚呼。艱難於守。猶思敷對於魏徵。安不忘危。尙憶願言於馮異。矧茲超超之元箸。不同詹詹之小言。佇看萬本流傳。文字與雲霞。鬪麗定卜千秋。崇拜聲譽。偕日月爭光已。

中華民國三年三月朱瑞

序
嗚呼。隨陸不武。絳權無文。世少全才。古今同慨。孰意民國肇興。奇人掘起。允文允武。兼備其長。有如我副總統黎公其人者乎。攷黎公於近數年間。以破壞始。以建設終。當大清政不綱。民生顛頓。外患之來。日迫一日。公乃默觀天意。隱察人心。知非破壞不足以謀建設也。於是振臂一呼。萬衆響應。不及崇朝。三鎮恢復。迨夫和議既成。覺羅遜位。澄清中夏。五族一家。黎公乃離破壞時代而入建設時代矣。雖然。建設之難也。縣與縣爭。省與省爭。據財賦以自養。擁甲兵以自衛。中央之威令不行。分邦之承認未定。民國之危。幾如累卵。此猶正式國會未開時則然耳。及至國會開矣。一議長之選舉。爭之者若干日。一議案之表決。爭之者若干日。叫囂之狀。不可嚮邇。此其故何也。黨派之意見。梗於中。權利之思想。塞於內也。黎公於此。乃以愛國之熱忱。發救時之至論。不作游移之語。不爲偏激之詞。字裏行間。常有一種悱惻纏綿之意。故

稿甫脫而萬人已爭相傳誦噫其斯爲天下之至文者歟雖志在搗亂之徒未嘗不聽我藐藐然無論其能受善言與否而如黎公之上顧國計下顧民生陳於政府陳於國會陳於各都督各黨魁之前者其箬作固常留天壤也今新中國圖書局延請通才廣爲搜集成此書牘彙編以公於世我五大民族中有崇拜黎副總統者乎請以此作政書讀也可即以此作歷史讀也可


中華民國三年三月休甯汪瑩序於武林

例言

- 一 黎副總統自起義後兼領鄂督老成持重砥柱中流每遇大事發生以至誠惻怛之言向雙方排解故其經世文章多爲世人所樂誦特輯是編以公諸世
- 一 是書成於民國三年三月自黎公任鄂督及受任正式副總統以至入京之日止各項文牘函稿靡不編入
- 一 是書雖名曰書牘而公牘批詞以及宣言書之類間入採入
- 一 本編分文辭書牘公牘批詞附錄等分爲六卷並將未及編入之函稿另刊補遺一卷他日排印時再行重訂
- 一 函牘以時事之先後爲次序茲因匆促出版不及攷註月日俟再版時訂正
- 一 本局前印行之黎公書牘係隨編隨刊遺漏甚多茲編一一補入較爲詳盡
- 一 本編雖云詳盡而仍恐有缺漏之處倘承海內政治家不棄更以黎公函稿寄示俾可補入而成完璧尤所歡迎

中華民國三年三月

編者識



黎副總統書牘彙編總目

序文

例言

卷首

文辭

卷一

函牘

卷二

函牘

卷三

函牘

卷四

黎副總統書牘彙編 總目

函牘

卷五

公牘

咨文 令文 示諭

卷六

批牘

附錄

補遺

黎副總統書牘彙編目錄

卷首

文辭類

國慶日演說辭

湖北省議會閉會演說辭

創設東亞大同社宣言

軍官學校訓詞

工程營退職訓詞

湖北女子法政學校開校訓詞

祭清隆裕皇太后文

蒞任正式副總統宣言

附政界祝詞

祭清德宗景皇帝孝定景皇后文



黎副總統書牘彙編卷首

海陽汪鈺孫編輯

文辭

國慶日演說辭

中華民國元年十月初十國慶日。爲武昌民軍起義一周年。荷蒙大總統命官致祭。參議院國務院暨各鄰省代表。各友邦領事。聯翩蒞會於武昌。以追念中華民國之所自來。我將士吏民。延頸企踵。環而觀禮者如堵牆。車書填溢。榮敦雍容。甚盛典也。元洪遭逢時會。與有榮施。自惟德薄能鮮。忝辱艱鉅。感時撫事。慟逝者之長已。慮來日之大難。榮哀交乘。喜懼洊至。有不能已於言者。天地生人。由圖騰而部落。而國家。遞演進化。無非以保全治安爲主旨。無論爲君主民主共主。爲專制立憲共和。要不外合人羣之心理。應世界之趨勢。俾國家成一健康強固之機體。以爲保全治安之方法而已。吾華開國於世界爲最早。其在上古時期。雖屬君主國體。而民貴君輕。公理早著。舉

凡遜位遷都。國疑國危。用賢刑罪。諸要政。無一不取決於國人。視聽同民。好惡同民。無共和立憲之名稱。而無一非共和立憲之元本。是以三代以前。號稱極治。秦愚黔首。始創專制。每下愈況。極於晚清。君權愈尊。官常愈替。內之則陵虐民族。苛捐濫殺。奪利攫權。外之則開釁鄰邦。敗盟喪師。失地賠款。使我華夏神明胄胤。成一至愚至貧至弱病。莫能興之國。人民土地之瀕死垂亡者。不絕如縷。僥焉有不可終日之勢。是以民氣沸騰。舉國震驚。識時志士。輿言改革。歷經燕豫皖滇桂粵等處。凡十六次舉義不就。而於去秋假手於武昌。武昌去年今日。同志將士。才數百人。非與境外有信宿之約。一介之使。乃出萬死不顧一生之計。猝然而發。大亂之端。以敵水陸六軍之衆。所幸我友邦。嚴守中立。贊助功多。雖商務阻滯。亦所弗恤。我鄰封仗義赴援。遣使約從。分兵犄角。旬月之間。全國響應。五十日而戰爭息。四月而帝制終。乃有中華民國共和立憲政體發生世界。以償我數萬義士頭顱。無量國民財產之代價。死者甘心。生者吐氣。此固前清天命允終。人心大去。我鄰封同舟風雨。利害切身。時機成熟。會逢其適。亦何敢貪天之功。然亦諸烈士之鐵血精誠。冒險犯難。爲四百萬方里國家謀尊榮。爲四萬萬人民謀福

利。不惜捐父母。棄妻子。赴湯蹈火。犧牲一世。至於折脅穿胸。肉飛骨燼。伏屍成山。流血成川。以求所謂共和民國。凡事皆可以僞爲。性命非可以假借。儒學所謂殺身成仁。舍生取義。佛氏所謂舍身救世。其堅苦卓絕。正氣大節。可以動天地而泣鬼神。國家尊而禮之。崇德報功。反本修古。不爲泰也。特是破壞告終。死者之能事畢矣。開物成務。創業垂統。則生者之責也。乃寒暑一周。國體尙未公認。內政尙未統一。法令尙未完備。黨爭日烈。舊習未除。邊衅繁生。信用未著。仍然急私利而忘公忠。違意氣而昧時勢。俾當國者不畏外侮而畏內訌。談時者謂不亡於專制而亡於共和。覘國者遂謂吾民程度不足。朽索六馬。稍縱即逝。念彼先烈。能母內疚神明。元洪方竊竊私憂。何敢言慶。但專制國之責任。朝廷少數人負之。共和國之責任。全國人民負之。以吾國靈秀之民族。尙能竭其力。盡其才。國家萬無不强盛之理。嘗考吾國與列邦革命歷史。無不經數年或十數年。惟其戰爭既久。才力既竭。殺戮既多。人民方慘目傷心。逃命之暇。舉凡舊日社會之惡劣性根習慣。早已掃除淨盡。羣思悔禍厭亂。休養生息。是以易於爲治。然其文章禮樂。或爲百年而後興。今也以數千年之專制。一躍而爲共和。人民之受害尙淺。舊

時之惡習未除。新國之美制未完。共和之真相未顯。其民心之放僻。士習之囂張。兵氣之驕悍。一年之中。國基未固。民生未寧。秩序未復。紀綱未振。風俗未導。奸宄未戢。開國之初。有此慘淡淒涼之狀。固自意計中事。誠無足怪。即謂今日社會心理。尙在新舊潮流激戰之中。未爲不然。然元洪所朝夕憂懼者。不在國弱民貧。不在人才缺乏。而在國民之無道德。無職業。無道德。則前勳庸而後罪孽。口夷惠而心盜跖。無職業。則下者流於乞丐賊盜。上者入於左道異端。必至華士聞人。詭辭詭辨。名義可以假借。法律不能範圍。以吾國人滿爲患。日與不安本分不營生計。游手滑口。冗食分利之人。與之共和。其亡直可立待。是必道德以治其心。職業以安其身。然後益之以公民之常識。曉然於國家之本位。世界之大勢。方今東西友邦。僉以維持世界和平爲要義。吾國能人人有道德。人人有職業。人人以國家爲前提。其餘各事。以次而舉。自然人民治安。國家富強。足以享有世界之和平。是則元洪所馨香禱祝。以求鑿海內喁喁之望。而慰諸烈士在天之靈者也。抑元洪更有一言爲都人士正告者。諸君楚人。當知吾楚之前事。與其現勢。吾楚本神農之墟。鬻熊之國。周召文化。宣王武烈。江漢固彬彬風雅之林。乃殷武張

其奮伐。春秋待以蠻夷。則以民風不靖。國政不修。毀譽何常。惟人自召。至於春秋戰國之間。宋魯陳蔡舒麇以南。利盡滇海。威兼吳越。楚地直半天下。要由選任賢能。修明法度。毀家如子文。循吏若叔敖。定難興國如葉公包胥。加以鬻子蚡冒。櫛機僕區之教令。篳路藍縷。以啓山林。日討國人而申儆之。告以民生在勤。禍至無日。是以荆楚民風。具有特性。周綱失御。則楚伯中原。六雄合從。則楚爲約長。暴秦專則楚漢起。新莽篡則春陵興。曹魏僭竊。則荆武合兵。先挫其鋒。元氏無道。則徐陳方明諸雄。首聲其罪。皆足與上年義師。先後輝映。而吾國吾族之名號。昭著於古今中外者。實發源於漢王封地東流朝宗之一水。揚子曰。有道後服。無道先強。張江陵曰。天下大事。每以楚人當之。此皆吾楚之光榮。然而徐陳方明。能起事而不能成功。項羽孫權。能成功而不能統一。東晉南宋。能以荆鄂爲重鎮。而不能用之爲都會。以爭中原。歷代史學地學家。或論楚地。皆虛無積聚。急疾有氣勢。或論楚人。則悍輕疾。好事寡信。此又吾楚道德職業知識能力上之缺點。方今水陸舟車。四通八達。爲全國政治軍事商務交通競爭之中心點。形勢倍蓰於前代。所望我將士吏民。力戒輕疾無常之弊。毋存自滿自大之心。易俗移風。發

舒其道德職業。恢張其知識能力。合羣同道。博厚悠久。以造成強大民國。莊嚴宏毅之國民。以爲全國之中堅。庶幾無負諸烈士之締造。民國與諸君子之寵惠。武昌也。元洪味道。懵學。罕識體要。幸賴民國之福。得與冠裳之會。蒼萃海內外之名賢。魁彥。相與樽俎。玉帛。酬酢。揖讓於其間。斯眞生平之幸福。然元洪得有今日。武昌得有今日。中華民國得有今日。皆我大總統旋乾轉坤。與各都督宣戰議和。諸志士同心戮力。暨各友邦維持調護之賜。惟祝民國千秋萬歲。年年今日。永久燕享。諸君子於斯土。俾我荆山漢水。長留寵榮。鶴樓風月。增長聲價。則尤世界大同之幸福也。諸君大雅宏達。於茲爲羣。尙希餉我嘉謨。開我茅塞。元洪謹率都人士。致而聽之。九鼎大呂。其亦不我遐棄也夫。

湖北省議會閉會演說辭

今日爲貴議會閉會之期。元洪對於諸君。有戀眷之情。有迴顧之感。貴議會開幕以來。不僅爲鄂省治亂所關。且爲天下安危所繫。圖維審慎。以至今日。諸君代表民意之責任盡。卽元洪維持現狀之負擔亦稍紓矣。鄂省爲首義之區。貴議會又爲全省民命所託。故一舉措而天下觀聽悉屬焉。趨向胥定焉。是臨時組織之議會。視正式成立之議

會爲難。而任鄂省尤難也。然則今日閉會之紀念。非吾鄂起義後第一大紀念乎。元洪對於諸君之感情。有不能默爾者。陽夏一役。民命凋殘。廬舍蕩於烽煙。脂膏淬於鋒鏑。敵欲補苴罅漏。則甲士方苦於無衣。欲張皇要圖。則司農又屈於仰屋。續臆截鶴。挹注爲艱。後海先河。疏鑿匪易。而能因勢利導。化險爲夷。以至今日者。諸君之力也。此爲對內之感情。改革甫終。建設方始。吾鄂衝通九省。輟縮中樞。故謀制度之變更。則推鄂執牛耳。策事權之統一。則以鄂着先鞭。南國之風化早開。東去則大江屈注。振裘者必挈其領。尋流者務溯其源。而能有開必先。無遠弗届。以有今日者。諸君之力也。此爲對外之感情。鄂省風氣。開通最先。自經改革。創夷最劇。更兼五方之雜處。四民之失業。故風鶴偶驚。則誚南風之不競。奸宄僭滋。則啓楚人之多謠。將欲通爾我之情。泯鷓鴣之氣。化游惰使息作。以福利爲前提。治本治標。擇術宜慎。無小無大。從公昇期。倘無法以撫綏。奚以潤夫枯朽。而能還定安集。匡直勞來。以有今日者。諸君之力也。此爲一般之感情。軍民未分以前。庶政紛呈。均資籌畫。軍民分治以後。萬端待理。尤賴扶持。維獨力之難支。仗羣材以交勵。特是經營伊始。尙未完篁路之功。責任既專。斯可取臂指之效。故

凡經諸君所協贊者。其誘導爲最多。既經諸君所抗議者。亦觀摩爲最切。其有緩急異施。剛柔異用。動靜異宜。操縱異勢。要視輿論之從違。惟取多數爲解決。而能釋回增美。合力進行。以有今日者。諸君之力也。此爲特別之感情。今者元洪於迴顧之餘。特卷戀諸君不置者。則以大厦同扶。危舟共濟。烈風雷雨。臨艱弗避者。幾人。廣土衆民。所性不存者。斯在。諸君司萬民之喉舌。爲識時之俊傑。此日之職責雖卸。將來之担負方殷。當此新舊遞嬗之交。江漢締造之始。諸君極目滄波。關心桑梓。匹夫責在天下。安石繫乎蒼生。其能忽然忘情。毅然弗顧乎。勗哉諸君。前程甚遠。來軫方適。後顧無窮。殷憂曷已。元洪自維老驥。登峻坂以懷慙。起視哀鴻。撫中原而心惻。汲長綆。短攬涕。露膺。竊願諸君匡所不逮。慎勿棄我如遺也。

創設東亞大同社宣言

元洪德薄才鮮。荆楚一武夫也。於世良愧無濟。惟持此熱心熱血。以與天下相見而已。職陸軍時。飲恨專制。竊憤瀛中集。怦然欲動。迨瑞徵督鄂。則尤悖甚。憑凌吾族。肆其野蠻。煽熾淫威。株連風影。剝膚之痛。刻不聊生。是可忍也。孰不可忍。甫經袒臂。從者疊肩。

衆志成城。瞬息光復。誠非起義初志所逆料者。深愧未遑建設。復貽漢上蹂躪。不殺無良。罪誠莫道。幸天下英雄響應。復克南京。清虜捲旗。和議始建。造成民國。得達共和。乃荷公推委。膺斯任。歸功失當。衾影多慚。回憶孫中山二十年社會鼓吹。艱困備嘗。始達此興漢目的。執熱得濯。何敢忘飲水之源。今幸我同胞。早有同心。羣興社會。以化除融洽爲宗旨。期強民富國之前途。大哉懋矣。惟願從此抱定宗旨實行。復何慮外來之侮。第恐內容遠背。則不堪設想於將來。不惟失禦外之權。將反蹈召禍之轍。內開黨禍。外啓瓜分。倒持太阿。受人以柄。滅亡之慘。曾不旋踵。迨及噬臍。將何補救。言念及此。寢饋難安。元洪不敏。竊願附驥登龍。創設東亞大同社於武昌。建設交通部於滬上。不以集衆爲急務。惟以從衆爲大經。以輔各團體之進行。以補各團體之不足。衆有義舉。首贊成之。衆有失和。首調處之。其間果能融洽。元洪不敢居功。其間設有離羣。元洪不敢辭咎。現身說法。促進共和。初非樹黨之私心。力正徇私之時弊。天人共鑒。元洪此心。惟願各會各黨同胞。曲鑒愚誠。痛除畛域。交融水乳。黨禍不興。庶中華鞏固。永無外覲之乘。民國奠安。可冀富強之日。大局幸甚。元洪幸甚。謹言。

軍官學校訓詞

當列強競爭之會。爲國防鞏固之謀。其必以軍政爲前提也。固矣。夫兵事乃儒者之至精。非可侈口率談。橫覽泰西雄國。其於陸軍一項。按籍徵召。更番退補。幾於通國皆兵。顧欲練強武之軍隊。必先有教育之軍官。日本步武西制。於軍官學校。尤爲注重。故富入校之初。稽其年齡。驗其體格。考其材能。合格者。乃得選取入校。講授有定科。修學有定期。考試有定準。俟其畢業。以之充任軍官。投之所向。皆能勝任。吾鄂前曾開辦將弁學堂一次。以後並未接續。規模雖具。造就不宏。況當國步更新。民心未固。以言對內。則甲拒乙攻。暗動明伏。羣情疑阻。概未盡孚。以言對外。則陽敦友誼。陰挾狡謀。包藏禍心。尤難叵測。吾鄂縮轂中原。創建民國。將欲圖大局之統一。杜列國之窺探。屬在軍人。責無旁貸。爾各學員。自起義以來。奔走國事。具有勤勞。用特拔入軍官學校。尤望趁有用之時光。鼓方剛之旅力。精研深造。俾底於成。將來分任各級官佐。以遞升至於軍師團旅之職務。使國威發揚。蹈厲內弭。伏莽之憂。外消。恩啓之靈。民國前途。有厚望焉。

工程營退職訓詞

自我軍同志發憤起義。一夕之間。武昌克復。遂慰我黃祖在天之靈。我軍忠勇固結。以逸待勞。以仁伐暴。士氣不餒。先聲奪人。不數月間。推倒專制。實由我工程營諸老同志。首先發難。鐵血購來。使我大漢吐氣揚眉於光天化日之下。諸同胞生長斯土。同爲黃帝子孫。立志從戎。無非漢族一分子義務。本副總統之所不能己於言者。蓋所望者。殷故所責者厚。我同胞置身軍界。當以國民自許。身可殺而志不可奪。頭可斷而氣不可餒。今漢賊已不兩立。我老同志諸君。又復潔身自退。不被匪惑。而永保此統一共和政體。不負起義之初志。萬衆一心。雖歐美各國之強盛。抑又何哉。嗟夫。金鷄業已唱曉。覺有晨熹之光。代馬旣已衝寒。實深前途之望。回憶中國多材。在昔已然。自我軍起義。各省添練新軍。今已達百餘鎮。少康以一旅興夏。楚民以三戶滅秦。聚國民之義憤。萃志士之心力。何難外禦強敵。內銷賊患。仍望我老同志。一乃心力。和衷共濟。勿水火。勿冰炭。勿邪說。勿淫蕩。我老同志。英年勃勃。縱不能遠溯淵源。須知山川土地。人民財產。皆我先聖先賢。擲幾多頭顱。拚幾許生命。保護遺留。以有今茲。將來內政完固。並駕各國。反孱弱爲自強。揭日月以重光。上以雪乃祖。乃宗數千年不振之恥。下以造若子若孫。

億萬世無疆之休。榮幸何如。我同胞其勉旃。我工程諸同胞其勉旃。

湖北女子法政學校開校訓詞

吾楚女學。開化最早。江漢被化於風。始鄧曼見稱於春秋。自是以還。流風未歇。蔚宗所謂賢妃助國君之政。哲婦隆家人之道者。以彼例此。何有加焉。然而莫爲之先。雖美不彰。莫爲之後。雖盛弗傳。乃者軍興伊始。南京有女子北伐之軍。共和告成。湖北有女子法政之設。皆希世之曠見。近今所創聞也。緬維內則所稱。中壘所錄。但言女德。不獎女學。閨帷之彥。遂以闕如。豈吾人秉彝之良。造物鍾毓之氣。獨斬於女子哉。母亦倡者寥。故應者寡。本都督則有爲女界前途正告者。法律所以濟道德之窮。禮義所以爲麗則之本。不芟其枝。則幹不昌。不清其源。則流不涸。自界說不明。危言日出。錮蔽女界之進化。阻碍女學之進行。來日大難。前車可鑒。是欲導之。而反抑之。欲啓之。而故塞之。不其愼歟。要知自由者。法律之自由也。平權者。責任之平權也。使人人皆知法律。人人皆負責任。則無古今無男女相得益彰。率履不越。皆富於道德之思想。而納於禮義之軌途矣。此之謂真自由。此之謂真平等。復何有男女之區畛。聚訟之紛紜耶。維民

國元年十一月日爲法政開校之期。實中華上下五千年來。開女子律學之始。世界文明。本無優劣。女兒心性。大是聰明。從茲詠絮才華。移來可成治譜。迴文美錦。組之卽是愛書。豈惟吾楚之休光。抑亦全球之榮譽。本都督有厚望焉。

祭清隆裕皇太后文

於懿太后。沙麗降辰。柔嘉維則。淑聖而神。思媚皇姑。式佐景帝。宮廟肅雍。晨昕容龜。書成秩。象法更張。實維太后。翼訓成綱。蜀道流離。堯城索處。實維太后。周旌營護。昊天不弔。德廟云亡。誰秉國鈞。率菅萬方。王氣宵霾。民權朝蒼。火伏昆池。塵飛滄海。滔滔江漢。南國之紀。爲民請命。陳師鞠旅。太后曰嗟。天民匪遐。風移世變。亂事如麻。古社神謀。平林鬼哭。寧非昆弟。胡相魚肉。共和一詔。萬物熙春。乃綏要眚。忒格頑民。鐘不易題。趨無輟運。楚舞成張。燕歌傳韻。太后之德。如續斯溫。太后之智。如玉斯瑩。莽莽神臬。迺核迺滌。匪直天心。豈翳人力。茹禾緬露。浴髮坏波。隆施未報。秦曜先磨。大服收華。五車弛衛。別寢雲肩。頤園天濛。蒼梧淚絕。黃竹歌哀。遺巾具在。仙履長埋。哀哀嗣皇。振振公姓。五族大同。毋渝遺命。姑繇之水。緜禹之山。靈兮歸來。陟降天關。尙饗。

蒞任正式副總統宣言

今日爲正式政府成立之期。卽爲國慶紀念之日。我大總統履任伊始。元洪承國民委託之重。備位副貳。追隨其後。實中國亘古以來未有之曠典也。諸君無遠俱邇。濟濟踰踰。額手相慶。元洪德薄能鮮。深恐弗克負荷。貽隕越羞。然以兩年來與我國民共歷險艱。怵惕惟厲。以有今日。元洪謹撮一言。維諸君擇焉。武漢起義。天下響應。不三月間。南北統一。雖漢上之遺鏃未銷。四民之創夷未復。然非國民希望之切。友邦提携之力。共推共挽。曷克臻此。此過去之觀念。與諸君所共勵者一。破壞旣終。建設方始。然四郊多伏莽之憂。贛甯兆潢池之變。暴民思逞。德步多艱。幸而天不助逆。民情效順。國軍所至。大難救平。乃以國民望治之殷。促進政府成立之始。公戴元首。遂康庶事。而元洪亦得雍容樽俎。扶助進行。此現在之觀念。與諸君所共勵者二。文明進化。首重法治。國家振興。尤賴人才。然拔茅乃得連茹。除暴所以安良。惟能鞏固中央。乃謀事權統一。元洪與諸君危舟共濟。大廈同扶。永矢初衷。贊襄偉略。每念艱難草創之業。益深虎尾春冰之懼。從此增進福祉。保障和平。此將來之觀念。與諸君共勵者三。仰更有進者。元洪與諸

君休戚相關。患難與共。今日之衣冠槃敦。前日之鐵血金戈也。今日之舞蹈歡忻。前日之呼籲奔走也。自今以後。願元洪勿以今日自矜。願諸君勿以今日自足。願大總統益展其安邦靖亂之雄才。以發揚我國權。宣揚我民意。則將來豐功盛業。卽以今日卜之也。諸君其亦贊成吾說乎。

附政界祝詞

惟我副總統。首義武昌。登高一呼。旌旗飛揚。羽書四出。薄海披猖。推倒專制。統一中央。亟謀分治。都鄙有章。乃勤上理。乃勵戎行。乃泯意見。乃鋤強梁。方冀建設。國威發皇。何意亂黨。破壞多方。兩年以來。遊謀益彰。救弊補偏。斯夕不遑。天相中國。掃盡穢槍。或則授首。或則遠戾。大亂救平。同履康莊。皆副總統。弭禍難。牆乃者選舉。惟邦之良。公以次選。備貳贊襄。調和猜忌。鞏我金湯。不矜不伐。無怠無荒。德高望重。言表行坊。天之所與。民之所望。今當就職。共敬一觴。祝公萬歲。日月同光。謹祝。

祭清德宗景皇帝孝定景皇后文

中華民國二年十二月十三日。副總統黎元洪。謹遣代表黃祖徽。致祭於大清德宗景皇帝。孝定景皇后之靈曰。穆穆景皇。英明仁惠。比宋神宗。亟亟求治。雄圖未奮。孝思靡

窮。景后翼之。載厚含宏。天不假年。薰絃中輟。遺詔既頒。四海悲咽。時領一軍。泣拊烏號。幸仰靈暉。如月在霄。執政不綱。羣竊威柄。屯膏府怨。莫達天聽。鬻拳兵諫。匪發難端。后順輿情。亘古所難。哀痛天書。登民衽席。黃屋非私。蒼生是惜。女中堯舜。遠邁宣仁。修和有夏。萬禩恒春。鳳飛忽杳。劍化相從。巍巍厚德。貪報弗終。風雲慘淡。松柏淒涼。日暝月沈。冥冥夜堂。誓挈山河。勿傷坏土。聖靈其鑒。哀情終古。

黎副總統書牘彙編目錄

卷一

函牘

致各省通告就任臨時副總統

致各省通告聯任臨時副總統

致袁總統論兩院制 附袁總統覆電

致孫袁兩總統改任軍務司長

覆伍秩庸溫宗堯汪兆銘三君

致孫總統論除意見

致袁總統及各省論建都地點

致孫總統及各部總長請速組織政府

致各省各團體痛陳時局

致袁總統請改任山東都督

致袁總統及各團體解決皖事

致安慶孫都督及各團體撤回軍艦

致袁總統黃留守維持皖事

致袁總統皖都督及各省撤回安慶軍隊

附孫都督覆電表明誤會

致袁總統各部總長勸規政府諸公

致袁總統及各省痛陳時弊

致唐總理各部總長敦促臨時政府成立

附蔣尊簋痛陳時局電

附蔣雁行痛陳時局電

致各報館論軍民分權

覆袁總統論軍民分權

覆袁總統就任參謀總長

致中央及各省請速頒定官制

附吉林陳都督電

致中央及各省消除私念

致參議院力崇節儉

致參議院爲漢治萍與日人合股事

致各報贊成取消軍界統一會

覆共和黨

覆共和黨就理事長

覆蘇都督及政見商權會

致大總統國務院請整飭官常

黎副總統書牘彙編目錄 卷一

致各省論借款

附周都督通電



黎副總統書牘彙編卷一

函牘

通告各省就任臨時副總統

連接各省代表會與本省代表兩電。知中央政府舉元洪爲臨時副總統。聞命之餘。慚悚交并。元洪才識平庸。素無表見。自起義以來。全賴羣策羣力。互相維持。以武漢一隅。而收十七省益地之圖。以前後兩月。而雪三百年敷天之憤。諸君子創其苦因。而元洪收其樂果。縱諸君子謬蒙推獎。能勿慙然。現在和議未定。戰事方棘。尙望諸君子堅矢初心。共襄盛業。勿爭權利而越範圍。勿懷意見而分門戶。勿輕敵而有驕心。勿畏難而萌退志。豈惟我中國父子弟羣相託命。環球萬國。將於是觀聽隨之。元洪有厚望焉。

致各省聯任臨時副總統

效電敬悉。甚愜本懷。不意皓哥兩電傳示。復承諸父老昆弟錯愛。竟推洪蟬聯前職。殊深慚悚。竊念義軍發起之初。以訖民國完全成立。皆全國同胞共同之力。洪何人斯。敢



忝副職。祇以力辭不獲。兵事未終。權從衆志。隨諸公後耳。今南北和同。兵戈永息。項城柄國。人望攸歸。洪之才力。實難比肩。謹以臨時之局。暫從公民之命。仍望諸大君子鼎力建設。奠定民國。一俟端緒就理。仍當歸耕南畝。爲一自由之公民。如蒙時惠教言。不勝翹企之至。

致袁總統論兩院制

民國初建。百端待理。立法機關。尤屬重要。查歐美各共和國國會制度。不盡相符。多數所趨。咸爲兩院。以吾國幅員之廣。戶口之蕃。政見之棼如亂絲。國基之危若累卵。採用兩院。自不俟言。惟是默窺現情。熟審大局。問題種種。尙待磋商。一憲法從國會生。總統從憲法生。今吾國舉定總統。既在未頒憲法以前。而製造憲法之國會。尙未完全成立。且組織國會。及召集國會之權。亦無明文。爲之規定。可疑者一。又法國代議院議員。悉由人民直接選舉。元老院則由各州立法部人分舉。美國制度。大概相同。今吾國軍事甫竣。各省議會名目紛糾。人口多寡。尙無正確比例。且議局議會。新舊雜糅。資格懸雜。青藏諸邊。尙有向無議局者。根本問題。已不能劃歸一律。將來實行選舉。究竟以何爲

據可疑者二。又法國參議院。僅爲起草法律之一機關。德國參議院。則明載憲法。其權與代議院等。今吾國大總統副總統。既由參議院投票公舉。國務總理及各國務員。均須經參議院之贊同。是其資格無殊國會。已決無取消之理。然將來統一政府告成。可否即以參議院改爲上議院。尙難臆斷。可疑者三。以上三端。亟宜解決。稍不察慎。大患隨之。敬請吾公綜攬全規。妥籌辦法。迅速宣布各省。俾有遵循。庶不至議論紛生。轉滋歧異。無任禱企。

附表總統覆電

個電敬悉。兩院制爲大多數國家所採用。中國國會。自宜從同。尊論極當。承商各節。就鄙見條復如下。

(一)現舉總統副總統。係屬臨時機關。即臨時約法爲根據。制定憲法之權。屬於國會。約法第五十四條。已有明文。至召集國會爲臨時總統之權。國會組織及選舉法。則由參議院定之。約法第五十三條。亦經規定。似尙無甚窒礙。(二)將來國會如採兩院制。則鄙意上院爲地方代表議員。應由各地方議會。及行政長官分別選派。下院爲人民代表議員。應一律由人民選舉。人口比例一節。係屬選舉法問題。儘可查照近年統計。酌定員額。至蒙藏青海情形。與內地不同。可另定特別選舉法。應俟將來詳細討論。規定適宜之制。(三)現在南京參議員。係臨時過渡機關。照約法第十八條。本須另行組織。俟約法上之參議

院一經成立。則現在之參議院即當交代。至參議院與將來國會之關係。約法第二十八條亦已明定。總之此次辦法。約可分爲三期。自臨時政府組織大綱發布。至臨時約法成立爲第一期。已屬過去之事。自約法發布至憲法成立爲第二期。正係現今之事。憲法成立以後。乃爲第三期。係屬將來之事。茲第一期之事。既經結束。吾人應將第二期之事。努力辦理。以開第三期之階緒。以上界限。解剖明晰。一切歧異之點。自可消弭。愚慮所得。用敢縷陳。仍乞大教。

致孫袁兩總統改任軍務司長

鄂省自倡義以來。首當兵衝。百政草創。現在大局漸定。正欲急圖整理。以維治安。頃據軍界同人。僉謂軍務部正長孫武。不克稱職。正請速行更換前來。查孫武當起義以前。奔走呼號。尙著勞動。洎筭軍務。彌費經營。近以心力交瘁。叢蒞時虞。不願以疲敝之身。久膺軍務。迭請解職養痾。雖元洪優予慰留。未加允許。而該部長謙挹之懷。終必欲潔身引退。以避賢路。此次僉請更換。既昭各同志之公道。尤遂該部長之初心。元洪亦未便強挽。現已遵照臨時政府電諭。改部爲司。委任曾君廣大爲軍務司長。並派員請樊君增祥爲內務司長。姚君晉□爲教育司長。商賈不驚。市廛無恙。從此羣策羣力。一意

更新。郵治之基。或肇於此。至外間傳言。軍民暴動。孫武家屬被戕。實無其事。知關廛念。特此電聞。

覆伍秩庸溫宗堯汪兆銘三君

銑電悉。自議和以來。往復商榷。將近兩月。千回百折。頗費經營。如此不辭艱難。不避勞怨。以顧惜無數生命。保全無數財產。卒能和平解決。造成共和國。其德無涯。其功無量。此時大局初定。百廢待舉。仍乞大力維持。建設完全共和國。則不獨頌締造之功。即萬國亦莫不慶平和之福。元洪自慚才疏。惟冀時賜教言。以匡不逮。不勝禱盼之至。

致孫總統論除意見

項城真電。諒已入覽。此後組織中央。統一南北。及一切建設方法。在在皆重要問題。稍一失著。即足以啓內訌。而招外侮。閣下學識最精。內政外交。早深研究。當必胸有成算。解決進行。但刻下各省人心。尤必須協同一致。共襄大業。始易弭隱患而促成成功。元洪於鄂屬各軍及各部處。業經本此意通飭。期相勉勵。其他省各機關處。應請由尊處通知。以便拔除意見。各秉大公。羣趨於至當不易之辦法。毋使民國前途。稍有阻滯。實所

欣禱。區區微忱。卽希亮察施行。

致袁總統及各省論建都地點

清帝遜位。已經浹旬。組織政府。瞬不容緩。徒以首都地點。南北爭持。遷延未決。人心皇皇。危險萬狀。夫欲爲民國籌統一規久遠。則臨時政府。自應以地形險要。交通便利。能筦全國樞紐者爲適當之地點。居中馭遠。莫若武昌。有識者類能言之。第值此新陳代謝。情誼未孚。陝疆有戰雲未靖之憂。滿清有死灰復燃之慮。蒙藏諸邊。尤爲岌岌。倘非假因利乘便之勢。從容坐鎮。必不能維持秩序。控制中邊。稍一疏虞。將至人心動搖。鄰邦干涉。內憂外患。迭起叢生。言念及此。深爲焦灼。南京參議院諸公。力持建都金陵之議。原欲改弦更張。從新締造。宅心未嘗不美。然統觀大勢。默相輿情。兩害相權。必擇其輕。兩利相權。必擇其重。此中關係。屢詳各省函電中。無庸贅述。且卽舍北京而論。建業偏安。猶不若武昌之形勝。攷諸往史。利害昭然。然且以時勢所造。猶不得不力圖治安。勉求讓步。若參議院諸公。必欲膠執成見。事久變生。誠恐以一時未審之謀。貽全國無窮之禍。倘使後人追原罪首。悔將何及。諒熱心愛國者。當不出此。竊謂爲暫時權宜之

計必須規定燕京。藉消隱患。將來宅中建國。仍在武昌。既足滌三百年舊染之污。亦可闢億萬世奠安之局。折衷定策。莫此爲宜。如蒙允諾。卽請從速組織臨時政府。規畫一切。一面仍開闢武漢。建築新都。洪雖不敏。願董其成。俟新會告成之日。卽爲總統移駐之時。勝朝反側。已就範圍。民國感情。亦孚一致。致治之隆。胥操左券。豈惟我北方父老羣相仰望。當亦我南中諸公所樂爲贊成也。洪雖籍隸楚北。忝執鞭弭。爲天下先。特以事機急迫。稍縱卽逝。失此不言。禍患立見。審時立論。慨秉大公。既不敢挾權利之心。以供私圖。亦不忍存畛域之見。以貽大患。皇天后土。實鑒此心。臨穎盼覆。神與電馳。

致孫總統及各部總長請速組織政府

清帝退位。已近二旬。政府尙未組成。鄰邦尙未承認。羣龍無首。前途可危。徒以變象未生。偷安旦夕。頃聞京津亂黨操戈。首難雖平。餘孽未靖。禍變之來。將未有艾。外人對此。極爲激昂。某國並潛謀運兵。入規京輔。設再稽時日。險狀環生。列強耽耽。難保不自由行動。瓜分之禍。卽在目前。敢伸前請。爲諸公告。國家構立。首由政府。現雖南北和解。戰禍初甯。但新舊機關。雙方對峙。國是不一。命令無價。爾虞我詐。莫知適從。致不法之徒。

乘機思逞，呼儔嘯黨，角立爲雄，一隅糜爛，全國隨之。是謂兵亡，天災侵尋，連年饑饉，江淮以南，餓殍載道，滿漢構兵，羣省響應，鄂寧鞞鼓，陝晉烽烟，嗟我蒸民，流離失所，村落爲墟，田園不治，夫僵海角，婦乞天涯，劫火餘灰，罔知所措，不圖安撫，何以善後。是謂民亡。滿清雖暴，猶可爲國，自舉義旗，倏逾半載，迺大局已定，猶事爭持，高功懷讒，雄才畏禍，遷延不決，人人自危，滿蒙回藏，甫就羈縻，死灰尙然，臥榻久睡，稍一反側，豈復我有分裂不當，必求平均，莽莽神州，擲此孤注，是謂國亡。四海困窮，民生凋敝，帑枯於上，產匱於下，急圖統一，尙懼失時，設外患一生，兵連禍結，斬木無援，析骸不飽，黑隸紅氓，猶求弗獲，軒黃遺裔，長絕人羣，是謂種亡。凡此數端，皆由於國基未定，有以召之，而究厥原因，仍本於爭都之一念。論者執南北二京比較利害，連篇累牘，猶未探此時機，萬分危迫，舍南京不至亂，舍北京必至亡。縱金陵形勢，爲勝燕京，猶當度時審勢，量爲遷就，况利便之勢，相判天淵乎。元洪非喪心病狂，何敢危言聳聽，特以禍機已見，更無爭意，氣之時，其兄彎弓，其弟垂涕，亡日亟矣，不忍不言，伏乞力祛成見，共濟時艱，早定國都，組織政府，庶可收中央統一之效，杜外人干涉之漸，其餘問題，儘可從容解決，如蒙允

許。卽請速電北京。決定大計。無任翹盼。臨穎請命。魂靈交馳。

致各省各團體痛陳時局

前以國都未定。曾於江電披瀝詳。幸蒙嘉納。迺總統蒞職。已越浹旬。國務各員。猶未舉定。夫有政府然後有國家。有部員然後有政府。若總統擁虛號。而各部無專司。是猶五月胚胎。半齡稚齒。形體不具。其狀與無政府同。方今一髮千鈞。存亡呼吸。直追急起。尙懼失時。十日之間。已非昔比。一之爲甚。豈堪再誤。敢就目前危象。再爲諸公涕泣陳之。自東南各省首倡義兵。外人營業損失鉅萬。徒以無覺可乘。含忍未發。迺者京畿激變。延及津保。長衢夾巷。鞠爲邱墟。甲國增兵。乙國接踵。選地屯營。分日巡市。自由行動。莫敢誰何。陽爲衛商。陰爲滅國。聯軍之象。復見目前。北望燕雲。已成戎索。此對於外交。可爲痛哭者也。南北交通。自秋徂冬。倉卒募軍。率無紀律。以暴爲功。以亂爲正。以囂張爲平等。以要挾爲自由。名器爲植黨之資。主將爲護符之具。上行下倣。此仆彼傷。賞罰不明。號令不一。省自爲域。軍自爲家。凶暴所傳。如響斯應。始於導線。終於燎原。豆剖瓜分。憫不顧恤。且長江伏莽。尙梗新朝。勝國羽林。猶沿舊幟。稍失遷就。變起蕭牆。此對於

軍政可爲痛哭者二也。滿清叔世。新政繁興。財力困難。已臻極點。借債修路。遂爲讓王爾者東南軍隊。名目繁曠。江漢一隅。幾盈十萬。調查各省。亦逾曩額。餉械俱窮。公私交困。欲裁則有譁潰之慮。欲留則無應付之方。大局之危。已如曇卵。且各司建設。經緯紛繁。匪有鉅資。尤難擘畫。挖肉醫瘡。必仍借債。抵礮抵路。各不相謀。列強眈眈。蹈瑕思逞。壘斷借款。監查用途。稍一失宜。已制死命。殷鑒不遠。炯在波蘭。此對於財政可爲痛哭者三也。江淮流域。久困水災。家無饔飧。道有飢饉。中更兵燹。分析離居。迺節屆仲春。猶未安宅。滔滔江水。忽漲丈餘。蕪田不除。潰堤未復。及今不救。浩劫已深。弱者化爲遊魂。強者趨爲流寇。僵屍壘積。癘疫流行。骨肉相殘。將無噍類。此對於民政可爲痛哭者四也。四民雜處。惟士難馴。嘗平養客。唐宋策科。皆以羈縻。隱爲消納。迺軍事初興。學堂中輟。師徒數萬。鬻集城垣。餬口無資。鳴儻橫議。各區黨派。互相觝排。裂冕毀冠。潰坊圮表。洪潮澎湃。山谷爲傾。雖有賢良。亦甘蹈引。夫國無教育。則綱紀頽。士無防閑。則禮義廢。回紇雖滅。猶戴祆祠。身毒雖墟。猶傳佛教。哀我神州。曾彼弗若。誰驅秀民。流爲遊士。其行可怵。其境可憐。龜毀積中。咎歸主藏。此對於教育可爲痛哭者五也。凡此弊孽諸端。

關係存亡。彰明較著。其他險狀。尚有難覩縷數者。而扼要問題。首由於都會之紛爭。繼由於部員之各執。感情所蔽。意見所蒙。遂致將億兆生靈。擲諸孤注。言念及此。不寒而慄。夫以我同志諸公。出生入死。萬禍不辭。但爲同胞謀幸福。非爲個人營權利。光明磊落之心。早爲天人所共矚。中山先生。號召海外。垂三十年。功成身退。眇然不污。立懦廉頑。尤堪矜式。是吾黨之公。已不待元洪表曝。至義職初張。萬流仰鏡。民權主義。昭然揭日月而行。倡憲黨者。既反翊新猷。伐義軍者。亦暗輸同意。現在共和成立。南北一家。起義與加功。實行與暗助。兩面相權。孰輕孰重。此中亦驟難軒輊。竊謂破壞建設。才雖相異。用實相資。當此四面楚歌。事機危迫。國務各員。但須擇學識經驗。確有專長。無論新舊南北。皆當協力贊成。以期成立。縱萬一少數部員。全才難得。亦當統權利害。稍示通融。斷不能以一髮之微。牽動全體。一部不職。不過失司。各部未成。立召亡國。此中關係。無待解人。况彈劾之權。猶操國會。與迎送於今日。籌補救於將來。明達諸公。諒必能共體時艱。早決大計。設再遷延不決。禍變日深。一日以後。將有復求如今而不可得者。鷸蚌相持。漁人得利。彼時受滅獲之慘痛。悔昆弟之爭持。滅種已成。噬臍何及。元洪殘喘。

尙存初心未泯。審機觀變。戰戰兢兢。誠不忍大好河山。及身剖裂。心所謂險。不敢不言。昔楚莊之訓國人也。曰。禍至無日。藺廉之誠屈氏也。曰。師克在和。況在斯時。尤爲危急。近聞滿蒙諸族。猶且力持大體。選派議員。卓識公忠。同深欽佩。矧我同族。反事稽延。生何以謝遺黎。死何以對烈士。伏乞互相敦促。廣爲開導。俾民國政府。早日觀成。振領提綱。猶可爲治。功魁禍首。爭此須臾。倘得邦本奠安。主權恢復。馨香尸祝。定仰元勳。元洪雖受妄言之罪。亦可以瞑目矣。臨穎雪涕。不知所云。

致袁總統請改任山東都督

疊接煙台濟南急電。深爲駭愕。現在共和成立。胡越一家。況同隸省域。尤當共策進行。力圖補救。迺竟以各戴都督之故。藉武力爲後援。雖諸公熱忱義憤。或臨懷桑梓。或保護閭閻。未嘗不光明正大。然殺機一開。龍蛇起陸。牽一髮而動全身。合九州而鑿大錯。各省效尤。列強乘釁。雖有聖智。亦無所施設。大陸神州。竟從此釀瓜分之禍。我山東最親愛之同胞。將何以謝天下乎。胡都督賢勞國事。奔走拘囚。海內同志。久深景仰。自武漢起義。贊助外交。東南半壁。倚爲長城。元洪飲水思源。尤深私感。乃因斯政體統一。竟

請取銷重任。歸隱故園。視富貴若浮雲。愛共和如性命。此等人格。真當鑄金事之。設諸公堅執成見。必欲強仙鶴於樊籠。役神龍於囚輦。明德爲累。令聞不彰。揆諸君子愛人之心。豈忍出此。至張都督。內清伏莽。外固邊防。其功原不可沒。然吉露窘於偏方。明月窮於檐照。牧民者。或有叢怨於上之慮。防匪者。或有變本加厲之虞。當此十手交乘。高明神惡。雖是非要可共曝。而一地究似不宜。再四思維。惟有哀懇袁大總統。將胡都督准予辭職。張都督調離東省。逕命一資望最優之人。迅速赴任。無庸由單方推舉。致啓爭端。將來憲法規定。再行遵照辦理。似於劃一政權之道。仍示服從輿論之心。度張都督視民如傷。當必不以此爲介。一面仍開導兩軍。使之悉蠲意見。共納範圍。閱牆雖凶。終爲昆弟。與長淪於異族。箠暫屈於同胞。倘再有一矢先加。恃強不服。義旗所指。咎有攸歸。洪雖鷲鈍。願隨南北諸都督之後。以征不庭。我兩軍諸將士。素持大體。值民國肇造之初。豈忍以偉烈豐功。甘爲戎首。事關危急。星火燎原。敢貢忠言。伏希鑒察。

致袁總統及各團體解決皖事

連接大通上海電稱。安慶調盧蕪分府各軍。並由南京派兵輪三艘。陸軍五營。夾攻大

通居民逃竄等情。殊堪驚駭。魯難甫終。皖警疊告。茫茫弱海。渺無津涯。悲從中來。罔知所措。天實爲之。謂之何哉。皖省自光復以來。三更節鉞。商民蕩析。十室九空。鋒鏑餘黎。未遑安宅。孫督速職。甫慶更生。而南北齟齬。相持不決。兩方軍民。各阿其主。飛章夕播。露檄朝傳。黑白混淆。玄黃慘變。禍機猝發。遽爾興戎。夫以孫黎二公。義旗颯舉。轉定燕通。坐安廬穎。左提右挈。相得益彰。偉烈豐功。彪炳寰宇。同心救國。有何猜嫌。且派員協商。具有前議。加以紳民之代表。重以總統之委員。更不難樽俎之間。立斬修輯。若風波起於俄頃。震電發於崇朝。武力相陵。惡聲必反。當此政府初成。干鈞一髮。外未信於鄰邦。內未孚於宗黨。殺機一起。兵禍相尋。設使神州陸沈。遺民羽化。覆邦殞祀。竟在目前。誰爲厲階。而至於此。得毋與二公初心相背謬乎。元洪生長滿朝。參觀髮史。未嘗不太息痛哭於楊章也。竊謂民國始萌。天步方蹶。端賴豪俊。共濟艱難。皖省之危。已如曩卵。雖是非曲直。各執一詞。然丁茲急難之秋。斷無鬩牆之暇。縱謂假武裝爲鎮攝。藉兵力爲撫綏。誠恐鶴唳風聲。蛇形弓影。一隅潰裂。五族隨之。玉石俱焚。彼時又何以自解。伏乞孫黎二公。與黃公統籌全局。維持現狀。其所調水陸各軍。實則收回成命。虛則靖息。

浮言。協力和衷。以待政府之解決。一面仍懇袁大總統迅速籌商。無任決裂。尤爲厚幸。外患內訌。神號鬼泣。凡百君子。各淑爾身。元洪髀肉已生。復何多望。但得諸公俯鑒哀忱。共成大業。則受賜多多矣。臨穎請命。無任神馳。

致安慶孫都督及各團體撤回軍艦

元洪於黎宗嶽素未謀面。去年曾通電聲明。此次支虞兩電。徒以皖事危急。風聲鶴唳。草木皆兵。無論孰勝孰負。而大局已不堪設想。敝省近在比鄰。應盡纓冠往救之誼。訪聞安慶大通一帶。商輪不許下客。用派張辜徐三君。乘楚謙兵艦前往調和。並嚴令不許開炮。該輪現泊皖江。可覆接也。幸黎宗嶽悔禍。倉皇遠遁。賴孫都督及柏軍長。迅予維持。不至牽動全局。下風逃聽。驚喜欲狂。當飛電楚謙兵輪。火速撤回。張辜徐三君。何至延不奉命。總之元洪秉心救世。但知以國家爲前提。此外概所不計。知我罪我。固無庸自爲表暴也。皖事既靖。張辜徐三君。仍須恪遵前令。迅速拔回。如必仍至大通。卽是無端干涉。敝省斷不認爲委員。特此奉聞。伏希均察。

致袁總統黃留守維持皖事

大總統元電悉。元洪爲大通問題。曾於支處兩電。披瀝直陳。冀圖和解。原以當時羽檄交播。風鶴皆兵。殺機一開。姑無論勝敗是非。而地方已不堪設想。敝省近在比鄰。應盡纓冠往救之誼。訪聞皖江告警。商輪不許下客。派張辜徐三君。乘楚謙兵艦前往調和。不載一兵。不運一彈。並嚴令該艦管帶。不許開砲。妨礙大局。頗費苦心。該艦現在歸途。可覆按也。幸黎宗嶽悔禍。率徒遠遁。孫都督及柏軍長。竭力維持。解決之速。不至牽動全局。下風迷聽。驚喜欲狂。當於蒸日急電楚謙兵艦。無庸下駛。翌日復電催張辜徐三君。迅速回鄂。如果無端干涉。敝省斷不認爲委員。此電均由孫都督轉交。元洪天良未泯。何至尤人自效。總之元洪愛民憂世。但知以國家爲前提。此外概所不言。恩怨當付諸萬人。毀譽當俟諸百世。知我罪我。固無庸自爲表暴也。至黎宗嶽携款潛逃。殊屬不合。頃接張辜徐等通電。黎宗嶽尙在九江。應請大總統迅委妥員。督同到通清理。如果掩逃侵蝕。自應照章辦理。以彰大公。倘交代有著。將來或念其前勞。別予位置。大總統無偏無黨。自有權衡。元洪未敢干預。惟據稱黎宗嶽隨行千五百人。從軍最久。歸里無資。揆諸弭亂酬庸。似均在大總統矜憐之例。究應如何安置。并候鈞裁。元洪性戀詞激。

越職言事。開罪良多。然天職所在。終不敢寒蟬仗馬。貽罵後人。但使諸公因恨生奮。因奮生公。俾遺民更甦。危局重安。元洪得解甲歸田。踵門請罪。含笑入地。誠所甘心。每三復史編。輒想廉藺。去人不遠。敢告始末。伏希鑒納。

致袁總統皖都督及各省撤回安慶軍隊

支電諒達。聞南京所派水陸各軍。業已停進。足見黃公顧全大局。俯納芻言。元洪敢爲皖南生靈額手拜賜。惟疊接大通九江急電。並據皖南紳民報告。皖軍胡萬泰晝夜猛攻。已越三月。距通不過十里。並帶有機關鎗八支。管退砲四尊。隨行。勢甚危急。等情。聞之驚駭欲絕。國本未定。禍患方深。此何等存亡絕續之交。乃竟一意獨行。操戈同室。如黎公一身原不足惜。且果使罪狀昭彰。亦所自取。但各省自有公論。中央自有明文。何不可稍緩須臾。宣布意見。以靜待政府之解決。而乃悍然出此。自速其亡。縱不爲皖南計。獨不爲全局計乎。孫公提倡民權。闡明佛學。斷不至以權利二字。變易方針。然徵諸現象。雖最愛孫公如元洪者。又將何以爲解。伏乞孫公。將出發軍隊。火速撤回。黎公將分府名目。自行取銷。暫稱司令。其民政財政各事。宜概節歸皖督管轄。以期統一。至皖

都督一席關係全省。非合皖南北同人公議去留。不足以折人心。而維大局。仍希召集代表。擇地開議。速爲表決。中山先生。執同盟之牛耳。克強兄。維南軍之虎符。既能維持於前。必能保全於後。並乞剴切勸諭。轉危爲安。無任禱盼。不然一隅潰裂。全國淪亡。敵省近在比隣。禍機密切。方當秣馬厲兵。力圖自保。斷不忍作壁上觀也。知我罪我。付諸達人。

附孫都督覆電表明誤會

黎副總統。當時因有誤會。曾經電詢真僞。并派代表赴鄂。面陳一切。事後追悟。始知黎副總統以干涉之口。行其調和之心。愧感交集。并大通問題。解決迅速。未致驚擾商民。固由柏軍長善後有方。亦未始非副總統之誠。但有以感動也。至大通用款。其鹽厘項下。担任英德賠款。爲數甚鉅。黎宗岳前向稅務司聲明。另款存儲。有稅務司公文可據。事關交涉。如何著落。大總統外交部財政部自有權衡。統籌地處嫌疑。未便過問。惟所謂黎宗岳。隨行一千五百人。恐係傳聞失實。查黎宗岳於柏軍長未到大通以前。潛行逃走。并未攜帶軍隊。所有駐通各營。均係柏軍長設法遣散。回籍之兵。復行集合。抑或另行募借。以爲索餉。張本。應否承認。非皖省所敢置喙。總之取銷大通分府。議決於參議院。令發於陸軍部。與私人問題無涉。敵處僅守部令。毫無違越。而明實責備。似以孫黎交惡爲疑。殆非事實。本不必斤斤置辯。而公私權限。

不宜稍涉含混。故敢率陳。然於黎副總統罷兵息民之忠告。惟有加勉。以副盛意而已。皖都督孫毓筠叩印。

致袁總統各部總長勸規政府諸公

國家興亡。視乎政治。政治隆替。視乎官制。慨自東胡猾夏。宵小充廷。以媵媵爲忠誠。以模稜爲明哲。遷流所極。賢者亦無可如何。然資格繩於前。清議持於後。猶不敢昌言運動。顯事鑽營。自新政繁興。後生輩出。高車駟馬。焜耀塞途。白壁黃金。聯翩填巷。魏闥門下。兒孫爲獻媚之名。賈姓堂前。妻妾爲買歡之具。朱溫四鎮。荀彧三公。朝被布衣。暮紆金紫。宗旨游移。廉恥汨喪。惟利是鶩。焉知其他。狂潮所傾。大陸爲沒。言念及此。可爲寒心。前南中諸公。反對建都北京之議。亦以腥風久煽。狡窟難除。欲造新邦。滌瑕蕩穢。嗣奉大總統命令。更兢兢以官邪爲念。勵精圖治。薄海同欽。當此民國初基。我當軸諸公。正宜明目達聰。與民更始。我民國士夫。亦應清操自勵。勁節不阿。樹後學之楷模。作中流之砥柱。徵諸歷朝開國之規。罔不於甄別賢才。轉移習俗。覘其見端。若復假名器爲報酬。以官階爲調劑。各私其黨。各昵其親。始基旣傾。大木斯拔。將必至天心震怒。衆怨

沸騰。後患之來。何堪設想。元洪對於政府。有服從之義務。對於民國。有規勸之責任。當目危時。憂心如搗。懲前毖後。不忍不言。一官廢司。萬民環泣。凡百執事。敬而聽之。

致袁總統及各省痛陳時弊

整軍治民。分途異轍。自各省光復。軍人柄政。習爲故常。當時義職初張。戎衣未定。敵兵偪處。伏莽潛滋。非假軍威。斷難鎮攝。自時厥後。流弊叢生。略奉數端。仰塵清聽。文武兼資。古難其選。方柄圓鑿。必僨事機。夫以各省都督。其深嫺韜略。熟計民生者。豈不就熟駕輕。泛應曲當。然片甲不更。高才難繼。設或隋陸無武。絳灌無文。熒惑政策。晉亂方略。學識所蔽。左道乘之。巨奸倚爲窟巢。悍將憑爲傀儡。馴至禍機四伏。衆怨沸騰。民力竭而不知。軍心懈而罔覺。明德爲累。大局偕亡。其害一也。各司人員。端資素學。才有獨擅。業有專攻。類聚羣分。源清流泆。今使與軍界同隸一尊。用人則妄事鑽營。處事則橫加干涉。甚至把持賢路。接挽私人。以國家行政之權。爲將士酬庸之具。稅關礦局。褻裳而據要津。錄事科員。解甲而談兵藝。一人迫脅。全局動搖。俊彥韜聲。士夫蹙額。其害二也。開牙擁燾。囂然自雄。號召徵募。多多益善。寓客僑民。流氓賤隸。濫名糜餉。兢逐其間。紀

律廢弛。鎗械匱乏。以彈壓則不足。以紛擾則有餘。夫當此隣交未定。國難方深。在上者
 不以爲心腹之憂。而以爲爪牙之利。洲民聚處。大禍循環。若隕深淵。罔知所屆。其害三
 也。軍隊既多。急謀支應。地方賦稅。予取予求。暴斂苛捐。威迫計誘。疲民以逞。竭澤而漁。
 羅掘既窮。乞靈外債。恣財贖武。違恤其地。甚至搜括萬家。餽粥之資。不足供一軍衣冠
 之費。森森戈戟。剗骨剗心。子子旌旗。塗膏斃血。債臺疊積。大陸淪胥。其害四也。司法獨
 立。憲國所同。入議之條。已成芻狗。所以鑰通民隱。保護法權。校冗防奸。胥歸約束。自重
 兵在握。任意執行。假軍法爲護符。視民命爲兒戲。甚至無辜士庶。遽越青鋒。未讞官員。
 橫罹黑彈。帝閣不開。閭曹難問。吞聲斂涕。莫敢誰何。茂蔭春凋。冤霜夏結。茫茫慘酷。不
 辨晦冥。其害五也。軍興以來。瘡痍滿目。農工輟業。商賈凋殘。撫死卹傷。未遑籌議。今分
 遣軍隊。駐防外縣。奉命遠來。龐然自大。勾結紳吏。蹂躪閭閻。有司不敢繩。委員不敢懇。
 堂堂高廉遠。惟強是從。搶掠則白骨埋冤。姦淫則紅顏畢命。殺氣所薄。江水爲哀。猶復粉
 飾其詞。掩人耳目。商民解體。老弱遁逃。邦本既傾。國運以盡。其害六也。仕途擁擠。餬口
 無資。懷刺塞塗。挾卒穿限。女無媒而買笑。士無介而呈身。捷足者宣驕。標門者舛望。乃

復聯絡軍人。結集會社。蘆中窮士。競逞辨鋒。稷下先生。爭談時政。隱善闡惡。則四座快心。假公濟私。則萬夫鼓掌。羽翼既盛。膽魄俱雄。軍營一呼。政界俱倒。雖有聖智。亦難維持。其害七也。軍民並轄。積厚培高。權力之罕。誰與倫匹。夫位高則啓爭。勢重則招軋。綜一省軍官。最高之級。何啻數百。綜一省政界。最優之差。何啻數千。一人更動。全局推翻。稍擁重兵。卽圖反側。縱使服從命令。遵守範圍。而遊士亂民。羣相趨附。謠言熒聽。浸語鑠金。假部命以觀兵。托民岩而伏罪。兵連禍結。更嬗爲雄。鷓蚌相爭。猿蟲共化。其害八也。兵權既重。省界斯分。畫畛區疆。各爲風氣。鄉鄰有鬪。則閉戶不前。越人彎弓。則含笑而道。甚或擴張權力。消納亂兵。以近省爲尾閭。藉鄰封爲甌脫。鄭芝周稻。楚刈吳瓜。蠻觸紛囂。靡有底止。內訌不息。外患相乘。其害九也。強藩坐縮。閩外自尊。厚集黨援。廣招朋類。上不承於總統。下不謀諸庶民。叱咤則山嶽爲崩。揮霍則江湖俱竭。稍有異議。立煽兵變。猶復封章乞骨。露表陳情。陽居謙讓之名。陰示把持之實。雖有中央政府。亦苦於張弧不弦。長鞭莫及。周代列邦。唐朝藩鎮。積重難返。可爲寒心。列強眈眈。已操成算。遷延不改。卽召瓜分。其害十也。凡此十害。皆由於軍民不分。範圍太廣。流弊所趨。雖賢

者亦有不免。而今日軍界。尤爲可危。一曰。無道德心。三軍餉糈。供自兆民。愛國衛鄉。根諸天性。迺縱欲敗度。任意橫行。子女玉帛。視同性命。譬彼輪機。稍觸卽發。淫心熾於俄頃。貪念勃於崇朝。甲仆乙輿。此呼彼應。遂至城郭蕩墳。市廛焦土。漢池九仞。祇瞻殘灰。秦獄千年。猶存怨氣。萑苻潰散。盜橫賊行。誰爲厲階。至於此極。二曰。無法律心。軍人天職。首重服從。萬夫一心。如臂使指。迺拔劍擊柱。綱紀蕩然。發令則詆排。更官則鼓噪。甚且勒索重餉。迫脅長官。士芥營規。弁髦軍法。爵祿不足縻其念。刀鋸不足懾其心。徵調拘於飛符。淘汰窮於善筭。毒風所煽。全國蔓延。瓦解土崩。亡將無日。三曰。無責任心。國民從軍。具有義務。有事則禦侮。無事則服勤。迺呼朋嘯侶。河上逍遙。酣嬉酒肉之場。徵逐笙歌之際。軍事戰術。懵然罔知。國難民艱。夷然弗恤。投戈棄甲。共傲天口。幾不知身爲何人。兵爲何事。人心已死。大命將傾。瞻望中原。不知誰主。夫以今日絕續存亡。千鈞一髮。但使有一於此。已足亡國滅種而有餘。而况險象之俱備乎。日月幾遷。河山猶昨。成功由於軍人。而致敗亦由於軍人。自我得之。自我失之。此志士所爲深哀。而強鄰所爲竊笑也。竊謂消隱患於無形。垂宏規於久遠。惟有將軍務民政劃爲二途。民政長綜

攬政綱。必須臧諸議會。命諸政府。凡現設各司局。除路航郵電鹽稅海關應劃歸政府。不立專政。司法獨立。直隸中央。其餘之政。概歸民政長管轄。以一事權。財政一司。樞節核計。綜一省收支之欸項。交會議決。而歲納其部。庶可以統一政權。維持國力。至每省定一都督。專轄軍隊。悉歸中央委任爲制。一除干預政治。擅舉軍官之弊。此外各項名目。概行取銷。實行徵兵制度。以便訓練。劃分區域。招選土著。除長官外。均不許客兵攙雜。及年則入伍。滿限則歸農。則全國皆兵之制。可推行也。統籌國防計畫。以利指揮。更開學校。編定教科。俾目的有共趨。眼光有專注。一朝有警。執挺撻兵。則同仇敵愾之心。可預致也。夫千金之裘。必振其領。百尺之綱。必挈其綱。果能分事程功。和衷共濟。爲國家保秩序。爲人民樹楷模。民國之基。未有不鞏。諸萬世者。在昔東瀛不變。首撤強藩。北美崛起。先聯各省。軍民分權。有條不紊。古今中外。理有同符。明知積習已成之時。改絃更張。必滋異議。然千夫交指。不虞帝制之自爲。七聖俱迷。當懼天心之難障。必欲偷安旦夕。稱快一時。東帝西王。上行下倣。人道滅絕。國法淪亡。莽莽神州。不亡於滿廷之親貴。而亡於民國之英雄。不亡於專制之淫威。而亡於共和之初政。試問諸公。數十年來。

慘澹經營。呼號提倡改革之謂何。得毋變本加厲。與初心相刺謬乎。元洪夙隸戎行。禾嫻民事。倉卒之間。謬蒙推戴。舉鼎覆餗。擿堦索塗。蒞職以來。時虞隕越。頃復憂勞交瘁。精力日枯。每念及鄂中父老。顛連困苦。良用惻然。推原罪首。萬死難辭。何敢久以輕材。妄膺疆寄。何況口江月冷。粵海風悽。六詔擊聲。五溪兵氣。槍烟霏於蘇渚。彈雨濺於蕪城。蜀道則骨肉流離。隴水則肝腸斷絕。近更彗州辨屈。徽府呼援。錦繡河山。竟無淨土。如豆自煎。如瓜自剖。爭權攘利。同授外人。哀我子孫。淪爲奴僕。萬劫不復。職是之由。言既有所不敢。默復有所不忍。日坐針氈。淚痕滿面。椎心泣血。若鯁在喉。中夜旁皇。戰衣俱濕。誠恐失此不言。將更無偷生之望。不得不痛陳時弊。妄瀆鈞聽。如蒙俯賜贊成。即請將此議交院。立予表決。一致進行。元洪不才。當先率鄂中軍界。爲天下倡。微特朽索奔駒。自輕負擔。亦且孤舟駭浪。獲慶安瀾。異日皇輿鞏固。漢族長存。飲水思源。胥由公賜。生死問題。爭此一著。臨風禱祝。泣不成聲。瞻望旌麾。伏希電覆。

致唐總理各部總長敦促臨時政府成立

元洪爲組織政府。淚竭聲嘶。南北告哀。函電盈寸。迺言者諄諄。聽者藐藐。一誤再誤。遷

延至今。明令已頒。征疆未發。禍機四伏。誰實爲之。而令志士蹈於山林。嫠女憂於機杼。以言外患。則京津一帶。偏布外兵。合約簽名。分圖繪色。近復多方煽惑。飛短流長。謀間我軍心。淆亂我輿論。漁人收利。顧盼自雄。莽莽平原。將無葬土。以言內亂。則烟騰粵巔。火熾蘇台。貴溪有壓陣之雲。秦隴有迷塗之霧。加以權利相競。意氣相爭。魯難甫平。溥憂未弭。皖江南北。已成戰場。鬼哭明陵。神謀曹社。茫茫浩劫。靡有子遺。雖稍具熱忱者。猶當於一息尙存之時。力圖統一。而克克諸公。乃或猜心藏忌。苦志鳴高。瓦解棋分。夷然弗恤。哀我生之不造。痛大命之將傾。瞻仰昊天。曷其有極。夫共和宣布。南北一家。雖稍抱野心。斷不容於千夫交指之世。我當軸諸公。正宜瀝膽披肝。和衷共濟。縱萬一所。如不合。權見相乘。亦可藉議會爲中堅。持人民爲後盾。福民利國。有何猜虞。若必躑躅鍾山。徜徉瀝濱。甚或虛張聲勢。隨扈重兵。空谷嘯而狼乘。暗室驚而鬼至。微論北方誤會。暨起冠裳。亦恐宗黨連興。變生肘腋。稍一疎虞。豈堪設想。此猜心之足以亡國也。國本未定。民心動搖。扶顛持危。匹夫有責。昔仲尼去魯。猶望龜山。靈均懷楚。竟投湘水。諸公遠徵古訓。近察時艱。蓋識公忠。豈忍膜視。縱使材力絀薄。自懼弗勝。亦當遣大投鞮。

勅期成立徐圖引退。未爲失時。以全局之存亡。較個人之榮辱。孰輕孰重。無待解人。若必假田園以藏拙。託泉石以鳴高。時日久稽。禍變日亟。國家淪喪。身亦殉之。豈有首陽爲公淨土。此退志之足以辱身也。竊謂一髮千鈞。事機危迫。羣策羣力。尙難圖存。若一部缺席。則國務之職。旣不成立。連帶之責。亦莫由免。險象環生。莫可究詰。而况各部之俱處困難。諸公如必以滅種爲樂觀。以他邦爲堪事。則元洪惟垂手待斃。夫復何言。若肯愛憐昆弟。顧念子孫。振已死之人心。扶初生之國脉。卽請查照前電。在京總長。先行籌辦。在南總長。輕騎減從。迅速啓行。如其冒昧直前。致遭危險。請罪元洪。以謝諸公。如其擁兵自衛。致啓禍端。亦當罪諸公。以謝天下。倘五日以外。猶事稽延。則是諸公甘棄我國也。嗚呼。禹甸。載我萬民。斷不能隨數人之身。載胥及溺。惟有懇袁大總統。先行派員署理。以圖補救。情迫氣哽。口盡於斯。翹首江雲。鵠俟電覆。

附蔣尊簋痛陳時局電

奉黎副總統佳電。不忍卒讀。大局安危。千鈞一髮。羣策羣力。或可挽回。竊以不才。謬承公舉。接事三月。自輪叢脞。凡所設施。動輒得咎。固不能強我以就人。復何忍以負浙者負國。然一經整理。徒託空言。未能見

諸行事。惟日夜企禱中央政府早日組成。庶可弭各界之紛爭。謀全國之統一。乃遷延日久。險象環生。吾民何辜。行將不國。言念及此。不覺涕零。自惟資淺。惟切杞憂。箝默至今。此心如瘵。幸我大總統苦心維持。副總統竭誠勸告。苟有人心。寧不感奮。抑筮更有陳者。現在各省都督軍政民事。集於一身。西北皆委任於中央。東南則悉由公舉。雖屬暫行之制。究妨統一之權。倘自問無扶顛持危之才。即應知推賢讓能之義。若不自度量。徒事把持。甚或懷疑藏忌。坐視紛裂。更何顏以對全國父老。筮擬俟政府成立。即行陳辭。以避賢路。其他如地丁錢漕鹽課等項。皆屬全國收入大宗。或議減免。或驟更張。錯雜紛紜。莫可究詰。財政紊亂。國本動搖。殊非共和民國之幸福。應請大總統分飭提案。付議公決。頒令通行。以維命脈。臨頌不勝迫切待命之至。

附蔣雁行痛陳時局電

竊維互爭意見。自賊之媒。攘奪利權。君子不齒。今南北政府已經成立。而統一政策。尙待實行。主體猶虛。強隣環伺。如魚肉之登刀俎。劣馬之蹶懸崖。吾國之危險。未有甚於此時者也。當局諸公。即合羣力以謀之。猶恐大局難支。顛仆不起。况各省變端迭出。內訌紛乘。蘇州警信迭傳。秦地戰雲未已。黔蜀之爭方止。大通之閩旋開。以皖省論。一省中內訌如此。他省可知。以各省論。表面上現象如此。內容可知。蒼生何辜。受茲塗炭。民國何戾。遭此災屯。坐令禍端起於蕭牆。大患生于眉睫。四分五裂。瓦解土崩。推原由來。誰執其咎。以前民軍起義。外人所以不行干涉者。蓋因遵守公法。善視民軍。存一時持重之心。衡兩大相等之

勢今則南北雖成統一。然兵燹之事。日有所聞。暗潮之生。無時或已。苟於此一月間。而地方秩序未見安甯。政府機關尙難完備。則外人必將謂我民。既已無維護治安之能力。而藉口於自保之說。實行其干涉之端。亦縣神州。流爲商埠。全國同胞。降爲奴隸。諸公忍見之乎。讀黎副總統南北告哀之電。而不痛哭流涕者。必非救時愛國之儔也。抑雁行尙有進者。表面之紛爭。猶易爲力。如軍隊各存意見。各省自爲風氣。尙可披心瀝膽。共申勸告之忱。推誠布公。徐收統一之效。惟今日之事。內容之紛競。有什百千倍於表面之現象者。言語則針鋒相對。如存駁詰之懷。辦事則旗鼓相當。罔顧爭持之烈。假自由以行其罪惡。藉共和以遂其私圖。衆論喧譁。羣言龐雜。欲保種而適以禍種。欲救亡而適以速亡。外人尙未有滅國之行。中國轉自現割裂之象。國不亡而我自亡之。列強不瓜分而我自分之。慘境悲觀。莫甚於是。諸公忍爲之乎。且列強雖不干預內政。而尙未承認共和。危迫之機。間不容髮。急當召集國會。編定憲法。以期列強之承認。必外交上先有完備之能力。政治上始有聯合之精神。呼吸存亡。關係最巨。爲今之計。惟有懇請大總統副總統。迅賜主持。各總長速行就職。各部之組織既完。政府之機關自備。務期調和意見。屏棄利權。爭一事而得勝利。不足爲榮。論一事而居失敗。不得謂辱。以公心爲治事之基。庶民國有富強之望。否則覆亡無日。禍在燃眉。雁行寧蹈海而死。一瞑不視。不忍見吾國之亡也。夫意氣之爭。可以爭之於干戈。已定之時。不當爭之於國事。未平之日。諸公明達。當以爲然。或者諸公高蹈烟霞。忘情軒冕。不願置身利藪。則跡名場。人各有志。安能相強。祇以一身之好惡。較諸大局之安危。孰重孰輕。不待智者而決。諸公獨不能

暫屈一時。矢志以扶國步之艱乎。俟將來時事稍平。重尋泉石之盟。再賦遂初之願。亦未爲晚。雁行月餘。以來。觀此時艱。慄慄危懼。欲哭無淚。欲語無文。今日敢冒萬死。直言於大總統。副總統。暨諸公之前。區區苦衷。伏希垂察。

致各報館論軍民分權

各報館鑒。侵電諒達。軍民分權。爲當今正本清源之策。優游不斷。貽患滋深。元洪椎魯。武夫。恨不能見微識遠。倉皇推戴。竟作禍魁。天下滔滔。不堪回首。往者不諫。來猶可追。鄂省民政長一席。已交臨時議會公舉。昨十六日開會。全體舉樊君增祥當選。樊君鴻才卓望。海內斗山。元洪素所欽仰。將來察吏安民。承流宣化。必能造福吾鄂。庸才得代。距離無量。伏乞大總統。迅予委任。並電催樊君。尅日起程。一俟文從到省。元洪當將民政概行交代。專管軍隊。口口偷駐。餘願猶存。經武整軍。靖訖禦侮。責任所在。九死不辭。仍希諸公時錫教言。共措危局。尤爲厚幸。臨穎引領。無任瞻依。

覆袁總統論軍民分權

魚電悉。整軍治民。分途異轍。自各省光復。軍人柄政。習爲故常。推其流弊。何可究詰。元

洪夙隸戎行。未爛民事。舉鼎覆餗。擿墮索塗。蒞職以來。時虞隕越。近復憂勞交瘁。精力日枯。何敢久以幹才。長膺疆寄。當此戎衣初定。國步方艱。固不忍存潔身引退之心。亦不願貽負乘致寇之罪。再四思維。惟有將軍務民政。劃分兩途。分事程功。庶有裨益。樊君增祥。鴻才碩學。物望所歸。以之專任民政。必能駕輕就熟。措置裕如。前以內務司長相邀。本擬俟至鄂中。再行發表。奈屢徵不起。不得不述明意見。乞助鼎言。倘蒙俯賜成全。微特元洪責任得以稍輕。且可藉湖北一省。爲天下倡。究應如何辨理。及定名之處。希卽裁奪。先復爲盼。

附表總統覆電

虞電悉。驚浪烈風。悚息津笈。莊誦一再。樊慮爲開。晚近人心。多私功利。禍患之作。此爲厲階。來電深鑒軍人柄政之弊。擬將軍務民政厘然分途。自鄂爲倡。以資表率。非行如曾閔。學如程朱。安能及此。舉國如公。登黃農而抗歐美矣。軍民分權。古今通義。建武之中。歸重刺史。乾德之季。分寄漕司。百年昇平。蓋本諸是。東瀛府縣。西歐州部。亦與軍民離而不合。方鎮行省。得失可知。詳釋名論。古今不易。我公勳德。區域罕儔。兼容並包。綽有餘裕。乃復謙挹。垂慮久遠。公爲先導。其孰敢後。高義盛懷。惟在撫亂。不敢遽許。又不忍違。當集學理經驗兩家。研究再四。外省官制。必本偉論。名稱一切。頗難適宜。就近制言。布政巡撫。追溯其源。

皆民吏也。直稱知事。又嫌小過。茲擬名為民政總監。爲全省民政之長。刻正草具官制。一俟院議通過。卽行發表。在官制未定以前。似宜仍用民政長名稱。卽希卓裁示復。以便任命。樊雲門處。現已婉電敦促。赴鄂。我公維持大局。優禮名賢。皆推卓絕。盪淘紛管。福壽斯民。一言興邦。公真不朽。世凱蒸。

覆袁總統就任參謀總長

元電悉。元洪學淺才疏。謬邀鈞命。重以謙光下逮。藻飾逾恒。籌畫周全。且感且愧。當此政府未立。時局方艱。急浪孤舟。罔知所屆。論才固不敢就。論義復不容辭。祇得承乏。勉期成立。將來大局稍定。仍希早延夙望。藉作替人。公德私恩。感且不朽。

附袁總統來電

黎副總統均鑒。參謀總長關係全國軍事計畫。環顧海內。實鮮相當人員。足孚衆望。前托張君大階。面達誠意。蒙允屈就。欣忭莫名。武昌爲長江中樞。執事負天下重望。安危所繫。未便遽離。參謀事目下但須遙顧。俟大局鞏固。再圖北來。區區苦衷。知承曲諒。交通便利。時盼教言。

致中央及各省請速頒定官制

政府雖幸告成。各國尙未承認。欲扶持危局。必先尊重國權。欲尊重國權。必先劃一官制。自東南反正。倉卒更張。沿事設官。因人建署。機關林立。譬彼亂絲。流弊所趨。更僕難

數。官無常格。人有強權。角長爭雄。莫相爲下。黨厚者旣席勢。以兼包。位卑者復抗顏而獨立。鬪羣龍於穴隙。揣寸木於岑樓。秩序蕩然。莫可究詰。一也。省無定制。署無定員。別部分曹。隨心所欲。名籍齊於熊耳。冠蓋密於牛毛。椎推盪脫。終日警營。前減後增。朝生暮滅。莽擾孔亟。慴莫懲嗟。二也。軍民樛結。府縣紛歧。因革損益。漫無標準。各阿其黨。各恤其鄉。一方則溪水分流。千里則車輪異軌。迷離撲朔。莫知適從。三也。裂土分疆。省自爲政。倭冠美履。探制各殊。夫東周列國。西德聯邦。縱風尙之不同。豈憲章之互別。網際罟廢。絃亂琴殘。魃魃前途。罔知稅駕。四也。新舊攪雜。南北乖離。非燕藩之北徙。而秣陵久設分都。等周命之維新。而涿土猶沿曩制。民情惶惑。爭議沸騰。刺史節度之議。則訟諸牘書。公推簡任之爭。則訴諸矢石。戈操共室。劍擊同舟。誰秉國成。鑄此大錯。五也。因此數端。遂生奇禍。言軍政則波瀾塵飛。大權旁落。言司法則猩喂鬼噬。上訴無門。言民事則苛稅繁興。貪吏交作。神明之宵降。爲輿臺。言度支則府海自雄。債台私築。開門揖盜。白首同歸。昊天不庸。降此大戾。哀我胞與。淪胥以鋪。諸公亦何忍視此。竊謂臨時官制。必須早日議決。頒行。俾全國有所準則。然後量才授職。爲事擇人。道一風同。源澄流

治。以此布政。何政不興。以此交鄰。何鄰不服。吾則補苴綴拾。日邁月征。度量尺寸之間。衡準錙銖之內。縱無窒礙。已嫌枝節。况禍變之來。未有極乎。或乃慮未流難挽。嚴令不行。乃以因噎廢食之心。聊爲藏策待時之計。私心耿耿。竊不謂然。夫一旦神州鐵血。協造共和。戴總統爲元首。倚國卿爲股肱。託議員爲喉舌。其喁喁望治之心。固久已敬愛無違。呼號交迫。壺漿箠食。非斬亂也。元洪雖闇。猶知軫念民隱。服從國權。况各都督。或居者望。或倡元勳。誰無弟昆。忍此終古。伏懇我大總統參議院國務院將官制案迅速頒布。并乞各省極力贊成。俟明令昭垂。元洪當率鄂中全體。首先奉行。以斬統一。駟馳過隙。去日苦多。其亡其亡。懸於眉睫。若藉諸公之靈。濟以忠貞。加以敦促。或者彼蒼猶有悔乎。臨風引領。言與淚俱。

附吉林陳都督電

頃黎副總統請速頒官制一電。痛挾時弊。宏議遠讀。謹誦往還。五中罄折。自民國成立。政府統一。惟職官現狀。南北分政。南方則倡義以來。爭相改革。同調異曲。競尙新奇。易轍同車。自爲風氣。省與省殊。府與府別。長此莽亂。政府既遷。北省則全體如故。舊習相循。州縣多行於下。各省輾轉於上。階級複雜。簡牘繁多。

近更元氣。聳張。紳牧駑。肆收代。捧檄。若嬰針芒。此許彼攻。視若傳舍。庶政墮廢。險象環生。總之南省患在官制多偏。北省患在官制沿舊。黎副總統晨鐘一擊。惡夢頓醒。環顧神州。同此危局。伏願各都督合力贊成。乞我大總統參議院國務院。迅將官制案議決頒布。昭常敬隨諸都督之後。當實力奉行。服從國權。鞏固邦本。引領翹盼。心隨電馳。

致中央及各省消除私念

武昌起義。原謀國民福利。毫無自私自利之念。參雜其間。故不匝月而全國響應。可見我國起義諸同志。無遠無近。無先無後。均同此光明正大之公心。始得有今日效果。乃不意專制政治。尙未盡除。而假共和以遂私圖之事。迭次傳聞。或假之以謀私利。或假之以報私怨。或假之以蹂躪商賈。或假之以侵損人權。種種怪狀。人道何在。是又豈起義時我同志始願之所及哉。革命軍起。革命黨消。此固有識者之言。某等敢進言曰。共和國之革命軍消。蓋以破壞易而建設難。不如此不足以收盡全國之俊傑。而共救時艱。凡此所述。皆少數不肖輩之所爲。實非我大多數同志之所預料。羅蘭夫人有言。自由自我而生。自由自我而死。言念及此。爲之寒心。若不及早補救。是武昌爲天下後

世之罪人。用特通告。務乞垂念民國之成立不易。各相監督。毋令此不肖之輩。得假公名以遂私謀。人方謂滿洲去而民國成。某等則謂滿洲去而民國建設尙屬初步也。莽莽神州。功魁禍首。言之殊深危懼。想全國同志。必不河漢此言。

致參議院力崇節儉

頃閱東西各報。載民國光復各省。夙以志士自命。念切同胞者。大半染驕奢淫佚之習。與滿清當道故態。有過之無不及等語。不勝駭異。該報所載。雖不盡實。必非無因。我國民膏血。自滿清脞削二百餘年。即無此次戰爭。亦當力崇節儉。以恢復元氣。況當干戈未已。徧地嗽鴻。即嘗膽臥薪。尙恐不能造國民之福。果如該報所云。民國前途。何堪設想。敬祈轉達大總統。速下崇節儉抑奢侈之命令。凡軍民人等。有則改之。無則加勉。以挽頹風。而免外人訕笑。民國幸甚。

致參議院爲漢冶萍與日人合股事

側聞漢冶萍公司改辦條約。內載有中日合辦字樣。鄂中人士。僉不謂然。漢冶萍。關係全國財政命脉。現以不得已之故。另改辦法。如定爲中日合辦。爲累恐非淺鮮。漢冶萍

係公司性質。不可認爲國家私物。萬不得已而聽外人入股。祇可作商人合資辦法。言明漢治萍公司。與日商合資。改立新公司。庶於國際全無關涉。若兩方均以國家代表。是直以該公司爲兩國所共立。將來各國援爲口實。邀求開辦各種實業。國家將何以對付。恐再與日人交涉。將中日合辦條例。改爲漢治萍新公司。由漢治萍公司。與日商合股組織。庶於外交前途。不致大受損失。事關國命。伏乞俯賜查奪。立予施行。

致各報贊成取消軍界統一會

按王軍長等養電。請取銷軍界統一會。老成謀國。欽佩無限。天方薦瘥。禍變環起。推波助瀾。皆由軍界。有心人追原禍始。相與歎恨於機關混雜。秩序紊淆。以致統系不明。事權不一。此雄彼長。莫知適從。軍心動搖。民視惶惑。四分五裂。自召滅亡。天下滔滔。莫敢匡救。輿言及此。良用慨然。軍界統一會之設。原以當時共和初布。政府未成。欲藉以混合猜嫌。驅策羣力。苦心碩畫。南北同欽。現在海陸軍部。既經組成。軍界統一會諸公。固已共告成功。克償夙願。及時解散。胥隸一尊。國之利也。軍之福也。元洪敢不拜賜。所有敝省前涉該會會員。謹當先行取銷。勉副嘉命。仍望建言諸公。暨我最親愛軍界同胞。

共推此服從政府之心。連類及行。以身作則。移山轉海。化險爲夷。元洪當範九州。金爲公等香花供養也。

覆共和黨

佳電悉。國家強盛。端資政黨。吾國自改革以來。民智初萌。未暇及此。賴諸公宏謀偉功。首倡宗風。春雷動而萬木青。晨雞鳴而四山白。高山振響。薄海從風。猥探虛聲。辱推宗表。學疏責重。愧懼交并。惟念理事諸公。五族耆賢。參事諸公。人倫模楷。全國人才。於斯爲盛。雖燭火之明。見羞日月。而素絲之質。願附朱藍。謹當勉竭愚忠。仰徇尊命。尙望吾黨同人。堅持宗旨。共闡政綱。合世界爲眼光。本國民爲懷抱。不爭權利。不矜意氣。不較名譽。不恤身家。瓜可摘而不解其縣。葵可焚而不待其嚮。羣策羣力。以有成也。豈惟全國之福。我黃帝在天之靈。實式憑之。望風色喜。無任瞻依。

覆共和黨就理事長

電悉。方今黨派分歧。各樹一幟。鞭促共和。毫無實効。伐僧阿好。舉國騷然。諸公策五團爲一致。進全國於大同。集益廣思。允堪模楷。元洪何德。謬蒙推舉。兼葭倚玉。且感且慚。

尙希排蕩橫流。發揮宏願。監督政府。導正國民。扶顛持危。實共賴之。元洪應爲我共和黨諸公三呼萬歲。

覆蘇都督及政見商榷會

電悉。謬蒙獎譽。愧不敢當。所囑列名發起。自當附驥。惟望隨時賜教爲幸。謹復。

致大總統國務院請整飭官常

伏惟財政困難。五方一致。元首瞑眩。厥疾弗瘳。四肢百骸。牽連痠厥。載胥及溺。束手無援。言念在茲。怒焉如擣。國民認捐。公債義券。熱忱所激。薄海同聲。鈞額題數。累鉅萬。度藏中府。實若晨星。鮑涸魚枯。江河待潤。梅津餉渴。餅畫療飢。前途茫茫。曷其有極。元洪不敏。竊謂民國新造。元氣未充。譬彼嬰孩。誕彌厥月。攜持腓字。責之乳媪。逮其成人。恩歸生我。又若沉疴甫間。頤養爲急。飲食居處。惟醫指揮。不恣情欲。責言奚至。外債一籌。既類覓乳。稽核用途。亦等醫監。空穴來風。穀飛爲蟲。尋本抉源。咎有攸歸。溯自滿清季世。廉恥道亡。政以賄成。官因人設。權苞苴之豐。齋定品秩之崇。卑玩法婪。曷言無忌。官常不飭。穢德彌彰。樹的以求。擇肥而噬。剝脂膏於慾壑。諱中飽日盈餘。叢慝文奸。

莫可究詰。腥風騰播。聞於疆鄰。革新以後。餘毒未殄。言不行願。口與心違。蕩佚檢閑。縱情揮霍。陽竊義務之名。陰攫權利之實。虛僑無當。驕侈成風。習俗移人。賢者不免。列強覬伺。癥結瞭然。要約責難。夫豈無故。鳩廠鵠室。祝代庖丁。我實不兢。于人何尤。爲今日計。無米責炊。其何能淑。信石砒毒。尙可與權。稽核定名。實非得已。請速解決。用固邦基。然後窮詰膏肓。免貽口實。痛懲貪冒。明定刑條。漢法按吏。首嚴受贓。晉世請求。分爲盜律。權彼輕重。著爲典常。敢有嘗試。刑茲無赦。所望止辟惟明。執行以信。滄革故習。勿置具文。徇庇枉縱。科同與受。齊廷烹阿。莫敢飾詐。穰直誅賈。一軍皆驚。竿立影隨。錐囊末見。汚風聿變。信用乃昭。涓滴首公。纖毫無濫。外新視聽。內植綱維。要挾之焰。不灌自熄。

致各省論借款

國用空乏。軍餉浩繁。易子析骸。朝不保夕。借債則召要挾。不借則陷滅亡。舉國皇皇。如死將至。憂時之士。欲以國民捐濟其窮。金陵倡聲。各省應響。解裘脫珥。山嶽爲薄。洪何人斯。曷敢戴恩而不知感。然默窺危局。俯念民瘼。竊爲哀悵。迫切之忱。不憚一再陳於諸公者。天禍滿季。四災薦作。暴斂橫徵。民不堪命。中樞兵禍。賞產蕩然。殘喘未蘇。危魂

將落。撫存無術。重以捐輸。下民何辜。遭此剝削。忝尸公僕。無能赧然。縱急公奉。上出自熱忱。勺土之微。何裨鉅漏。至於官司捐廉。軍人助餉。亦惟歲出。稍減微芒。此杯水車薪之類也。鳩衆抽捐。創難作鉅。募集非法。付托非人。一涉輕率。民皆解體。必欲嚴定規則。審選紳商。累黍成銖。積弓作雉。歲有幾何。滄桑已變。飢兵譁潰。卽在目前。點石破靈。量沙闖響。邦國殄瘁。咎將誰歸。此江波輟鮒之談也。近更有甚於此者。總理棄職。國本動搖。各國對待之方針。爲之一變。各地勸捐交部。書款則雲蒸霧湧。收款則斗轉星移。虛名未收。實禍已兆。而奸宄之徒。更復僞刻印章。私造劄符。指名勒索。剔垢搜巖。鷄犬皆暗。道路以目。當民國開幕之初。曷應有此疾首痛心之象。果與因取。事與願違。此豈諸公救國之初志哉。竊謂時局岌危。賢愚同哭。提倡國民捐。果能辦理得法。可以戢強鄰之大欲。可以振舉國之人心。可以樹政府之後援。可以備異日之償款。而恃此爲惟一政策。則不足以救亡。論者慮債權干涉。立蹈危機。履霜堅冰。實佩遠識。第念自軍興以來。兵隊浮囂。黨派陵轍。瓜分豆剖。刻刻可危。人爲刀俎。我爲魚肉。自侮人侮。不待今時。然武漢倡義。旣認民軍。南北共和。自敦鄰誼。雖由均勢。亦出同情。至用途之不明。我實

構禍於人何尤。當此存亡呼吸之交。正宜踴勉維持。平和磋商。羣策羣力。使就範圍。縱偶損威嚴。無傷大局。合當茹辛忍痛。委曲求全。來日方長。共圖補救。若責難者。逞憤激之談。夸言誤國。當局者。徇毀譽之見。潔身亂倫。外團解散。內禍環生。譬彼中流。莫知所屆。覆巢之下。豈有完卵。揆諸責備賢者之義。恐天下後世不能爲諸公曲解也。伏望國務院速磋商借約。力任艱難。參議院曲體時艱。共圖調護。左提右挈。迅底於成。一面仍實裁軍隊。以節用途。慎募義捐。以免耗費。俾他日借款撥入。胥納於生利之一途。救急一時。厚生百世。其南京所用比款。仍須詳報支項。昭示國人。用途果正。固所以破羣疑。用途不正。亦所以垂炯戒。標本兼治。無逾於此。元洪靜觀顯狀。憂心如焚。明知此議一興。干冒不韙。然存亡所係。終不敢斤斤自好。貽誤邦家。區區苦衷。可昭神鬼。臨穎涕泣。敢乞教言。

附周都督通電

借債與國民捐問題。全國注意。兩派爭執。各有見端。然以二者相形。其受害之遲速緩急。雖不同。若單獨行之。其爲非利則一。自齊不敵。敢就目前之勢比較言之。夫借債危險。人所共知。今之迫而出此者。非獨

款缺不得不借。亦且時迫不能緩借。使國民捐可急濟軍需。即償墊款也。自以從速廢約之說爲宜。試問
 民生凋敝如此。商業恐慌如此。東西各省。已捐不一。捐。西北各省。又捐無可捐。即普減官俸以爲倡。亦只
 是中央少出款。不得謂中央添入款。朝三暮四。補救毫無明文。飲鴆解渴。不足爲訓。譬如人之內病。蠱毒
 而外發惡瘡也。服砒石則可治。而徐圖生機。服硝黃則無功。而反速死。命今之中央。內病蠱毒也。各省外
 發惡瘡也。以國民捐視硝磺。以外債視砒石。求生求死。何去何從。自不待繁言而解矣。矧當此民信未立
 之時。上下交困。總目前軍餉計。即以公私財盡數入捐。亦難應付。況未必能得乎。故勸捐以減輕外債
 則可。恃捐以力拒借債則不可。他如不允紙幣之行。尤非法律所能強迫。西國雖屢行之。而事過追評。無
 不以爲利少害多。且吾國經濟。半在通商口岸。而商岸之經濟。又多操於外人之手。設外人不信用。僅國
 民用之。而現在財勢不能迫於經濟之公例。流於外國。及至跌價以後。而外人轉以賤價購買。則將來
 損失。何可勝言。爲今之計。誠舍借外債別無他法。查墊款合同內第五第七兩條所載。發放軍餉。遣散軍
 隊各節。有予該軍官核計員等以調查應需之便利等語。似含有監督我軍隊性質。然細釋十條中。亦尚
 有於主權可以補救之處。全在將來實行何如耳。區區之意。擬雙方並進。借外債以救急。仍一面募內債
 以爲清償之計。否則民窮財盡。羅掘已空。軍隊甚多。譁潰堪慮。萬一有變。外人藉口於恢復秩序。保護商
 務。仍必逼散軍隊。是借債與不借等。現象危險。事機急迫。若不變計。立見國亡。即以東省論。財政收入。僅



黎副總統書牘彙編 卷一

四十四

支一月。現雖裁減薪費。歸併局所。節衣縮食。徒救目前。而所謂興實業。厚民生。亦徒托空言而已。山京如此。他省可知。國民捐之能否救急。於此可見。昨見柏都督電。以借外債爲過渡。以國民及內地公債爲後盾。兩言最爲扼要。蓋與其煎膏滅火。何如添膏救明。自齊會管度支。與聞借債之事。深知此中甘苦。不敢隨聲附和。誤我民國。特痛陳利害。望諸公共諒。唐總理熊總長之苦衷。熟權緩急。相與贊成。俾鞏國基。而免干涉。全國幸甚。五族幸甚。臨穎惶悚。魯都督周自齊。



黎副總統書牘彙編目錄

卷二

函牘

致中央及各省論救時

致政府及各團體主張辦理公債

附直督論國內公債電

致袁總統論廣西遷省利害

致中央政府請以陸徵祥任總理

附譚都督通電

致各團體論政黨

致各省都督議會贊成禁烟

附國務院覆各省論禁煙電

黎副總統書牘彙編目錄 卷二

覆社會黨本部

致湘贛皖各都督維持鹽政

致各省聲明移交鹽政

致中央及各省實行軍民分治

致大總統請速定省議會法

致中央及各省論軍民分治

致盧君靖等公啓

致譚都督解決黔事

附國務院來電

致大總統參議院論時局

致大總統陸軍部薦舉馬毓寶

致中央及各省主張統一幣制

致各省請嚴禁鴉片

致閩都督請爲吳王二公建像營葬

致中央政府論籌邊

致大總統請將張振武正法 附陸軍部覆電

致各省布告張振武罪狀 (一) (二) (三)

再致各省宣布張振武罪狀并引咎自責

致中央政府及各省請主持正論

附袁總統挽留電

附湖北保安社紳耆通電

附陝西都督張鈞挽留副總統電

附鄂省教育總會通電



副 總 統 書 版

黎副總統書版彙編目錄 卷二



黎副總統書牘彙編卷二

函牘

致中央及各省論救時

民國成立。倏忽半年。一切建設。僅具模型。財政恐慌。窮于羅掘。軍需繁重。譁潰堪危。商務滯停。涸槁無濟。分利者萬出其途。生財者百不得一。熊財政總長。展轉思維。萬不獲已。始言外債。乃薄海內外。志士達人。慮遠思深。同聲拒絕。頃以國民捐倡。發自留守。未及兼旬。全國響應。政界削薪。軍人縮餉。熱忱毅力。障海迴天。每拜電文。崩角投地。如此國勢。如此人心。遙望前途。轉悲爲喜。然目前事急。善後期長。杼柚其空。弩末易見。補苴既往。垂裕將來。爇火冶金。杯水撲燎。詎能有濟。況捐事性質。譬若曇花。醴泉甘而無源。芝草仙而無根。視陰計晷。奚以續命。竊以利惟取重。害惟取輕。信石攻瘡。蝮蛇療癩。近方劑藥。標病可瘳。惟外款入手。措置失宜。未雨綢繆。首倡實業。連以全神。兼體僑商。樹爲標榜。分途飭學。遍及顛蒙。務使海澨山陬。悉明大局。勸捐募債。並蓄兼收。約以年。

鼓以精誠。累邱垤而泰山。滙沟澗而滄海。清償外債。諒亦匪艱。更有進者。則主要之政綱。與償欸之作用。同時並峙。布諸國人。如劃一錢刀。嚴重軍格。矜慎名器。蕃息生齒。推廣交通。擁護銀行。撤釐定稅。諸綱并挈。條晰理分。恃源而治。富強可致。鰥鰏慮。竊效杞人。敢竭悃忱。俟諸公判。

致政府及各團體主張辦理公債

財政困難。全國一致。建設之初。厄此漩渦。主外債者。救目前以垂畫。後來。拒外債者。憂後來而急籌。現在。政見雖殊。愛國則一。自黃留守發起國民捐後。兼旬之間。各省雲集。認捐急公。減俸好義。電函紛紛垂告。元洪每一捧讀。未嘗不五體投地。然伏查各都督偉畫。按之中國現勢。似有未可強同者。吾國各行省中。財產豐富不一。大抵東南集捐易。而西北倡捐難。自去秋光復後。各省人民捐輸財餉。類皆出自富戶。茲再勸捐。力或不逮。竊意勸捐之說。不如募債。蓋捐之名甚廣。其財產施而不返。債之權在己。且更有生息之利。蘇州程都督電開。方今人民程度一段。實屬老成謀國。詳穩周密之謨。元洪忝掌鄂政。擬從公債票著手。緣鄂中父老。曾担負去年樂捐一次。大義足感。此次湖北

國民捐。現議設立救國會辦理。面收捐款。面給債票。故湖北國民捐之名。似應易爲湖北國民公債之號。各都督經文緯武。地利民生。早在洞鑒。謹就鄂省現情。略貢愚衷。敬乞亮察。（章程略）

附直督論國內公債電

外債棘手。抗議紛亂。愛國諸君。竭力提倡國民捐。並救國公債。冀以抵制外債。接濟中央。用心良苦。然錫鑿之愚。竊以謂值此民窮財盡之時。加以款巨用迫。斷非空言所能集事。而民國存亡。間不容髮。倘一再蹉跎。深恐時機稍失。挽救愈難。將有終焉沉淪之痛。鄙人前於東電。謂捐債章程。宜歸統一。否則辦法紛歧。不獨難期成效。且恐流弊百出。貽笑外人。蓋已隱憂及此。今讀柏都督冬電。以外債爲過渡。國內公債爲後盾。寓果於因。慎終圖始。老成謀國。實獲我心。其喻借債之禍。謂飲鴆止渴。類於自戕。喻不借債之禍。謂因噎廢食。等於迷斃。尤爲洞中時局。審察入微。錫鑿建樹無能。隨爾恐後。應請大總統毅然斷施行。參議院同意表決。民國幸甚。直隸都督張錫鑿。

致袁總統論廣西遷省利害

桂因遷省首府。各團體疊電主持。至今未決。盤庚遷殷。周公營洛。因時制宜。古有明訓。現值開放時代。南甯地點適中。盤江環繞。水道四達。更擬建築滇甯鐵路。東與粵接。遷

本爲宜。獨是各屬主改。在便利交通。桂林主因。在節省經費。當改革之時。阨困窮之境。言各有理。行貴執中。請由中央派員前往。統籌桂省全局。如確係多數贊成。費款不鉅。一勞永逸。便可從速解決。謹抒管見。伏候卓裁。

致中央政府請以陸徵祥任總理

總理棄職。邦本漂搖。外患環生。內憂潛伏。總統挽留不獲。乃以陸總長攝任。電命乍頒。中外交慶。然位未卽真。名未確定。尤非扶顛持危之道也。夫以唐總理倉皇遠去。蟄伏津門。道路傳播。皆謂不返。揆諸情勢。或非無因。縱使裹輪再辦。捲土重來。國人眷其前勳。總統矜其舊好。推微諒隱。不忍瑕疵。然隣信均墮。黨攻復起。責言交乘。終非國福。此固事所必然。無容掩飾者也。議者鑒散木之椎輪。怵膠船之溺水。乃欲於國務員外。另舉總理。元洪愚戇。頗不謂然。將欲總理易人。部長仍舊。組織之責。豈能發生。勢必陽翕陰張。始凝終汎。負乘懸棧。出以因循。答難有辭。經涂無軌。潛流潰決。梓櫟同漂。其不可一。將欲畀以全體。重組內閣。摻厭遽斷。改絃更張。微論人時既異。來軫難期。且民心搖搖。鄰交未定。墮棄前緒。坐誤機宜。三政四摘。豈堪設想。其不可二。匪直此也。黨派紛歧。

並無政見。樂利日競。意氣相攻。猝更總理。又居奇貨。逐鹿中原。愈爭愈烈。躡台閣於交綏。擲國家於一博。廟未定議。兵已渡江。泡影梵花。亡諸彈指。此尤可爲傷魂慄魄者也。其不可三竊謂總理一席。必須從速確定。政有顛主。責有攸歸。方足杜私黨之鑽營。息鄰邦之謠啄。陸總長才猷穩練。識解闊通。各國既信用于前。國務員復贊同於後。舊史不書其惡。新黨不隸其門。以之主宰超然內閣。必無窒礙。如蒙贊成。卽懇大總統正式發表。俾免遷延。此外各國務員。受託國民。斷不能以私人之進退。牽動黨派。推倒全盤。除久不到差外。悉仍舊秩。仍希諸公憬念時艱。共相維持。俟臨時政府期滿後。再行組織。冀安長久。消息無形。當亦諸公所樂出此。元洪與陸總長素無交誼。祇以洞觀時變。力挽狂流。覺非有泛應曲當之具。不足以交鄰。非有卓立不阿之才。不足以應變。前車已覆。來日大難。愚昧之言。伏希裁奪。

附譚都督通電

臨時政府組織成立。未及數月。國民甫有初基。唐總理乃調和南北有功民國之人。實全國所信仰。各國所注目。授任未久。並未發生誤國殃民之問題。現在西藏蒙古。隱患方多。內地各省。秩序亦未全復。此時

政治尚在維持現狀整頓補救時代。並非秉持政綱統一進行時代。國人同心。以鞏固政府爲唯一之目的。有何黨爭之可言。且今日政黨之名初樹。各省黨派。方在萌芽。豈可輕議排擊總理。試問一總理去。他的總理來。不幸他總理又因事去。國事尚可開乎。且國務員由總理組織。總理去而各部總長勢必隨之更迭。短命內閣發生於臨時政府。發生於二十世紀。萬死一生之民國臨時政府。危險問題。豈有大於此者。唐總理既養病五日。假期滿後。應請大總統令其力疾回院視事。以成救國初志。至政黨抱持政策。實力施行。當在現狀安穩。國基畧爲鞏固。軍事稍爲救平。統一政策。漸次可以實施。此時自當消弭黨見。共衛國家。臨時政府。卽萬無輕議更迭之理。諸公熱心國事。夙所欽敬。心所謂危。不忍緘默。區區之愚。尙乞亮察。延閣叩印。

致各團體論政黨

竊維羣治進化。政黨攸關。植立綱維。誨求國是。衡途赴的。準向懸針。導機體於健全。促文明之進步。組合徵之毅力。競爭持以公心。雖曰赤幟紛張。衆言淆雜。而縱經橫緯。必竟其端。萬道千途。悉宗一軌。究其歸宿。蓋未有不以國利民福爲前提者。我國肇造。如木初生。本實動搖。枝柯脫弱。扶持呵護。勢可參天。若肆摧殘。生機立絕。端賴豪俊輩出。植國之楨。宏濟艱難。支撐危局。發摠偉抱。洞悉時機。前路漫漫。庶乎有彞。不謂名與實

異事竟心違。公益未違。私競方烈。此次黨員急進。限制無聞。涇渭同流。玉珉兼蓄。以懷挾怨毒。求逞一時。或貪圖利權。大施攻訐。所以東林賢者。同室操戈。洛蜀通儒。徒相傾軋。習俗移人。賢者不免。未流之弊。可爲寒心。用特忠告黨人。化除畛域。毋以私忿忘公誼。毋以睚眦成仇讐。毋爭名位而肆詆謔。毋恃意見而分門戶。尙望並持毅力。獨立不撓。一德同心。協謀幸福。單精政術。蔚爲偉人。扶顛救危。國基永固。庶幾令名懿德。炳耀寰區。元洪不敏。從諸君之後。亦與有榮施焉。拳拳之私。企盼垂察。

致各省都督議會贊成禁煙

頃接皖議會暨皖都督合詞艷電云。鴉片煙毒。全國痛恨。禁種禁運。非雙方並進。禁吸殊難。今禁種雖已實行。禁運尙待改約。敝省已電總統總理各部總次長。速與外人磋商改約問題。以中華民國元年爲鴉片進口終止之日。救國救民。此實急務。希諸公贊同協爭。必得達目的而後已。皖議會轉皖都督孫毓筠云云。查禁煙三種辦法。惟禁運爲最難。亦惟禁運爲最急。從前中英訂約。以逐漸減運爲辦法。商人希圖漁利。徐徐暗中多運。不顧公理。以致禁種禁吸。均未收真實效果。茲皖首公電。實爲根本解決辦法。

敝省官商均表同情。懇祈大總統國務院主持於中。各議會各都督贊同於外。磋商定議。務求達此目的。則禁種禁吸。自必事半功倍。爲民去毒。關係匪輕。希速賜覆。

附國務院覆各省論禁煙電

連日接各省來電。均以禁煙進口修改條約爲言。立意自屬正當。惟民國創造之初。聲明前清與各國訂定條約。一切作爲有效。查宣統二年四月初十日中央政府。再行商定禁煙辦法。第三條內載無論何省土藥。已經絕種。他省土藥亦禁運入。顯有確據。則印藥亦不准運入該省等語。又第四條在此條件年限內。英國政府得派一員或數員。會同中國政府所派之員。隨時就地考查滅種情形等語。是印藥之能禁進口與否。必視該省土藥之能絕種絕運與否。惟東三省山西四川等省。去年禁種業已淨盡。近聞晉蜀二省私種漸多。四出販運。若外人援第四條派員考查。必至授以口實。現在政府成立伊始。各國尚未承認修改條約。未便提議。昨經國務院會同執商。僉以禁運必先禁種。尤在禁吸。如果各該省確無吸烟之人。種烟之地。他省土藥亦無輸入。自可援據約章禁止印藥進口。望飭下各屬嚴密考查。對內無可憾。對外始有操券之效。除另電四川山西都督認真禁種外。特此電聞。

覆社會黨本部

電悉。集會自由。係法律內之自由。如宗旨正大。卽受保護。如擾亂治安。自當取締。特復。

致湘贛皖各都督維持鹽政

前承長沙都督宥電。詢及鹽務辦法。彼時國體組織。尙未大定。鄂省款絀。用宏。當以所覆張季直總理原電。先爲回復。此係一時權宜之計。現在民國告成。百凡政策。非財莫舉。鹽政爲國家歲入大宗。且關係賠款。其中情節。袁大總統江電及張總理各電。言之綦詳。敝處現以擁護中央財力。維持統一辦法爲主旨。將鄂省鹽政事宜。交由張總理仍照舊章派員接辦。貴省與敝省關係最切。當表同情。

致各省聲明移交鹽政

路礦郵電。鹽稅海關。應歸中央主持。以一事權。而專責成。各節。早經電達。今敝省准鹽督銷局事宜。已盡行移交兩淮鹽務總理張接管矣。特此奉聞。

致中央及各省實行軍民分治

鄂省軍民分治。已於七月一號實行。所有內務財政教育實業事項。元洪於昨日交代。心源卽於昨日接印視事。其司法交通外交事務。暫附民政長管轄。俟官制定後。直請中央。此外鄂省陸軍軍隊學校局廠。仍由元洪擔負。伏念元洪不才。謬荷三軍推戴之

殷兆民保託之重。忝列疆寄。竑望九更。綴拾補苴。智盡力索。天畏民鑒。昕夕徬徨。幸國民恕其愆辱。大總統矜其頹邁。解除民政。稍卸仔肩。心源猥以疏庸。謬膺任命。明知才力竭蹶。無裨時艱。惟當民國締造之始。樊山未出。代理需人。不得不勉策駑駘。暫行承乏。仍請速催樊山早日蒞任。以重專職。而免僨事。心源在職一日。卽盡心力一日。斷不敢以暫時瓜代。意存委卸。仍懇大總統時賜訓言。各省都督。共與維持。以端基礎。臨電屏息無任悚惶。(民政長劉心源會銜)

致大總統請速定省議會法

政府初成。憲令未布。地方制度。爲國家構造之基。關係尤爲重要。查各省臨時議會。本非正式選舉。或因議局機關。變更名目。或集少數人士。選舉議員。當時庶政草創。原欲旁資輿論。救弊扶偏。不得不稍示變通。急斡成立。現在大局漸定。責難遂多。組織既不完全。行動輒生窒礙。甚至審議一案。而各團肆行詆譏。公選一員。而軍隊橫加蹂躪。以同屬熱心愛國之人。遭際危時。贊襄大計。應如何左提右挈。共濟艱難。祇以議論偶乖。勃谿疊起。風潮震盪。舉國騷然。縱議會秉公立論。內省無尤。然始謀不臧。終難免貽人

口實綿綿不絕。將成網羅。長此因循。禍何能艾。論者痛莽擾之形。思調停之策。乃欲自定法規。重選議會。探原治本。實拜嘉言。然法令必斬諸統一。言論必利諸施行。設使省自爲政。人自爲謀。將來中央政府。明布憲章。閉門造車。未必能九州同軌。預章更選。則往事紛紜。仍貫自安。則顯相抵觸。啟爭構亂。更甚茲時。夫明邇而味遠。不可謂智。治偏而害全。不可謂仁。朝夕思維。彌增憂灼。伏懇我大總統。亟圖挽救。迅命內閣。安定省議會及議員選舉法。交院議決。月內頒行。俾各省議會。一律改組。庶乎衆星共緯。萬壑同流。輿論既眞。煩言自執。際此過渡時期。仍望愛國同胞。相與屏棄成心。維持現狀。縱偶有齟齬。亦必忍忿須臾。奠安大局。快意虧行。甘心傷性。民今方殆。視天夢夢。及爾昆弟。毋相猶也。倘渝此心。其何能淑。臨風請命。無任馳惶。

致中央及各省論軍民分治

軍民分治。鄂已實行。近措置已有端緒。遠懲聯邦會長之政。近鑒督撫專權之弊。官制既定。軍政民政。分職各殊。雖時地異宜。措施容有先後。而大端不可改更。夫光復之初。戰在國內。民戎事可以并治。光復以後。戰在國外。若以文吏兼統軍民兩政。身無戰術。

士卒豈聽指揮。若以軍官兼統軍民兩政。遇事出征。地方誰爲主宰。乃胡都督既有商權之條。程蔣孫譚張李柏各都督。亦陳討論之議。原諸公圖治之苦衷。無非爲保全治安。維持現狀起見。雖贊同之與抗議。不厭求詳。惟幸無可否之問題。不過時期之討論。元洪默察內外。權衡重輕。謹據管窺。更申芻議。夫歷代弊政。無過滿清。滿清弊政。無過咸同以後。皆督撫兵兼並。民政鹽司爲其奴隸。郡縣比於輿台。以至好惡任心。法紀擾亂。民國肇造。豈可不鑒前車。顧或慮事權牽掣。運掉不靈。不知中央如首領。各省如肢體。政權統一。何慮分權。各都督遠謀勝算。不拘近切。利害易明。公私易判。所願率行大法。一德同心。若夫伏莽未平。軍警難別。自可畧有寬限。次第改更。期限既滿。卽不得以他端藉口。內政隆污。胥判諸此。至於外界風雲。變幻不測。軍事運用。妙在一心。追維前清之失。旣由軍權之不清。歷觀列邦之強。實賴軍政之統一。夫以外患侵凌之急。都督擔負之重。萬一有事邊陲。張我師旅。對外之策。自急於對內。治兵之責。尤重於治民。不有居者。誰守社稷。不有行者。誰捍牧圉。惟先事之預防。乃有備而無患。諸君將爲維持現狀。目前時期有緩急。而捍禦外侮。則職權有專。元洪組織進行。心力交瘁。非敢膠

於故見實爲慮及將來區區之愚實爲先馬維諸君諒鑒。

致盧君靖等公啓

敬啓者。吾鄂軍民分治。雖已實行。而近振頹綱。遠綜絕紐。經營伊始。端委方叢。炳燭思明。頭爲之白。竊恢維宇宙。原非一木之支。宏濟艱難。端賴衆擎之舉。執可云事。每與慕僚屈指人才。羣相推舉。樽儀在目。杼軸予懷。亟思以賓禮相延。共據籌策。自維迂拙。矢以一誠。公識以用人。殫愚以理劇。推心以應物。揭斯主旨。用質諸賢。所有吾鄂一時豪俊。如某某君等。除已分函招致外。合行奉邀。務乞翩然來儀。廣所未曙。公孫弘方開東閣以待。陳伯之豈無故國之思。早賁駒車。良殷鶴踊。當風雲之變幻。作陰雨之綢繆。蓋所望於諸賢者正深也。秋風旣啓。用致箋牘。順頌時祺。不具。

致譚都督解決黔事

趙君均騰昨歸。黔事中央訖無解決。惟望湘鄂設法了結。此案爭執日久。若再遷延。禍變之生。不可思議。鄂受影響。湘尤切膚。日夜思維。莫名焦灼。洪江會議。黔代表牟琳等。以全權委任。既三方協同簽字表決。條約萬不能作爲無效。黔軍歸黔。滇軍歸滇。本至

當不易辦法。黔電多方抗爭。要不能將黔軍歸黔一語抹煞。其異點惟繳械與不繳械耳。劉春霖等電亦但舉席正銘等回黔平亂之電。以爲口實。於條約究不敢議及。可知公理所在。無可駁回。此時宜就彼中所指目者。略予通融。以塞黔中之口。仍照會議條件。決定執行。以安黔軍之心。查席電。係因黔中反對條約發生。措詞憤激。亦固其所。既爲黔中所忌。宜即將席正銘陳開釗數人。暫留湘鄂。酌量委用。徐再遣還。以免衝突。辰常黔軍。仍請中央簡派宣慰使。率之還黔。所有滇軍。節節退出。悉照條約辦理。至黔軍愛黔。必勝於愛湘。駐湘有械。不肯禍湘。回黔有械。甯至禍黔。是不繳械不足慮。席正銘等人。容與黔人有隙。暫不還黔。率以回黔者。係宣慰使責任。決無暴動之事。是尋仇報復不足慮。鄙見如此。我公如以爲然。即請會電大總統。迅即委定宣慰使。發布命令。刻日進行。以免再生他變。至經此次中央命令之後。黔中如再有挾私抵抗。公然稱兵者。卽是有心破壞共和。實爲天下公敵。元洪與公責任所在。斷難坐視。惟酌奪示覆。

附國務院來電

奉大總統令。據黎副總統譚都督電稱。趙君均騰昨歸黔事云云。斷難坐視等情。查洪江會議條件。中央

爲慎重起見。是以迭電湘鄂。熟商辦法。現經黎副總統。譚都督。切實調查。苦心和解。雙方自應遵照辦理。趙均騰即由中央任命。赴黔宣慰。未到差以前。在湘軍隊。仍責成楊前都督約束。趙宣慰使接管之後。楊前都督即遵照前電來京。至電稱黔中屢電抗爭。要不能將黔軍歸黔一語抹煞。蓋公理所在。本無疑義。惟繳械不繳械問題。實爲兩方爭執要點。現既得黎副總統譚都督。指陳利害。瞭若指掌。彼此自可共諒。且一方面。有宣慰使擔負責任。一方面。又將席陳等人。暫留湘鄂委用。似兼籌并顧。凡從前唐都督。及貴州各界迭電所疑。更可釋然。於洪江條件。除第六條。請派宣慰業經施行外。其四五七八等條。均爲目前即須履行條件。應責成趙宣慰使。協商唐都督辦理。自經此次解決。雙方應即和衷共濟。勿存意見。此外遇有應商事宜。趙宣慰使唐都督。均可就近會商黎副總統。譚都督。以期和平宗旨。貫徹始終。是所厚望。等因。理合電達。

致大總統參議院論時局

六部改組。竟成泡幻。誰爲厲階。遂使莽莽神州。陷於無政府地位。國之不存。黨於何麗。籌思及此。五內如焚。推厥原愆。皆因誤解共和。漫無界說。憲章不振。秩序紛如。內訌不已。外患斯乘。不有法律。其何能國。元洪內察我國之現狀。外審列強之視線。蠡測所及。不能不爲大總統暨參議院諸君痛切陳之。按文明國法律原則。命令不能變更法律。

然當非常緊急之時。得發大權命令。緊急命令。是命令可濟法律所不及。我國政府。一日不鞏固。即外人一日不承認。危亡之禍。近在眉睫。此誠危急存亡之時矣。大總統受國民委託之重。責有專歸。應請當機應斷。無徇黨派。無拘常德。但以民福國利爲前提。並按約法第十五條第三十一條三十六條。得以救活從事。庶幾秩序不紊。而邦本以甯。元洪以期望於大總統者此也。參議院諸君爲國民代表。即爲國家命源。立法之機關。停滯一日。即政府之危險增加一分。爭議不決。延宕時日。如國家何。如大局何。識者謂前清之亡。既由立憲。後來之禍。亦在共和。諸君偉畫盡籌。諒早詳及。人孰無心。何忍出此。惟望知識互換。意見消融。不隸黨籍。但謀福利。共促國基之鞏固。勿滋他族之狡謀。庶共和前途。視此爲轉圜。國會基礎。賴此而穩健。觥觥諸公。甯容代慮。元洪之切禱。於參議院諸君者。此也。尤有進者。財政之磋商。日形困難。鄰邦之謀議。正在進行。毫釐偶差。千里貽誤。稍縱即逝。間不容髮。長此牽延。噬臍何及。元洪才疏。補苴無術。覆巢可慮。堂燕何安。惟有訴請各都督。共扶綱維。以救危局。自茲以往。大總統主持於上。各都督維持於下。并請參議院諸君。速爲贊同。俾國務員即日表決。政府早日穩固。勿啓外

人以無政府之騰誚而生其覬覦。元洪雖犧牲性命。冒犯斧鑕。誠不忍坐俟滅亡。享止沸沃羹之餘。偷樂積薪之下。故於政黨榮譽。無不贊成。意見爭執。決不阿附。謹策駑駘。爲諸君後盾。前車既覆。來日大難。疹恤時艱。欲揮無淚。臨電鳴慙。不盡神馳。

致大總統陸軍部薦舉馬毓寶

前江西都督馬毓寶。于民軍起義。反正最先。光復九江。統治全贛。接以戰艦。抗長江軍事之重權。俾上下游水陸交通。戎機敏捷。援鄂援皖。措置裕如。復能推信讓賢。功成身退。實屬勤勞卓著。擬請大總統貴部。論功叙賞。量能授官。藉收得人之效。仰候鈞裁。

致中央及各省主張統一幣制

讀蘇都督來電。出入款項。中央地方。劃清權限等語。不獨爲根本之計。實亦目前切要之圖。應請大總統速行提交參議院核議施行。一面將舊有之大清銀行。一律更名中華銀行。已設省分。亟令復實。未設省分。卽行增設。准由該行發行全國通行紙幣。其各省已經行銷紙幣。中央一概担任。設法收換。仍定虛金本位。制銀銅則作爲輔幣。俱以十進計算。明定規則。價及一元。准用紙幣。不用銀元。價及一角。准用銀角。不用銅元。及

設中華通商銀行於中外商埠。專司國際滙兌。其股本金。即由政府聯合內地富商。外洋華僑。籌資開辦。如此通盤籌畫。對內則有通行紙幣。以濟其窮。對外則有銀行滙兌。以劑其平。一轉移間。盈虛消息。操之在我。即兵額未能裁減。亦不至釀意外之虞。今各省自由鑄造銀銅元。發行紙幣。每每慮受中央限制。違云統一。不知此皆當其事者。自私自利。有意把持。究其實際。於該省亦未見有利。即以湖北論。銀銅元鑄造有限。而紙幣行銷日廣。且以生銀無多。銀元不能繼續鑄起。滙兌機關。不得不停滯。外人又從而操縱其間。凡持銀元紙幣交易貨物者。一出一入。虧折太多。於是商家大受其害。官票雖可暢行。實以有銅元足以兌換之故。由是觀之。各省人民之所信用者。實為銀銅元。並非紙幣也。人民之所以不信用各省紙幣者。實以其信用力祇能及於本省。一出省即等無用也。若以此發行之權。歸之中央。代表法貨。通行全國。此弊自免矣。此欲整頓財政之宜急於統一幣制者一。此省紙幣信用惟祇能及一省。故不能不鑄同等價值之銀銅元。以備兌換。而外國之生銀銅塊。亦即相繼輸入。錢價因之日賤。市面盈虧。愈為外人操持。無怪物價難平。國民生計之日蹙也。此欲整理財政之宜急於統一幣

制者。且紙幣由中央發行。不須多備同等價值之硬貨。地方反是。故幣制一日不統一。卽多銷耗一日之鑄造費。若生銀銅塊之倚賴外洋者。尤爲各省目前之一絕大漏卮。何則。幣制一經統一。此項硬貨。卽可不用。故元洪愚見。以爲欲統一財政。尤在先行統一幣制。又統一國庫制度。亦係統一財政要道。前清資政院曾經議決。可否廣續頒行。並望大總統酌奪見覆。是荷。

致各省請嚴禁鴉片

查禁烟爲自強要政。亟宜切實進行。惟禁種禁吸禁運三項。必須同時並舉。方能有效。鄂省現在厲行禁烟。於種吸兩端。已經通飭各屬。嚴爲取締。而禁運則非得各省同心協力。不爲功。貴省向係產土省分。擬請通飭各屬地方官商會。曉諭各土商。一律不准運入湖北地面銷售。如有違犯。一經查出。卽行罰辦。庶根株可絕。實效可收。務望戮力主持。以除巨害。

致閩都督請爲吳王二公建像營葬

去歲民軍起義。王君家駒。同吳君綬卿等。奔走燕晉間。聚集義軍。犁庭掃穴。旋吳君被

刺王君遂奔投麾下。以效驅策。山西西北之役。王君奮不顧身。拚一死與北兵苦鬪。俾公無後顧之憂。厥功甚偉。公對於吳張周三君。擬爲鑄銅像。擇窳窳。實足以慰忠魂於九泉。惟王君應如何安置。寂然無聞。湖北軍學各界。深引爲憾。日來洪處。謂王君遺櫬久寄他鄉。無人過問。請洪電商貴處。優施榮典。以酬其勛。論當時事實。王君不避艱險。捐軀報國。其功實駕吳張周三君而上之。吳等聚謀于石家庄。王君亦曾參與其間。鄂中之士。意欲貴處爲吳張周三君。建立銅像。及營葬時。以王君並列。洪意深以爲然。特將衆情代達。務望念其謀國之忠。死事之慘。預爲籌備。使王君早瞑目於地下。至深感荷。

致中央政府論籌邊

無兵不可以立國。無財不可以練兵。民國新造。列強環伺。彼既增兵以壓境。我可束手而無策。厚集兵力。沿邊鎮守。以爲抵禦計。大總統既籌之於前。段總長亦議之於後。視線所注。海內同欽。然防邊之策。尤有二端。願與我政府共磋商焉。(一籌餉)中國財政困難。庫帑空虛。救時者莫不動言借債。然借債以興商築路則可。借債以防邊練兵則

不可。債有盡而餉無窮也。若不預籌的款，恐終有餉缺兵潰之憂。其或由稅款項下指定撥入，或由各省每年協商若干，庶有定款，而資永久。（一墾荒）移民實邊，究未實行，以致沿邊空曠，棄財於地。茲既駐紮重兵，即可借資保衛，速遷內地居民，移置開墾，不數年間，餉款愈以有着，而游民可以就業矣。

致大總統請將張振武正法

捷密張振武以小學教員贊同革命起義以後，充當軍務司副長，雖爲有功，乃怙權結黨，榮驚自恣，赴滬購槍，吞蝕巨款。當武昌二次蠢動之時，人心皇皇，振武暗煽將校團乘機思逞，幸該團員深明大義，不爲所惑，元洪念其前勞，屢予優容，終不悛改。因勸以調查邊務，規畫遠謀。於是大總統有蒙古調查員之命，振武抵京後，復要求發鉅款設專局，一言未遂，潛行歸鄂，飛揚跋扈，可見一斑。近更蠱惑軍士，勾結土匪，破壞共和，昌謀不軌，狼子野心，愈接愈厲，冒政黨之名義，以遂其影射之謀。藉報館之掄揚，以掩其凶橫之迹，排解之使，困於道途，防禦之士，疲於晝夜，風聲鶴唳，一夕數驚，賴將士忠誠偵探敏捷，機關悉破，弭禍無形。吾鄂人民胥拜天賜，然餘孽雖殲，元愆未殄，當國家

未定之秋。固不堪種瓜再摘。以梟獍習成之性。又豈能遷地爲良。元洪愛旣不能忍。又不
敢迴腸盪氣。仁智俱窮。伏乞將張振武立予正法。其隨行方維。係屬同惡相濟。並乞
一律處決。以昭炯戒。此外隨行諸人。有勇知方。素爲元洪所深信。如願歸籍者。就近酌
撥川資。俾歸鄉里。用示勸善罰淫之意。至振武雖伏國典。前功固不可沒。所部概屬無
辜。元洪當經紀其喪。撫恤其家。安置其徒衆。決不敢株累一人。皇天后土。實聞此言。元
洪藐然一身。託於諸將士之上。闖葺尸位。撫馭無才。致起義健兒。變爲罪首。言之赧顏。
思之雪涕。獨行踽踽。此恨綿綿。更乞予以處分。以謝張振武九泉之靈。尤爲感禱。臨穎
悲痛。不盡欲言。

附陸軍部覆電

鄂都督鑒。軍密奉大總統令。真電悉。張振武起義有功。固當曲予優容。寬其小管。乃復蠱惑軍士。勾結土
匪。破壞共和。昌謀不軌。實屬擾亂大局。爲民國之公敵。躊躇再四。未便加以寬典。留此元愆。貽害地方。已
飭步軍統領軍政執法處。將張振武並同惡共濟之方維查拿。卽按軍法懲辦。此外隨行諸人。已飭酌給
川資。俾歸鄉里。以免株連。副總統爲保全治安起見。自有萬不得已之苦衷。杜漸防微。爲民除害。足以昭

示天下。所請處分。應無庸議等因。相應奉達。

致各省布告張振武罪狀（一）

竊民國初建。共和肇基。我神聖軍人。應如何保護治安。顧全名譽。矧武漢首義之區。爲全國視線所注。豈可重行破壞。致陷危亡。乃有張振武。蠱惑軍士。勾結土匪。破壞共和。昌謀不軌。鄂中幾次風潮。伊等均爲主動。元洪念起義有功。悉予保全。曾電大總統薦充顧問。並擬任東省屯墾使。厚給薪金。隆以禮遇。所以酬答前勞。無微不至。詎伊等潛返鄂省。多方煽亂。不時索款數十鉅萬。竭萬民之脂膏。供滬上之揮霍。猶復密布黨羽。分設機關。藉京漢鐵軌之交通。假改革政治爲煽惑。每一往返。則風鶴頻驚。欲事羈縻。則虎狼成性。神人共憤。婦孺皆知。此次電促赴京。實望革心向善。豈期顯露逆謀。圖翻全局。倘再爲隱忍。糜爛何堪。萬不獲已。祇得電請大總統。將張振武並同惡共濟之方維。嚴飭查拿。按軍法懲辦。以維大局。而保治安。元洪夙味知人之明。故少維持之法。應得處分。議無可寬。其盲從諸人。概免株連。惟溯自起義以來。相從軍旅。情誼難忘。並將其家屬。從優給恤。以示法外施恩之至意。揮淚瀝陳。俾咸聞知。

致各省宣布張振武罪狀(三)

張振武罪業經公布。並於銑日通電。計早達覽。惟其中詳情。恐未周知。本日再電中央。其文曰。張振武以初等小學副教員。曾充鄂軍務司副長。昔爲功首。今爲罪魁。元洪業於真電。請大總統嚴飭查拿。按軍法懲辦在案。惟恐傳聞失實。致起誤會。爰將伊等謀逆原因。再行宣布。以與天下共見之。起義以來。赴滬購槍。糜款六十餘萬兩。槍械腐窳。無裨實用。任意浮報。鄂財政司有案可稽。誤軍需之要公。恣一己之揮霍。其罪一。自募軍隊六百餘人。私立團名。強索餉需。人月二十元。實爲逾格。又私收退伍兵士六大隊。爲護衛隊。坐糜鉅餉。陰遂私圖。幸該團隊軍士大義素明。現願退伍。是知伊之蓄謀。匪伊朝夕。其罪二。冒充軍統。私夜橫行。帶隊放槍。居民惶恐。其罪三。搶奪兵站槍支軍米。其罪四。強佔鐵路。立中小輪船。自由行動。其罪五。暗煽義勇團團長梅占鰲。增加營數。誘令石龍川。往聯領事團。許事成任爲外交司長。該員等不爲所動。謀遂無成。其罪六。廣納良女爲姬妾。夥串某報爲鼓吹。其罪七。私立民國公校。當衆演說。革命非數次不成。流血非萬萬人不。止。言者寒心。聞者咋舌。其罪八。親率佩槍軍隊。逼迫教育司。詐索

學欺挾之以兵。其罪九。又令逆黨方維。勾結已開革之管帶李忠義。及已正法之祝制六等。分設機關。密謀起事。伊爲原動。大衆皆知。恐牽一以動百。故吞舟而漏網。其罪十。此外索欺鉅萬。皆密濟其黨。援來往京鄂。實陰行其詭計。種種不法。不勝枚舉。元洪薦充大總統顧問。擬任東省屯墾使。并有蒙古調查員之命。無非追錄前功。冀其將來。猶復請兵索餉。議設專局。又在漢口私立屯墾事務所。月索欺千餘元。擋案具在。欲壑未填。野心益熾。揭其始末罪狀。實屬無可再原。鄂中親故。多碍情面。雖稔逆謀。難予顯戮。一擊不平。大局見危。倘非請由中央。明正國典。何以昭示天下。自聞令下。喧傳武漢。萬衆額手。歡聲若雷。元惡旣殄。民心大安。元洪自請大總統量予處分者。實因上負大總統。下負國民。旣不能燭照於幾先。惟冀補苴於事後。從優撫恤。俾生者得所。死者瞑目。天遠聽邇。吾言不食。臨電雪涕。咽不成聲。等語。特以奉聞。

再致各省宣布張振武罪狀并引咎自責

銑電諒達。連日函電紛馳。詰難羣起。前電倉卒。尙未詳盡。報告政府書。復未齎到。誠恐遠道不察。眞象愈湮。敢重述梗概。爲諸公告。張振武初充軍務司副長。漢陽失守。託詞

購鎗械。留函而去。當命參議丁復生。隨至上海。配定式樣。只限購銀二十萬。乃橫撥買銅元銀四十萬。僅購廢鎗四千枝。子彈四百萬。機關鎗三十六枝。子彈二百萬。鎗械腐蝕。機件殘缺。有物可查。設有戰事。貽害何堪。設想且除買鎗二十六萬餘外。另濫用浮報三十二萬。無賬者二萬。尙借譚君人鳳五萬。陳督復來電索還。均係不明用途。有賬可稽。罪一。南北統一。戰事告終。振武自滬返鄂。密立將校團。遣方維往各處勾串。募集六百餘人。每名二十元。鄂軍屢次改編。該團始而不服編制。兵站總監兵六大隊。已預備退伍。伊復私收爲護衛隊。擁兵自衛。罪二。二月二十七日。串謀煽亂。軍務部全行推倒。伊復獨任方維。要挾留任。復謀殺新舉正長曾廣大。經元洪訪查得實。始將三司長悉改顧問。罪三。冒充軍統。夤夜橫行。護衛隊常在百人以外。沿途放槍。居民惶恐。甚至都督府。槍必實彈。罪四。護衛隊屢遣解散。抗不遵命。復敢搶兵站槍枝糧餉。藐視法紀。罪五。強調鐵路立中小火輪。勾串軍隊。夤夜來往。罪六。暗煽義勇團長梅占鰲。增加營數。誘命石龍巖往聯領事團。許事成任爲外交司長。該員等不爲所動。謀遂無成。罪七。革命後。廣納良女爲姬妾。內嬖如夫人者。將及十人。葉某及魯某。皆女學生。復夥串某

報爲鼓吹，顛倒黑白，破壞共和。罪八，民國公校開校，當衆演說，革命非數次不成，流血非萬萬人不止，搖動國本。駭人聽聞。罪九，親率佩槍軍隊，逼迫教育司，勒索學款，挾之以兵。罪十，令逆黨方維，勾串已革管帶李忠義，及軍界祝制六，滕亞剛，姜國光，謝玉山，劉起沛，朱振鵬，江有貴，黃耀生，暨漢口土匪頭目王金標，分設機關，密謀起事，並另舉標統八人，伊爲原動，大衆皆知，雖名冊已焚，祝滕正法，劉朱尙寄監，可質。罪十一，機關破露，移恨孫武，復密遣四十人，分途暗殺。罪十二，前次所購機關槍彈，除湖北實收外，近證之藍都督報告接濟之賤，尙匿交機關鎗多枝，子彈三萬顆，私藏利械，圖謀不軌。罪十三，此次電促赴京，實望革心向善，乃疊據偵探報告，伊以委命未下，復圖歸鄂，密遣羽黨，預歸布置，復查悉函阻將校團不得退伍，武漢一隅，關係全局。三摘已稀，豈堪四摘。罪十四，此外索款鉅萬，密濟黨援，腴削公家，擾亂秩序，種種不法，不勝枚舉。元洪薦充大總統，高等軍事顧問，並有蒙古調查員之命，無非追錄前功，冀其將來，猶復要索鉅款，議設專局，又在海上私立屯墾事務所，月索千餘元，凡此諸端，或檔案具在，或實地可查，揭其本末罪狀，實屬無可寬容。諸公老成謀國，保衛治安，素爲元洪所欽仰。

倘使元洪留此大慙。貽害地方。致翻全局。諸公縱不見責。如蒼生何。顧或有謂殺非其地。殺非其道者。責以法理。夫復何辭。然此中委曲。尙有萬不獲已之衷。爲諸公未悉者。武昌當革命之餘。丁裁兵之會。地勢衝繁。軍心浮動。振武暗握重兵。潛伏租界。一經逮捕。立召千戈。旣禍生靈。更釀交涉。操切債事。誰尸其咎。况北京爲民國首都。萬流仰鏡。初非鄰省。更異敵邦。明正典刑。昭示天下。揆諸名義。似尙無妨。此不獲已者。一振武席軍務長之餘燄。憑將校團之淫威。取精用宏。根深蒂固。投鼠忌器。人莫敢撻。捲土重來。擁兵如故。狼子野心。更無紀極。前此以往。殺旣不敢。後此以往。殺更不能。千里毫釐。稍縱卽逝。先此不謀。噬臍何及。况謀叛民國之犯。果有確據。隨時皆可掩捕。此不獲已者。二振武分遣黨羽。密布機關。奸謀敗露。應命赴京。更懷疑懼。居則佩刀盈室。出來荷槍載途。京鄂之使。不絕於塗。心機叵測。消息靈通。一電遙飛。全國窺變。聯電請求。舉兵要挾。雖有國典。亦無所施。况振武現參軍政。遙領兵權。繩以軍法。洵爲允當。且北京軍事裁判。尙未完全。南中軍法會議。尤非一朝。詢謀僉同。始敢出此。此不獲已者。三元洪數月以來。躊躇再四。愛功刑亂。五內交縈。回腸九轉。慈心百結。寧我負振武。無振武負湖。

北宵取負振武罪。無取負天下罪。割臂療身。決蟠衛命。冒刑除忠。實所心甘。夫漢高明太。皆以自圖帝業。遭際庸兒。越踐吳差。皆以悞信讒言。戕殘善類。藏弓烹狗。有識同悲。至若懷光就戮。史不論其寡恩。君集被擒。書不原其戰績。矧共和之國。同屬編氓。但當爲民國固金甌。不當爲個人保鐵券。元洪已念彼前勞。未忍悉行誅罰。安此反側。復未稍事牽連。遂致眞銑兩電。詞多含蓄。迹似虛誣。又何怪諸公義憤之填胸。而責言之交耳也。伏思元洪素乏豐功。忝竊高位。愛民心切。馭將才疏。武漢蠢動。全楚騷然。商民流離。市廛凋敝。損失財產。幾逾鉅萬。養癰成患。責在藐躬。亡羊補牢。泣將何及。洪罪一也。洪與振武。相從患難。共守孤城。推食解衣。情同骨肉。乃恩深法弛。背道寒盟。瘠口罔聞。剖心難諒。首義之士。忍爲罪魁。同室操戈。幾釀鉅禍。洪實涼德。於武何尤。追念前功。能毋隕涕。洪罪二也。國基初定。法權未張。凡屬國民。應同維護。乃險象環生。禍機迫切。因養指失肩之懼。爲枉尋直尺之謀。安一方黎庶之心。解天下勳庸之體。反經行權。爲法受惡。鼠思泣血。不敢告哀。洪罪三也。有此三罪。十死難辭。縱諸公揆諸事實。鑒此苦衷。曲事優容。不加譴責。猶當跼天踏地。愧悔難容。况區區寸心。不爲諸公所諒乎。溯自起

義以來。戎馬倉皇。軍書旁午。忘餐廢寢。忽忽半年。南北爭議。親歷危機。蒙蔽凶頑。頻驚噩耗。重以驕兵四起。伏莽潛滋。內謹防閑。外圖排解。戒嚴之令。至再至三。朽索奔駒。幸逾絕險。積勞成疾。咯血盈升。俯仰世間。了無生趣。秋荼尙甘。燕雀猶樂。顧瞻前路。如陷深淵。自時厥後。定當退避賢路。佇待嚴譴。倘有矜其微勞。保此遲暮。窮山絕海。尙可棲遲。漢水不波。方城如故。雖死之日。猶生之年。世有鬼神。或容依庇。百世之下。庶知此心。至張振武罪名雖得。勞勩未彰。除優加撫恤。瞻其母使終年。養其子使成立外。特派專員。迎柩歸籍。乞飭沿途善爲照料。俟靈柩到鄂。元洪當躬自奠祭。開會哀悼。以慰幽魂。並擬將該員事略。薈叢成書。請大總統宣示天下。俾曉然於功罪之不掩。賞罰之有公。斗室之內。稍免疚心。泉臺之中。或當瞑目。臨風悲結。不暇擇言。瞻望公門。尙垂明教。

致中央政府及各省請主持正論

閱直省議會敬電。欲彈劾國務總理。不禁駭異。查張方槍斃。實係鄂軍界取決。由元洪電請執行。此案情節重大。牽涉繁多。元洪當時宣布大總統不能公開審判。原爲安靖黨羽。顧全大局起見。迭經元洪通電聲明。所有完全責任。應歸元洪担負。但元惡就磔。

全境安堵。元洪一人得罪。縱糜軀漂血。亦所心甘。何得波及國務總理。藉端傾陷。搖動邦基。密念人心。不寒而慄。各省都督議會。老成謀國。不徇於風影之說。不激於黨派之私。必能判決是非。主持正論。望乞彈劾元洪。以謝張方於地下。感且不朽。臨穎待罪。無任馳惶。

附袁總統挽留電

前接箇電。中有退避賢路。佇待嚴譴等語。鄂中軍民商學各界。聞此消息。奔走駭汗。哀乞挽留之電。不絕於京師。則鄂中人民之心意。不問可知。外省傳聞之詞。自不如土著之較爲親切。參謀有計畫全國軍事之責任。鄂省爲中原脊膂之要樞。稍有搖動。恐全國人心聞而解體。不獨鄂中父老惶惑萬狀也。務乞勿再宣言。俾安眾志。大局幸甚。鄙人幸甚。袁世凱。

附湖北保安社紳耆通電

湖北自起義以來。無日不在驚濤駭浪之中。賴副總統鎮懾得宜。得以秩序晏安。市廛不擾。苦心孤詣。遠近咸知。張振武雖於光復之初。薄有戰績。而滬上購鎗一役。吞款至念餘萬之多。大局未定。敢視軍需。賤衆人之脂膏。實一己之囊橐。功罪相較。罪實過之。副總統曲予優容。未加譴責。怙惡不悛。乃敢私立機關。自募軍隊。假借名號。擅製徽章。任意橫行。道路側目。尤復廣置姬妾。需索金錢。漁色過於豪家。擅費同於

劫盜南山馨竹十死猶輕。願振武雖疊積邱山。而副總統則量逾江海。仍薦之大總統。俾充顧問。資遣入京。已蒙大總統。委以調查蒙古屯墾事宜。意蓋慰其前勞。觀其後效。振武若稍有人心。尙存公理。宜如何欽感圖報。戢影知歸。奈何捲土重來。野心不死。膽敢勾串軍隊。聯合土匪。意圖大舉。欲取鄂督民政長而代之。並揚言如事不成。即將焚掠租界。啓釁外人。使民國同歸於盡。居心危險。蓄謀狠毒。風聲所播。萬眾寒心。武漢震驚。達於極點。萬一決裂。危險何堪。幸而天奪其魄。祝制六等。以此破獲。始得轉危爲安。然羽翼雖除。渠魁尙在。汝霖等私憂隱慮。未嘗不議副總統之過於仁慈。失於斷制。養癰貽患。未能爲湖北計久遠也。乃自京電傳來。元惡梟首。父子弟。方慶更生。蘇峻誅而晉室安。元濟禽而蔡人樂。蓋自民國成立以來。伸法權。快人心。度未有逾於此一舉者。在大總統之英斷。副總統之沈毅。奠鄂境於苞桑。厝邦基於磐石。功在百世。夫復何疑。不圖參議院諸公。自逞私臆。首發責言。提出質問之書。將成彈劾之案。側聞副總統。並已電京辭職。連日鄂中大局岌岌。復有機幘不安之象。悲夫。何鄂人之多不幸也。竊謂振武罪狀。在他省議員。容有不知。習故守常。尙無足怪。若鄂人則誰不知。在振武前此舉動。或關於公家款項。或涉於個人私德。或觀釁未發。或分誘有人。雖萬惡之已歸。猶千夫之未指。至近日三次革命風潮。羣公爲振武主謀。三尺童子。孰不欲得而甘心。吾鄂同鄉諸議員。雖旅食京師。優游自得。然豈無家室在鄂。豈無親友在鄂。豈無耳目共見。豈無函札往來。奈何於荼毒我之張振武。則極力袒護之。而保護我之副總統。則極力詆毀之。天道猶存。人心未死。諸公清夜捫心。堪自問耶。縱諸公自意非吾鄂人民正式選舉。不必

爲全鄂人民幸福計。獨不爲祖宗邱墓計乎。鑒諸公之設詞。不過謂振武有功。宜事寬容。民國用刑宜從審慎。殊不知推翻專制。非振武一人之功。破壞共和。實振武一人之罪。况乎功小罪大。功少罪多。在副總統已寬不一寬。在民國亦這無可這。至於逮捕審訊。原有專責。而振武黨羽繁多。稍縱即逝。需爲事賊。雖悔何追。眾證昭彰。卽成信讞。南山比案。安用游移。此又辨之無可辨。疑之無可疑者也。汝繁等伏處鄰園。從不過聞政事。惟自去年民軍起義之時。卽設立保安社。維持於成事之際。奔走於離亂之餘。招集流亡。捍衛桑梓。迄今十月。粗得少安。今如因張振武功罪不明。致副總統有動搖之慮。豈特鄂人失恃。抑且大局堪虞。棟折榱崩。覆壓是懼。公誼所在。未敢緘默。伏乞大總統一面切實慰留。一面廣爲開導。仍望參議院諸公及湖北同鄉諸京官。主持公論。勿惑浮言。以福鄂人。以安民國。臨風披瀝。不盡欲言。

附陝西都督張鈞挽留副總統電

自滿清入關。二百年來。闇無天日。我公首舉義旗。爲海內先神聖慈武。遐邇同欽。某覬覦非分。希圖不軌。我公以燭照如神之明。爲先發制人之舉。孟常授首。諸葛揮淚。法不可寬。愛莫能助。乃有不識大局。妄事誹毀。我公因此時艱。偶萌退志。鈞不才。竊以破壞雖終。建設伊始。我公一人。天下具瞻。去留所關。安危攸繫。望持弘毅之志。荷重遠之任。禮義不愆。人言何恤。

附鄂省教育總會通電



黎副總統書牘彙編 卷二

三十四

張振武正法。鄂省輿論翕然。乃遠道傳聞失實。致起詰問之辭。不知黎副總統。為一省治安起見。電告大總統。盡法求治。實有不得已之苦衷。敢布實情。伏乞主持公論。勿為羣言所惑。謹此奉聞。





黎副總統書牘彙編目錄

卷三

函牘

致中央及各省忠告政黨

致六大政黨

再致中央及各省忠告政黨

致大總統因軍界反對參議院引咎

致各省爲黃興辨誣

致各省佈告馬隊倡亂剿平情形

致中央及各省布告大江報罪狀

致各省聲明拿辦何海鳴原因

致浙江各團體

覆大總統協商政策 附袁總統來電

致各報社報告武昌國慶日盛典

附大總統來電 (一)

附大總統來電 (二)

附大總統勉勵各都督電

附各省祝電

致各省都督各黨會

致上海紅十字會

致參議院論省官制

致大總統請闡幽先烈

致大總統請獎湮抑

致統一黨慶祝紀念大會

致贛督李烈鈞爲扣留軍械事

覆國事維持會 附國事維持會覆電

致大總統請結獎劉公

致大總統財政部爲借運蘆鹽事

致中央及各省惋惜宋教仁被刺

致中央及各省宣布大借款之利害

致各省倡議宋案當由法庭審辦

致湘皖贛粵四省及黃克強爲宋案借款事

附黃興覆電

致中央及各省規勸政府

致各省通告對付宋案借款意見

致中央及各省調停國事

致各省報告調停贛事意見

致救國社

致各省聲明同袍社解散事

致湯蟄仙張季直二君 附湯蟄仙覆電

致各省重申煙禁

致參衆兩院請速舉議長

致進步黨維持黨務

致進步黨策勵共維大局

致進步黨本部

覆陸軍部 附陸軍部來電

致大總統請慰留夏民政長

致兩院及各黨預辭正式總統

致大總統國務院報告季雨霖謀亂情形

致各省通告鄂亂情形 (一)

致各省通告鄂亂情形 (二)

致中央及各省宣布寧熊謀亂確據

致中央及各省通告季雨霖等犯案情形

致各省爲季雨霖事 附柏文蔚爲季雨霖解釋電

副 總 統 書 館



黎副總統書牘彙編目錄 卷三



不敏得隨諸君之後亦與有榮施焉拳拳之私惟求垂察

致六大政黨

方今黨派紛歧各樹一幟鞭促共和毫無實力。伐憎阿好舉國蹙然。諸公策六團爲一致。進全國於大同。集思廣益。允堪模楷。元洪何德。謬蒙推舉。兼葭依玉。且感且慚。尙希排蕩橫流。發揚宏愿。監督政府。提挈國民。扶顛持危。實式賴之。

再致中央及各省忠告政黨

連接警電。全國震動。燃箕煮豆。旗鼓互張。黨見所拊。不惜犧牲。國家以殉之。元洪初心。豈料有此。程都督徐軍長。並矢箴言。朱蔣兩督。更申訓諭。至來軍警之警告。啓輿論之批評。羣言交謫。萬矢一的。幸大總統有軍人干涉之禁。二次閣員得參議院同意之舉。定諸君愛國熱忱。不禁爲四萬萬國民馨香禱祝也。元洪於前次痛陳罪言。然猶不免。總總覆慮者。謹就各面之觀察。再效前途之忠告。惟諸君詳察焉。一內界觀。夫兩利相畏。則取其重。兩害相權。則取其輕。議員代表四萬萬國民。並非代表一部黨人。民權可權。輿情難拂。諸君深明大局。當恤人言。況政府虛懸。羣情惶恐。經濟界既虧覆篋之山。

國民捐難掘臨渴之井。迷途容豈再誤。歧路雖悔何追。此觀於內界不能不效忠告者一。一外界觀。東北之風雲孔棘。西藏之烽烟正熾。瞬息萬變。不可端倪。故財政之監督。不議於改革之日。而議於進行之時。東使之西行。不由於外幕之乘。實因吾內訌之起。維穀先集。覆轍可虞。設非力保中堅。遑云聊固吾圉。此觀於外界不能不效忠告者二。一過去觀。以言前事。我不可不鑒於亡清。以言近憂。我不可不鑒於昨日。六州鑄錯。萬牛難挽。在當日推倒專制。驟進共和。矯枉或不免過正。補牢尙覺其非晚。是以拾遺補闕。惟旁觀者最清。進步改良。亦文明國所不諱。無事遐瞻前代。止可近鑒當幾。此觀於過去不能不效忠告者三。一現狀觀。泰西各國。進行既任如許階級。美法成規。去今不遠。或七八年。或二三次。經營締造。艱險備嘗。我國破壞甫終。建設方始。秩序未復。民國未甦。欲冥鴻之飛。必豐毛羽。爲廣廈之構。先資衆材。故非拱衛中央。則不能謀統一。非維持現狀。則不能保治安。偷猶刮垢索瘢。勢必土崩瓦解。此觀於現在不能不效忠告者四。一未來觀。查臨時期限。不過三月。國會召集。尙屬萌芽。友邦無承認之明文。內地有紛歧之黨派。萬一潰裂。其咎誰尸。羣雄眈眈。攫取而代。惟確立不拔之始基。斯不予

來者以口實。豈可使成形之政府。再蹈危機。神明之胄裔。降爲奴隸。諸君竭力支持。猶虞不及。扶質立幹。一髮萬鈞。此視於未來。不能不效忠告者五。綜此五觀。惟求一德。諸君立論雖殊。而所持之目的則一。主張或過。而所期之事實則同。凡逆耳之忠言。皆人心之公道。故當以道德保尊重之法律。不可以黨見失國民之代表。庶上以紓大總統憂勤之念。次以堅國務員責任之心。元洪不佞。亦得從諸君子後。從容措理。決不徇一二人私意。爲萬世罪魁。瘖口噤舌。尙祈矜鑒。

致大總統因軍界反對參議院引咎

鄂省軍界。聞參議院爲張振武案。有彈劾政府之信。頗爲憤懣。經元洪再三勸解。已安靜矣。特此奉聞。藉紓厘系。聞昨日軍界通電。撮詞激烈。元洪往阻無及。索稿未獲。深爲惶恐。伏思元洪於張振武案。辦理委曲。未能事先徧曉。致啓詰問參議院。究其過失。正見愛人以德。咎由自取。於人何尤。感且不遑。敢言冤曲。乃各界憤憤洶洶。煩言四起。惡聲不受。反唇相稽。清夜自思。愈形咎戾。九州鑄錯。雖悔何及。除一面查實議處外。特請失察之罪。臨穎徬徨。淚隨電墮。

致各省爲黃興辨誣

黃克強君。碩德重望。薄海內外。靡不傾服。頃聞其因張方案。橫被誣讒。初謂道高毀至。原無損於日月之明。道路謠傳。不攻自息。嗣接南京程都督電。始知外間。竟有此種議論。不勝駭詫。鄂中倡亂。不止張方一次。歷破機關。黃君毫無影響。元洪目擊其事。知之最詳。深恐以訛傳訛。淆亂事實。用特通電陳明。伏希垂察。黃君此次北行。維持大同。元洪甚爲欽佩。將來消融南北意見。爲民國造幸福。實攸賴焉。時局維艱。偉人難得。伏望諸公主持公道。毋使賢者憂讒畏譏。民國幸甚。

致各省佈告馬隊倡亂剿平情形

昨二十四夜。有自湘來鄂之匪徒。組織秘密機關部。勾結城外馬隊倡亂。經元洪查確。派員密拿。在城內札珠街。將其機關部破壞。拿獲顧斌。顧開文。于達。羅子常。張伯模。郭玉山。劉安壽。馬露等八名。業經在府開軍法審判。該犯顧斌。顧開文。于達。羅子常。阮寶山等五名。均先後供認散放票布。勾結馬隊倡亂不諱。當即先後將該犯等五名正法。餘俟訊取確供。再行懲辦。其駐札城外南湖之馬隊第二標。倉卒變亂。經城內楚王台

兵士放槍轟擊，業已棄械逃潰。其第一標駐營抵抗，當飭黎蔡兩師長督隊合圍，並諭繳械免死。現在省垣人心安謐，恐謠傳失實，特此電聞。

致中央及各省布告大江報罪狀

竊國家要素，在尊重夫主權，共和人民，要服從於法律。無政府何以立國，無法律何以治民。當此建設之初，豈容破壞之事。查有大江報出版以來，專取無政府之主義，爲圖謀不軌之機關，擅造妖言，謠惑人心，廢婚姻之制度，滅父子之大倫，無國家，無家族，無宗教，無男女，近乃益肆猖狂，毫無忌憚，至有除去政府，取消法律之邪說，實屬大逆不道。悖謬已極，我中華禮義之邦，豈可淪於禽獸之俗。此等妖人，誠民國所共棄，世界所不容。等語非種。朱虛侯在所必鋤，例以聞人。少正卯是宜務去，敝省爲扶持人倫，保護治安起見，著軍警即行查封。該報館主筆何海鳴，凌大同等，現尚在逃，應請一體嚴緝，就地正法，以懲悖逆，而維法紀。除佈告外，合行通電，知我罪我，當與天下共見之。

致各省聲明拿辦何海鳴原因

青電想達覽，查何海鳴等，當漢陽之役，捲逃鉅款，曾經通電緝拿，就地正法在案。共和

宣布大局初定，未予深究，實望洗心革面，同爲良民。詎意怙惡不悛，潛來武漢，到處煽惑，圖謀不軌，機關破獲，調查名冊，該逆等實爲主動，幸殲厥渠魁，當將名冊燒燬，不事株求，原示開誠布公，以留改過自新之地。乃該逆自經漏網，假大江報紙爲機關，蠱惑民心，破壞團體，經彼煽動，不乏其人，實非尋常叛逆可比。元洪爲大局起見，通電緝拿，就地正法，且具萬不得已之苦衷，頃聞該黨秘密會議，欲煽報界以圖解脫，要知此等積惡案犯，濫竿報界，本無記者之資格，實爲民國之蠹賊，偷遇事姑息，不爲限制，諸悖逆之徒，羣起効尤，假報館爲護符，民國前途，何堪設想。在報界諸君，代表輿論，鼓吹共和，果係宗旨正大，元洪方馨香禮祝之不暇，此等敗類，自在報界屏斥之列。元洪自維生平居心行事，早爲國民所共鑒，惟恐各界未悉原因，或起誤會，合並聲明，惟詳察焉。

致浙江各團體

秋英靈柩歸葬西湖，已由陳代表去病，李稽書德羣護送至漢埠，今晚乘江寬船赴滬。

覆大總統協商政策

軍密捧讀篠電八綱，茲事體大，於中國政治前途，極有關係，大總統具閱中肆外之嘉

謨。奮長駕遠馭之偉略。熟籌審度。計出萬全。孫黃兩先生。業表同情。元洪粗知大體。自當贊成。政策聿定。公理無殊。交資互益。勉爲後盾。嗣望時加訓誡。無任悚惶。

附袁總統來電

連日與孫黃二君。商權內政進行方針。由凱開出大綱八條。(一)立國取統一制度。(二)主持是非善惡之真公道。以正民俗。(三)暫時收束武備。先儲備海陸軍人才。(四)開放門戶。輸入外資。興辦鐵路礦山。建置鋼鐵工廠。以厚民生。(五)提倡資助國民實業。先着手於農林工商。(六)軍事外交財政司法交通。採取中央集權主義。其餘斟酌各省情形。兼採地方分權主義。(七)迅速整理財政。(八)竭力調和黨見。維持秩序。爲承認之根本。以上八條。孫黃皆表同情。如執事亦予贊成。卽作爲我四人協定政策。嗣後進行事件。卽懸爲目的。以決疑義。而杜龐言。諸祈教正。盼速電覆。

致各報社報告武昌國慶日盛典

十月十日。武昌舉行國慶典禮。京省暨各界今表到者四百餘人。與會者數萬人。外國領事及各界到者近千人。午后議會。中外騰歡。良由億兆一心。是以丕基底定。自今以往。羣力進行。民國光榮。曷其有極。謹此電聞。

附大總統來電(一)

真電慰悉。國慶盛典。於江漢學義之地。爲華洋觀禮之場。文物帝王冠裳翁集。植基鞏固。民氣發揚。從此合力進行。必能增五族光榮于大地也。

附大總統來電(二)

十月十日。武昌舉行追祭大典。展翼稱觴。慰享先烈。撫今追昔。哀感彌深。凱職守攸。不克躬詣鄂。落。進馨香。良用悵。茲擬祭文一道。交朱慶瀾哈漢章二君帶鄂。即請執事代凱致祭。用慰諸烈士在天之靈。

附大總統勉勵各都督電

此次國慶禮成。中外騰歡。回思武漢起義。不過期年。全國翕然。基礎大定。求諸中外歷史。亦所罕聞。是我國民。傾向共和。已成一致。非各都督苦心戮力。保持秩序。豈易得此。惟願乘千載一時之會。專以國利民福爲心。使於萬斯年。永慶無極。然後可以對吾國民。願各都督共勉之。

附各省祝電

去歲十月十日。鄂垣首義。霹靂一聲。摧碎黃鶴。踴躍鸚鵡。氣吞雲夢。波撼岳陽。旬月之間。八方響應。風起雲湧。用遂成我莊嚴璀璨之共和民國。偉烈豐功。鑠今震古。吾秦介在西陲。賴先烈之英靈。踵武漢而崛起。傳檄三輔。奠定四關。商洛襄樊。一綫遙通。勢聯犄角。誼切唇齒。休戚與共。實倍尋常。茲值週年紀念。特

派周君銓綬代表鳳翔前來。海光蘭芷。吊薦國殤。茶火甲旌。參觀盛典。(陝都督張鳳翔)

民軍建義。倏已期年。隨垣卽於本日開會慶祝共和。追悼先烈。國徽軍樂。掩映生輝。既奔走以偕來。亦先號而後笑。祝五大族於萬斯年。尤有陳者。古語云。創業難。守成不易。請易其說曰。破壞未易。建設尤難。尚望兩總統暨諸名公。憂盛危明。勵精圖治。同心戮力。益鞏國基。以無負諸先烈在天之靈。(甘督)

真電敬悉。國慶盛典。薄海同歡。武昌爲倡義地點。英彥雲集。國旗高懸。引領慶雲。無任忻慕。從此鞏固共和。於萬斯年。更祝耀我國徽。與日同永。肅電奉賀。(四川民政長張培爵)

真電悉。國慶大典。海內騰歡。翹首鄂中。彌深敬仰。方今國基初立。人各有責。尤願與公共勉之。(宋小濂)

致各省都督各黨會

國慶大典。薄海騰歡。荷蒙京省及各界代表。遠道跋涉。惠臨此邦。又承佩玉瓊琚。環辭遙錫。曷勝榮幸。元洪得依附光寵。樂觀禮成。何快如之。惟念去年今日。諸先烈諸志士。作始之艱辛。與建國後。政治經歷之危險。破壞匪易。建設良難。方今內憂外患。相逼而來。後軫方遘。殷憂曷極。伏望共持初志。合五大族人民之衆。廿二省四部土地之廣。同心戮力。一致進行。期有以對諸先烈在天之靈。達諸志士倡義之首功。而不負今茲之盛典。國民前途。庶有豸乎。凡屬國民。興亡有責。敢布腹心。藉鳴謝悃。

致上海紅十字會

本會統一大會。元洪身羈鄂事。不克親臨。已委任鄂都督府顧問官。趙儼歲君代表。並賚送祝詞到會。想荷鑒及。即日開會盛況如何。不勝繫念。兩會長及諸君子。以熱心毅力。成此偉舉。仁聲義聞。照耀千秋。豈惟民國之光。蓋實人道之福。

致參議院論省官制

頃聞貴院於省官制議案。經審查會表決。擬刪除大總統解散議會權。而省議會有彈劾省長權。不勝惶駭。方今國勢阨隘。黨派紛歧。若立法不得其平。則禍變將何所底止。推貴院意。無非杜中央專制之萌。持伸張民權之義。不知解散議會。待之公判。於民權毫無損害。此種手續。由大總統執行。并非以此增加勢力。事實理論。均無不合。若必集矢政府。以爲伸張民權地步。則議會爲人民代表。省長受人民委託。於人民皆各負相當之責任。省長違法。固負委託。議會專橫。豈堪代表。顧省長既有糾懲之機關。而議會則無解散之手續。揆諸民選本意。夫豈其然。試舉弊端。可慮有四。議會無限制。勢必軼出範圍。設與省長極端衝突。時。是否別立機關。爲之裁判。若不服裁決。又將如何處置。

此可慮者一。省長既爲官吏懲戒法行政裁判所互相禁制。復有議會爲之監督。今又以無限制之彈劾權相加。勢必賢者羣思去位。而鬪茸溺職者。反得苟且求容。荒政誤國。誰尸其咎。此可慮者二。設因議會無端牽掣。以致國家要政。不能實力奉行。將來中央考績。是否罪加省長。此可慮者三。強劾濫施。執政者必不能久於其位。遂至政令紛更。迄無定見。大局動搖。何堪設想。此可慮者四。竊謂法制規定。全國之利害隨之。必體察內外實情。宜於民俗。而適於國度。方無窒礙難行之弊。法之制不可行於美。美之法不可施於瑞。卽一國之中。古憲不宜於今。前章不適於後。斟酌至當。責在諸君。伏望準諸權衡。平其偏倚。卽將此議取消。庶幾三權鼎立。於不相侵犯之中。寓互相維持之妙。民國前途。其有多乎。區區愚誠。伏希垂察。(各省都督領銜)

致大總統請闡幽先烈

去年民國成立。改變之速。爲中國歷史所無。亦爲外國歷史所無。策勛行賞。黨人之生者。同有榮施。而追溯淵源。黨人死者。資其鐵血。以有今日。斯非闡幽。無以慰九泉而作士氣。茲查唐才常、鄒容、吳樾、徐錫麟、譚嗣同、熊成基、吳祿貞、陳天華、楊銳、劉光第、林旭、

康廣仁、溫生才、劉靜安、王漢、林時爽、林覺民、林尹民、喻培仁、陳與榮、姚洪業、趙聲、彭家珍、史堅如、傅慈祥、朱子龍、周維楨、張世膺、陳敬岳、張榕、王鐘聲、王子貞、施從雲、楊恢揚、守仁、蕭鐘音、李子高、王簫九、陶成章、彭楚藩、劉堯激、楊宏勝、秋瑾等起義先河。革命巨子以抑塞磊落之奇才，當政治腐敗之季世，提倡民族，奔走號呼，運動秘密，手段激烈，特以時期未至，橫被冤死，言念先哲，情實可憫，功不可沒，敬祈大總統明予昭雪，追策前勛，撫恤家屬，建立專祠，下慰幽靈，大彰公道，無任企禱。

致大總統請獎湮抑

此次革命成功之速，全係國民同心所致。當時投身民軍者，以積極行為，首先倡義，其功爲世所共見，而籍隸清軍，以消極行為，暗中保全者，其功爲人所難知。在去歲建義之初，前清統制薩鎮冰統率軍艦，溯江直抵武昌，心知革命爲不可緩，武昌爲不可亂，話詞不忍自殘，同種密飭各艦，不可輕舉妄動。艦隊統領沈壽堃，時則近受節制，奉令惟謹，用致全軍艦隊相率反正，是薩鎮冰沈壽堃二員，暗中保全武昌，維持革命之功，實爲元洪所親見，復爲元洪所獨知。又前贛軍政府參謀處長劉麟，於今年三月前贛

都督馬毓寶卸篆後，即相繼辭職。按照補官章程，係在應授實官之列。在該員等皆有功成身退，絕口不言之高風。在元洪固有闡潛發幽，舉爾所知之義務。又前清海軍協都統程璧光，學術擾長，才猷卓著，爲海軍不可多得之材。擬請將該員等分別賜給勳位，或補授實官，以彰公道，而勸賢能。合併電請大總統裁奪施行。

致統一黨慶祝紀念大會

國基新造，民德未純。當此內憂外患之交，宜有定傾扶危之計。貴黨經年以來，對於民國重要事件，注意主權，力持大體。上年十一月敬電，所以維繫時局，轉移世道人心。尤爲覺世福音。羣當奉爲圭臬。茲逢初周紀念，特馳電聊伸鄙忱。尙望擴張政策，發宣於正式國會政府之成立。主持公道，以與各黨扶助進行。則民國之幸福也。

致贛督李烈鈞爲扣留軍械事

彭賀兩君蒞鄂，省長問題，共同磋商，尙易解決。至貴省槍彈案，昨接陸軍部復電，文曰：胡都督卅電，悉關懷大局，雅意維持，至深欽佩。贛省槍械扣留原由，前經遞電詳述。諒已察及。現在贛省甫當兵變之後，匪徒從而生心，軍心亦未鞏固。無識之徒，多不知服

從命令驟爾輸入利器實多可慮亦殊非贛之福擬即派員詳確調查如該省實需槍械不至再生變故當由部酌量籌撥中央決無成見但以顧全大局息事寧人爲主當亦爲明達所深察也等語細譯電意較前大爲活動執事若能持靜穩態度嚴守秩序約束軍隊毫無授人以柄之處調查員必不至顛倒是非軍部斷不至始終膠執相見以心何嫌不釋高明以爲如何除派本府秘書梁柏年會同黃君楹面商一切並電中央迅飭監司令緩提鎗械外先此電聞

覆國事維持會

孫王林溫楊諸君智電悉現值臨時政府將終正式政府未立國家威信不行人民譁張愈肆內誣外侮交逼日深危亡之機不絕如縷諸公發起斯會聯合全國團體居間排解以維持國事於新舊斷續之交苦心孤詣宏願熱誠欽慰無既且不偏立於政黨議會中央地方之一方面全力以行其仲裁所稱方法因時制宜非以調停遷就爲事大公至正尤佩偉畫元洪深表贊同所望當道諸公共成斯舉風雨同舟誕登彼岸則民國之幸也

附國事維持會覆電

敬電敬悉。敝會初立。基礎薄弱。乃蒙謬加獎借。力予提倡。並通電各省。協同扶助。高誼熱誠。同深感激。現由本會開會。公推先生爲名譽理事。以後一切進行事宜。諸賴鼎力維持。尙祈時賜訓言。俾有遵守。是所切禱。

致大總統請給獎劉公

武昌首義之士。孫武而外。尙有劉公。查該員奔走海外。力圖改革。久而弗衰。曾聯絡各省志士。首倡共進會。爲同盟後援。聲勢爲之一振。革軍未起以前。曾公推領袖鄂黨。毀家犒士。俾收軍界響應之効。其才已可想見。旋以大局未定。出鎮荆襄。寬猛兼施。上游無恙。綜計該員前後行蹟。其功實不在武下。該員現雖解職。擬請查照孫武一例。酬庸以彰公道。

致大總統財政部爲借運蘆鹽事

福利公司。借運蘆鹽。原因鄂岸缺引。曾屢電催運無效。始必出此。此次淮南並自請借運。使果如該部所云。存鹽豐足。鄂省何得出此。淮又何得出此。至福利公司。每引報效。

三兩。查淮鹽向章每引商本十三兩有奇。福利公司報効之款。乃于二十八兩餘之內。由商本提出。不取諸公家。該部謂淮舊商借運。按照鹽斤加餉新章。每引加抽九兩。是較該商報効。應出兩倍等語。微論該部加餉新章。鄂中尙未見明文。且果使一律實行。均于二十八兩餘之外。加抽食戶九兩。無論何商。均應照辦。非于廿八兩餘之內。自捐商本三兩也。報効與加釐。截然爲二。該部何至混而爲一。況當此民生疲敝。衆怨沸騰。提倡社會主義者。方乘間抵隙之不暇。該部加餉新章。若是其鉅。尙不知能否實行。該部視淮鹽爲淮商世產。偏執保護之說。遂不惜困人民生計以徇之。猶復以培元氣相規。以違約法相責。豈區區保一淮商。竟足代表全國耶。該部謂于舊商毫無成見。元洪固所深信。然能使見信于國人乎。且敝省于福利公司。一則曰借運。再則曰限二十萬引。卽所以維持引岸。尊重政府爲一時權宜之計。而仍不失將來統一之規。元洪自倡義以來。卽殷殷以全局爲計。去年戰雲緊急。淮鹽道阻。川商之來府請運者。肩踵相接。當時無中央政府。更無所謂財政部。誰復出爲禁阻者。然且再三拒駁。不敢貪近利而忽遠謀。該部今乃責元洪曰。國本未定。立信爲先。一予一奪。何所取義。云云。抑何其詞。

嚴而義正耶。元洪愚闇。但以便民利世爲前提。不能以硜硜之信。純待私商。三復電文。汗流浹背。鄂省不智。忝執鞭弭爲天下先。值南北戰爭之時。首當其衝。兵民既殲。公私交困。不聞有各省之協濟。中央之補助。羅雀掘鼠。忍痛至今。今者共和已成。事過情遷。他處之於鄂省。有如秦越。不得已而求一標本兼顧之計。盡涓埃補救之方。乃一掬苦心。輒遭嚴駁。咎由自取。夫復何言。且湘豫皖借運。皆經允准。鄂獨拒絕。該部對於湘豫皖省。以淮南爲輕。對於淮南。則以鄂省爲輕。又見該部階級分明。有條不紊。謹當啣恩戴德。永矢弗諼。自是厥後。所有鄂省按月軍餉。及從前軍需虧空之款。但能由部籌撥。俾保自安。無論該部若何措施。元洪胥惟命是聽。願該部實式圖之。抑元洪尙有一言。忠告者。淮南積弊。已數百年。內外交通。官民俱困。將來規畫鹽政。改弦更張。欲籌中央統一之方。必先除奸商壟斷之害。不然區區鄂省。不足重輕。恐全國十目所視。不能爲該部曲諒。惟善人能受盡言。敢述衷曲。敬候裁奪。臨穎待罪。無任悚惶。

致中央及各省惋惜宋教仁被刺

頃聞宋君遜初。在滬警車站遇刺逝世。驚駭無既。宋君奔走革命。寒暑十更。卒能號召

人心推翻帝制。當南北統一之始。挖擄猜渙。締造艱難。國人視爲干城。總統倚爲指臂。綜其生平事略。昭揭日星。此等元勳。何負於中華民國。而慘報若此。元洪向同患難。遠接訃音。既深亡國之憂。尤抱失羣之痛。五中慘裂。悲憤填膺。尙望各都督民政長。嚴拿正犯。務得主名。雪不平之鳴。弭無窮之患。或者邦人昆弟。猶有甯期。電短淚長。佇俟明教。除一面派顧問官楊開甲前往治喪外。特此奉聞。

致中央及各省宣布大借款之利害

國會初開。憲法未定。邦人引領。若望雲霓。乃借款一案。大波迭起。急電分飛。聚訟盈庭。操戈同室。元洪等忝總戎行。或膺疆寄。原不敢蹊田爭分。越俎陳言。然對民國爲編氓。對諸公爲摯友。禍既切膚。誼難緘口。竊敢以告哀之隱。抒請願之誠。民國肇建。四海困窮。賠款未償。債權交迫。干涉之約。將見履行。關稅田租。同歸于盡。其亡一也。四郊多壘。兵費浩繁。養無額糧。裁無恩餉。奸人煽惑。鼓噪隨之。合爲叛兵。散爲流寇。其亡二也。庫約既成。藏警疊告。折衝樽俎。今非其時。千里饋糧。士有飢色。禍端一起。何以禦窮。其亡三也。杼柚久空。周轉無術。累年鈔票。充溢市廛。信用愈虧。價值愈跌。一朝破產。全國爲

墟其亡四也。庶政未興。一籌莫展。行政機關。儕同糊塗。束手自斃。剝肉離骨。如彼頹陽。亡將無日。其亡五也。戰事甫息。詛言羣興。商業凋殘。金融停滯。寄產於鄰。停貨於市。欲收餘燼。其道無由。其亡六也。凡此六危。朝不保夕。其他久遠之圖。尙有可存而不論者。外人本合縱之勢。爲壘斷之謀。曲於磋商。則變更屢起。別圖貸乞。則齟齬多方。美人雖仗義出團。五國仍乘危要挾。處心積慮。已非一朝。當此公私交困。內外俱窮。舍借債無良方。當爲國人所共諒。舍銀團無鉅款。亦爲天下所共知。一年以來。議院之談論。政黨之主持。報章之紀載。無不冀借債成熟。稍有轉機。雖明知飲鴆止渴之危。亦勉懷亡羊補牢之念。政府以借款標準。徵議院之同意。議院無異詞也。政府以借款條件。要議院之表決。議院無異詞也。國會爲繼續機關。斷不能自蔑尊嚴。輕於變易。謂前此悉爲虛誣耶。則參議院紀事錄。固尙秩然可稽。謂現在猶有疑問耶。則國務院答覆書。亦以持之有故。是亦不可以已乎。夫國會者。人民所託以立法。政黨者。邦國所藉以協商。歐美各國。其議員自待若何。非必橫語惡聲。各爭勝負。老拳毒手。互鬥雌雄。鬩于堂中。而反訴諸院外者也。觀諸公前後反對之電。其溯及前案。或謂未足法定人數。或謂足法定

人數或謂未經表決。或謂但表決大綱。豈惟兩院之論。絨線難符。抑亦個人之詞。矛盾相抵。諸公謂對於借款。認爲必要。亦可見維持大局。顧恤宗邦。然猶且齟齬。然抗辯者。不過以會議之時。事前未刊列日程。事後未具文咨復。在政府狃于先例。忽於後防。以是責言。何難加罪。然手續未周。應由議院與政府共尸其咎。寬議院失職之過。既似未平。苛政府違法之名。亦恐不受。若必欲執此小疵。遽翻全案。試問當兩院否認之後。借款停交。簽字作廢。一一皆如願以償。諸公果有卜式之資乎。抑別有劉晏之術乎。將有富國之經。足以遣人而自立乎。抑有交鄰之策。足以舍此而他求乎。姑無論前述六危。萬難解決。即此次已交之款。業經支用者。將何以頃刻籌還。諸公必又號於衆曰。我等乃否認簽字。非推翻借款也。果爾。豈不甚善。然試問一經否認。能保外人之帖然無詞乎。能保後日之磋商有效乎。國產一破。戎機隨之。充其結果。政府不過土崩。國會亦將星散。其激烈者。或竄身窮海。其附和者。且伏首新朝。而國民流離曠野。乃同憐搞。精撲髓之刑。同人捍衛危城。乃親受暴骨刳戶之慘。庭堅之種云亡。若敖之魂將餒。國既不存。黨將安附。後之人追原禍首。誰復起諸公於九泉。而剖心共白之。夫逞一時之快論。

爲萬世之罪人。誠不解袞袞諸公。抑何心之公而識之左也。總之推翻借款。遠患近憂。外爭內亂。於勢萬無可逃。元洪等具有天良。非確見大禍燃眉。亦何敢危言聳聽。諸公如推誠行恕。達變通權。念時局之艱危。加借款以承認。一面再萃合羣言。妥籌善後。議定審計院法。俾之監督用途。稽查浮濫一也。質問財政部。使此後整頓鹽綱。計畫財政。逐條答覆。協議磋商。二也。方針既定。然後再督其實行。以各省協助中央。即以中央統一各省。內部無分裂之虞。斯外人無干涉之漸。三也。事事既行。衆志胥定。於以鞏民邦之基礎。保憲法之精神。豈惟政府受此懲創。率履不越。亦且國民拜公惠賜。永矢弗諼。元洪等誓言俱在。創血猶存。滄海可枯。初心不改。當共以銅頸鐵血。擔保共和。着各省之先鞭。爲諸公之後盾。斷不使帝制復生。民權中斬。皇天后土。實聞斯言。諸公以政黨中堅。爲民國代表。甯合衆人而一無所信。不然始主集權。而繼主分權。始主借款。而繼主拒款。兩雲翻于掌上。冰炭變於心中。雖最愛諸公。亦百喙無能代解。若果有奇謀幹畧。匡救時艱。亦當昭示愚蒙。解除憂慮。洪等不敏。竊所願聞。翹首燕雲。卽希惠復。(各省都督會銜)

致各省倡議宋案當由法庭審辦

程都督應省長有電驚悉。議院政府尙未成立。外憂內亂。迭起環生。若陷漩渦。罔知所底。乃值此存亡一髮之際。猝遭慘案。更涉要人。罪案尙未判成。人心已爲搖動。舉國惶惶。如臨大禍。顧瞻危局。欲涕無從。各都督民政長老成謀國。愷悌及民。聞斯電音。必有同深震撼者。望勿狃於成見。掉以輕心。以鎮定息浮言。以公平安大局。至審辦宋案。尤應由法庭詳求真狀。宣示國民。終必求水落石出。毋激意氣。以求殘害也。有渝斯盟。神將不佑。臨風洒淚。敢以告哀。

致湘皖贛粵四省及黃克強爲宋案借款事

四都督真微電。譚都督東江兩電。李都督黠卅支二電。柏都督儉微兩電。胡都督微電。及黃先生宥東兩電。一一誦悉。元洪感支兩電。計達台覽。宋案借款。兩事發生。文電紛馳。謠言盪起。分崩離析。禍在眉睫。顧以發端宏大。收拾頗難。時勢逼人。調停無術。竊念借款一事。聚訟數年。祇以國信未著。條件太苛。更迭數手。迄無所就。今既各國讓步。速成苟於通過。原議不再受虧。卽小節亦當共諒。此時洋賠各款。既須速還。軍政各費。不能

停止。各省又不能立集鉅款。用爲抵制。更不能保將來政府借債之事。永不履行。則是今日舍借款無救急之方。舍五國無現成之款。爲今之計。國民惟有監督用途。力求補救。至於宋案。當然由法庭主持辦理。政府有無犯罪。司法獨立。自有特權。似此兩案。均無萬難解決之問題。而其致此之由。則以借款適成於宋案發表之後。宋案適生於選舉總統之先。市虎杯蛇。疑心暗鬼。一若暗殺爲帝制之謀。借款爲軍爭之費。果有此事。吾鄂以陽夏之慘痛。博此共和。又豈能坐視沈淪。自甘奴隸。願所以委曲求全者。一則項城爲救時之英雄。決不逆潮流而犯名義。一則現世值過渡之危險。深恐因激烈而速危亡。不意彼此爭持。是非各執。在諸公熱忱愛國。嚴守共和。義憤忠誠。至堪銘佩。但國務院財政部各都督疊次通電。要亦各有理由。未可偏廢。總觀全國輿論。人心趨向。可知諸公本明白無他。所慮望風承流者。誤會意旨。到處聚衆開會。言論過激。駭人聽聞。現在漢滬等處。中外商民。停貨不辦。銀根緊急。倒閉相尋。寢饋不甯。怨咨交作。紛電告急。咎將誰歸。若非請諸公早爲防遏。以鎮靜和平之態度。出此險難。誠恐事與願違。果與因反。國未蒙其福。民先受其禍。屆時亦安得徧國人而剖心共白之。今者法權未

有正式裁判之確期。議院未有正式否認之成案。似不能遽爲政府罪。共和國國家既特設此立法司法兩大機關。人民自當以全權付託。我輩惟有各守秩序。靜候法庭議院之解決。以免舉國紛擾。如其尙有猜疑之黑幕。元洪不難聯合各都督。全力擔保。永守共和之責任。以取信於國民。而息無量之憤懣。其餘自當迎刃而解。元洪與諸公。昔爲生死患難之交。今爲唇齒輔車之勢。感赴援之厚誼。懷通好之真誠。區區此心。萬不至舍舊謀新。去近圖遠。惟外觀世局。內審國情。但知以國利民福爲前提。以保育共和維持統一爲宗旨。不忍南北稍形決裂。尤不忍武漢重見兵戎。利害相權。存亡所繫。各有責任。未敢苟同。此事和平辦理。則國基鞏固。國用充盈。威德遠行。友邦公認。諸公手造民國。永垂無上榮譽。否則內部崩裂。強敵剖分。民國不成。諸公前此勛名。亦將安在。若強鄰承認方殷。而人民猜疑頓起。茫茫前途。夫豈敢知。元洪恃在夙好。敢貢罪言。情盡於斯。尙祈矜察。

附黃興覆電

青電至誠感人。金石爲開。輿縱推愚。寧不喻此。惟借款適成於宋案發生之後。宋案適生於選舉總統之

前。市虎杯蛇。種種誤會。皆由而起。如吾公之所云者。夫宋案如何辦理。固當由法庭主持。惟以堂堂政府。首受嫌疑。國民一言及此。則曰此藉題發揮也。借債不交國會議決。幕夜簽押。國民一言及此。則又曰此藉題發揮也。自吾人觀之。三事本不相聯屬。而當事者。反得利用此項機會。併爲一談。使天下之真是非。皆爲藉題發揮。四字所打消。今假設宋案發生。無所謂總統問題夾雜其間。借款事起。更無所謂宋案與總統問題爲之牽連。則殺人者豈可置之不問。違法者亦豈可任其爲所欲爲。與對於宋案。純主法律解決。借債要求交國會通過。終始如一。實與吾公所見相符。文電具在。可以覆按。尤有言者。共和政體。應審民意爲依歸。當此輿論紛騰之際。政府不自反省。與國民披誠相見。乃據外人無根之報紙。發爲命令。以欺飾天下。幸國人皆顧全大局。否則逼之激之。至於此處。前途何堪設想。我公艱難締造。手創民國。當亦同深痛心。與與公相見於患難之時。相交已一年之久。既不相渝。後當視今。尊電所云。以全力担保。永守共和。公之苦心。與所素識。公之至誠。全國所共感。我公倘有其道。凡百君子。莫敢不從。豈惟與奉命。

致中央及各省規勸政府

大總統令均敬悉。前接湘皖贛粵四都督通電。元洪卽專電勸解。免致誤會。元洪與四都督向爲生死患難之交。今爲唇齒輔車之誼。深稔其均明大義。不變初心。此次聯電抗爭。要本於愛國赤忱。激而出此。雖傳聞失實。未暇擇詞。而贛直不阿。實堪厲俗。經大

總統再三解釋。同爲救國。當不難上下相原。抑元洪杞人之憂。有不憚反覆詳陳者。竊惟此次爭議。實由借款適成於宋案發表之後。宋案適生於政府改組之先。混爲一談。遂滋疑慮。果使即事分疏。平情論斷。自不難迎刃而解。宋案之成。純構於洪應函件。徵諸輿論。猶多信總理之無他。惟司法獨立。自有特權。固不能據洪犯間接之信。指爲爰書。亦不能憑總理辯護之詞。視爲政令。爲政府計。宜早日引渡洪犯。送交法庭。是非非聽其裁判。總理有罪。不以勢相凌。總理無罪。不以辯相競。公心既白。異議潛消。此一事也。借款既鉅。負擔斯增。自應尊重民權。提交國會。惟此次合同早通過於參議院。參觀中央文電總辦之差。既有誤會。三讀之省。亦經聲明。且折扣雖異。合較便宜。洋員雖增。自由黜陟。當債權交迫之會。值轉圜難得之機。苟大綱不至懸殊。即小節無妨曲諒。爲國民計。當責嗣後國會諸公。擁護憲法。監督用途。示政府整頓財政之方。杜外人干涉財權之漸。既紓近禍。尤免遠憂。此又一事也。凡此兩端。均非絕難解決之案。第恐天下之憂。尙有不在此而在彼者。溯自戰端甫息。和議肇成。南北之見未融。新舊之爭未泯。履霜堅冰。早埋隱患。雖憂時俊彥。力予維持。而樂禍僉壬。每生離間。忠言之逆耳不

如讒語之悅心。庸論之聒聞。不如邪詞之聳聽。面輪背笑。貌合神離。一年以來。萬事俱廢。自維薄德。匡諫無從。當此國會初成。方期戮力同心。共圖晚蓋。乃亂雲變幻。急電紛馳。誣中央者。謂因借款之利。以實軍儲。疑南方者。謂假借款之案。以推政府。宵居廣廈。則盜影懸心。曉入空山。則鬼聲繞窬。杯蛇市虎。積揣成訛。報煽其波。說張其燄。風潮所播。山岳摧崩。奸狡者既藉以圖功。偏激者復挺而走險。推其流極。必至舉莽莽神州。遙遙華胄。胥斷送於奸人播弄之中。而啓衅之因。實由於疑之一字。有以召之。縱使借款未案。永不發生。或旋當消滅。能保其再無他故乎。夫萬心之合。不能拒寇讎。一念之離。足以惑種族。誰實爲之。至於此極。此真元洪所深思泣血悲痛填胸者也。伏維大總統。幹旋危局。締造新邦。遺大投艱。萬流宗仰。惟至悲可以感物。惟至誠可以格天。聖本於仁。佛成於忍。在昔魯陽揮戈。日爲反舍。生公說法。石尙點頭。杞婦哭而城傾。耿侯拜而泉湧。矧茲分陝。俱屬同胞。果出以纏綿悱惻之情。何難收翊贊維持之効。夫勇者不以言尙人。智者不以威示衆。惟度世者乃能入世。惟馭人者乃能下人。尙望虛心應物。觀過知仁。毋信流言。毋爲激論。尤望各都督各議會各政黨。各蠲成見。共矢公忠。怵時局。

之可危。念家居之不易，毋爲捉影捕風之語。毋懷吹毛刮骨之心。駭浪孤舟，互相維繫。或者誕登彼岸，猶保餘年。不然始以浮言相詰，繼以盛氣相加。終且以兵戎相見，抱薪救火，禍亂循環，煮豆燃箕，同歸於盡。豈惟將來苗裔靡有子遺，方且已往勛名亦將安在。後世觀黍離之野，過麥秀之墟，誰復詳晰事端，曲原心迹。夫以革命數十年，伏尸數千里，而結果僅乃若此，豈不哀哉。湖北兵燹餘劫，縮穀要衝，創血未乾，淚痕猶在，誠不忍操戈相擊，引刃自戕。鄉鄰失火，則舉族環呼，昆弟鬩牆，則羣季聚救。切膚之痛，百倍鄰封。諸公爲手創民國之人，豈忍更令淪胥，不容休養。度愛民者必不出此。天命難謀，國魂將落，惟諸公實式圖之。

致各省通告對付宋案借款意見

自宋案宣布，元洪卽通告各省，力持鎮靜，乃反對借款同時發生。中央政府遂成爲衆矢之的。頃接上海公民會電，命名立論，尤駭聽聞。大局危亡，迫於眉睫。元洪五中震慄，若鯁在喉，敢於國人未死之先，進其忠告。查宋案證據，爲程都督所宣布者，果否政府主使，抑係應洪揣測邀功，招謠詐欺，均不可知。狡黠者流，希圖功利，動則假一二人

爲之標幟。且滬報所載。未經電布之證據。牽涉尙多。卽愚如元洪。亦遭詆毀。要犯尙未就擒。原案尙未確定。自當要膠督之引渡。聽法庭之制裁。萬目睽睽。豈能掩飾。卽政府有罪。亦不難求信讞。昭示國人。共和國家。首重司法。豈惟行政官廳。不容干預。卽至立法機關。亦當然不能侵犯。刺宋一案。純屬法律問題。前者宣布證據。不出之於法庭。而出之於政府。學律者猶竊議其非。乃各省團體。當法庭未判。以先動輒任意通電。牽入政治。搖動邦基。加人以犯罪之名。而先自居於違法之實。不知而言之。是謂昧理。知而言之。是謂侵權。擁約法者。毋乃非是。夫宋君民國元勳。洞胸飲彈。凡屬血氣。悲憤填膺。然跡其奔走呼號。蒙艱履險。瘠口於民權蟄伏之日。櫟軀於國會蟬蛻之交。何非爲全國生靈共謀福利。逝者已矣。來日方長。同屬國民。尤當鞏固共和。維持大局。寧可以宋君殉全國。不可以全國殉宋君。必欲激於客氣。搖及人心。罪案尙未成。惡聲安至不反。設一旦演成慘劇。玉石俱焚。莽莽神州。同罹浩劫。既違諸公復讎之願。又豈慰宋君革命之心。至借款一事。尤有當加討論者。清室不綱。庫儲如洗。賠款外債。積壤成邱。民國處凋敝之餘。當建設之際。萬緒待興。一籌莫展。借賞濟急。亦固其宜。南京比款。已開

先例一年以來情勢愈迫，丁斯危急，但求其保存國體，監督用途，忍痛含辛，力圖懲必。據黃先生所質問，與財政部所宣布者，條件內容，尙多出入，果如財政部所云，借款大綱已經參議院通過，自不能僅以一偏之見，作爲廢案。即使條約遷就，損失滋多，亦當責議院以喪權不能罪政府以違法。議員俱在，檔案可稽，溯本尋原，豈難徵信，抑元洪更有進者，當此債權交逼，政費日繁，中央困於索逋，各省疲於告急，即無外患，猶有內憂，前帝專制自逞，民族不張，猶可假借款之問題，作革命之財料，今者共和已定，休戚相關，果使有碩畫盡謀，堵持危險，操推行盡善之券，爲緩急足恃之資，亦何難強政府以相從，貽國民以無畏，不然不借則我國既無良方，欲借則外人豈能讓步，破產之禍，如火燃眉，縱政府止渴飲鴆，鑄茲大錯，亦惟本和衷之念，籌救濟之方，內定人心，外全國體，若遽爾飛檄四布，全案推翻，其危言義憤，固屬可欽，然債務不清，兵禍相繼，能保外人干涉財政乎？能保外人不實行瓜分乎？哀哀波蘭，昭昭覆轍，淪胥之慘，損失之多，以後方今，奚翅倍蓰，言念及此，可爲寒心，夫養指而失肩，仁者所不取，跋胡而蹙尾，智者所不爲，以興邦之言，造亡國之史，此元洪所椎心蹙額，泣下沾衣者也。總之正

式政府。尙未告成。臨時政府。自當承認。借款之案。稽之於議院。刺宋之案。訴之於法庭。我等或膺閩寄。或典疆符。或秉言權。或標政職。均持鎮靜。免陷危亡。不然外人方遞國書。認民邦。而我等反以移文顛政府。自生自戮。自種自鋤。救國之謂何。得毋名與實相乖。而果與因相反歟。元洪一介武夫。謬隨諸君子之後。親握義旗。名譽旣淡。然若忘權利。更夷然弗顧。惟念天步艱難。民生凋敝。商帛於市。農望於途。寡女泣於空閨。遺孩號於大澤。茫茫禹甸。將成殺場。子子周黎。已無生氣。常恐以藐然一身。變爲罪首。力所能濟。但求扶持邦本。保衛地方。既不屑迎合意旨。作政府之私人。亦不敢破壞紀綱。爲國民之公敵。一息尙存。此心不死。黃帝陟降。實式監臨。風雨同舟。尤祈共濟。各省都督民政長。辱託比鄰。夙同患難。諒必哀彼黎庶。共此素心。誰非胞與。寧忍愀然。各政黨各議會。自任救時。更多俊彥。尤望統籌全局。協力維持。若或持激論。致啓爭端。同室鬩牆。將無瞧類。兆民之災。度亦非諸公之福也。其亡其亡。繫於苞桑。臨電哀鳴。血隨淚盡。

致中央及各省調停國事

湘贛皖粵四都督微電。秦晉直奉魯豫甘黔桂吉江十一都督元皓兩電。均悉。此次借

欵宋案風潮震盪幾擾全局。在四都督傳聞失實。容有措詞激烈之處。在政府大度包荒。亦有慘澹維持之隱。若全國紛擾分門爭執。既恐傷同僚之感情。亦似失中央之威信。我等同縮疆土。互相維繫。尙望十一都督共息責言。四都督同遵軌道。推誠締好。相與有成。大總統有督率上下之權。有維持民國之責。尤望保持統系。消遏禍萌。痛切陳詞。毋任盼禱。

致各省報告調停贛事意見

前爲贛事宥電。有由都督議會公派代表往迎民政長蒞職一語。係爲調停各方面意見。聯絡地方感情。修好釋嫌。藉省隔閡起見。並非以此事交議會議決之謂。行政官吏當然由總統任用。況已經任命之民政長。省會更無討論之理由。所慮誤會前言。致生波折。殊非元洪維持國制鞏固政權之本意。爲今日計。惟有直接開誠相見。或能速了。斷不宜牽涉他途。轉滋糾葛也。特此申告。統希亮察。

致救國社

逕覆者。接誦來函。並救國社簡章。於鼓舞民氣之中。寓維持秩序之意。穩健和平。曷勝

欽佩。現在邊防緊迫。非有實心愛國之人。聯合政團。一掃近時招搖影射之弊。決難收全國一心之效果。諸君血誠救國。發起斯社。深所贊同。引領前途。願共努力。專覆。順候時祺。

致各省聲明同袍社解散事

前清季世。哥老會黨。倡爲山堂口號。私相結集。鄂省亦所在多有。據稱係洪楊餘黨。因光復未遂。轉而爲此。起義以後。該黨始公然出而響應。共和初定。時爲綏靖地方起見。舉該黨在省城創設同袍社。匡以名義。明定章程。吸收同類。俾資約束。經年以來。該社亦尙改良習慣。顧全名譽。惟國家政令統一。會社名目。例應取銷。現據該社長等。自請解散。並呈明此後。如有假該社名義。在外招搖滋事者。請以軍法治罪等情。業經敕部督批准。並出示通告所屬各在案。誠恐有假竊名號。私在鄰省地方滋擾情事。應請一體查究懲辦爲荷。特此奉告。

致湯蟄仙張季直二君

太炎雲階仲仙諸君來鄂。甚慰鄙懷。擬屈台從惠臨。籌商一切。亟盼惠復。幸勿吝玉。

附湯蟄仙復電

祇奉簡電。仰挹冲懷。北海知劉。詎非厚幸。當票嚴命待發。家君執不放行。謂庚子夏間。特往江寧。冒昧以贊互保之議。前年秋暮。曹承浙乏。倉皇以解種族之圍。大倖安可屢徵。不越何堪。幾冒且既遠政界。復與政談。自顧究有何能。此行太嫌無據。潛踪踏久之。識固不足借箸而籌。理又不便絕裾徑去。況有諸老閱亮。瞻言百里。兼顧雙方。必能輔公以定折衷之論。立闕市之平。密啓中央。冀回末劫。人之愛國。誰不如我。鵝蚌徒利於漁翁。蟲沙易化爲流寇。南市緊迫。即無兵事亦足召亡。此則潛所日夕大憂。計全國無智愚賢否。均能察見癥結。而不待潛之故作危詞。責其一得也。頃悉唐前總理適來滬。內外關繫。極好調人。唯公圖之不克。詣前。諸求鑒宥。

致各省請重申禁烟

大亂初夷。首在培養元氣。新機旣啓。尤宜搜剔病根。禁烟一事。前清季葉。辦理尙屬認真。民國誕生。干戈擾攘。禁令日漸廢弛。前准外部及改良會丁義華等。先後來電云。上海土價飛漲。內地吃食日多。已報禁絕省分。現復紛紛播種。致英使將原允停運之議。忽然翻悔。事關自強要政。又攔入外交問題。應請大總統明發通電。重申禁令。並飭下院部於限滿再犯。報淨復發。另訂懲治專條辦法。一主嚴厲。便全國皆知畏憚。外人無

所藉口。庶幾歷來痼疾。可以一朝剷除。否則仗租界爲存儲寶藏。藉燈館作秘密集合。滋難圖之。蔓燃已死之灰。事後補苴。殊費手續。除已飭鄂屬認真查禁外。尤望各都督民政長。同申誥誡。一律嚴禁。轉弱爲強。布新除舊。與民更始。端在此時。迫切陳詞。願聞明教。

致參衆兩院請速舉長

國會成立。瞬屆浹旬。議席虛懸。中外人民期望至急。一日無國會。卽一日不能行使人民之主權。政府無從發生。列強不能承認。時勢變遷。事機危迫。無論何種方法。總祈首先舉定議長。俾得早日開會。以固邦本。而安人心。不勝急切待命之至。

致進步黨維持黨務

內訌外患。迭起環生。非有穩健政黨。決難救國。決難自存。吾共和統一民主各黨。內感於政見之相同。外迫於時勢之危險。毅然合併。斷不容絲毫權利之念。攙雜其間。元洪自去年以來。本此目的。慘淡經營。會屢派代表孫君堯卿。竭誠磋商。幸私願克償。大黨成立。茫茫前途。或有轉機。諸公熱心黨務。當同慶幸。竊惟政黨首重人才。決非囿於一

隅。徇於偏見。所能制勝。元洪猥以孱庸。謬膺重任。朝夕求賢。惟恐不及。常恐海內豪俊。棄我如遺。豈宜以已成之局。更行破壞。動搖事體。離散人心。前有少數黨員。因意見未通。輒宣共和黨不會合併。元洪再三勸解。頃鄂共和黨支部派員赴京。磋商一切。元洪復面加訓勗。當不至有決裂之虞。尙希同舟共濟。毋事紛爭。致爲他人所竊笑。本黨幸甚。

致進步黨策勵共維大局

進步黨成立。元洪謬被推爲理事長。自維才力綿薄。常恐弗勝。惟國步方艱。諸待建設。非合穩健分子。同心一德。不足以策進行。三黨主義素同。自應結爲一體。此次合併之舉。適符初志。逆計大局。裨益宏多。執鞭相從。實所深願。元洪樹國家前途之計畫。皆將於新黨是望。自當以愛國家者愛新黨。踴勉從事。弗知其他。願我同人。努力偕行。共肩重任。倘以鬩牆之費。門戶自分。同室操戈。授人以柄。匪特非元洪投身政黨之意。亦非諸君組織政黨之心。元洪與新黨爲一體。力所能逮。靡敢告勞。矢忠勿渝。希共察鑒。

致進步黨本部

卅電悉。本黨開成立大會。到者既多。梁張伍那孫湯王蒲數公。皆久有天下重名。諸賢雲集。妙譽騰馳。此皆籌備諸君子半年以來奔走號召之力。始有此莊嚴燦爛之現象。元洪謬荷公推。得以與於盛事。謹距躍三百。爲中國大局幸。爲本黨前途幸。

覆陸軍部

艷電悉。少年新進。管理宜嚴。習慣不良。流弊滋大。逾限除名。具有深意。有關風紀。敢不贊同。

附陸軍部來電

養電悉。前准夏民政長電。爲軍官預備兩校。暑假回籍生請假。當經覆電謝絕。緣該生等九號前不能趕到。即應先期請假。九號後本部又宣佈寬限十日。即鐵路中斷。應由海道趕赴。否則請假亦尚可。乃一再自誤。若曲予收錄。既與逾限開革部令自相牴牾。並恐爲後到者藉口。今承電示。本應遵命。惟有前開情由。且該生等遷延不赴。迹近玩視部令。目下學生驕氣。幾於不可遏抑。倘復特別通融。必致純良者相率效尤。貽軍界將來之害。况他省請展限者。亦均未准。鄂省事同一律。方命之處。尙希原鑒。

致大總統請慰留夏民政長

現署湖北民政長夏壽康，諳練篤誠，和平謹節，到任半載，衆論翕然。現因時事艱難，力求退避賢路。元洪查酌情勢，萬難照准。惟該民政長去志甚堅，特懇明發命令，加以訓勉，切實慰留，湖北前途，同臻幸福，盼切禱切。

致兩院及各黨預辭正式總統

國會密邇，庶政紛繁，選舉總統，尤關重典。溯自義軍肇興，舉國震盪，南北激爭，互懷猜忌。壯轉四方，老填溝壑，國家元氣，摧喪無遺。幸賴袁總統之幹旋，孫總統之遜讓，始得戎衣底定，宣布共和。彌歲以來，政府皆推誠布公，內弭黨爭，外攘邊釁，艱難締造，慘淡經營。然而亂黨猶且滋生，鄰邦尙未承認者，則以閱時之太暫，而收效之未宏也。方今蒙蔽風雲，波詭雲譎，宗社餘孽，乘機思逞。六國借款，讞信要盟，禍患之來，間不容髮。環顧國中，瘡痍滿目，兵不用命，民不畏刑，亂象環生，倍歷清季。編戶之氓，方相與吞聲飲泣，以斬正式政府之成。總統一席，豈惟寰球耳目所關，抑亦全國身命所寄。匪任重致遠，曷圖保全。匪就熟駕輕，曷資因應。五中焦灼，若望雲霓。乃遠道不察，頗有馳書垂問，欲相推舉者。雖不虞之譽，出自衆情，而無因之投，彌增隱痛。伏念元洪外縮戎行，未嫻

政治屬武漢舉兵。謬相推戴。乘時策運。遂領疆圉。嗣以海內人傑。妄自比附。沉機默運。智深勇沉。洪不如袁。項城明測事機。襟懷恬曠。洪不如孫中山。堅苦卓絕。壹意孤行。洪不如黃善化。光復以來。覩顏尸位。賞不足以安勛勳。罰不足以儆兇邪。成效未收。謗聲日至。如天之福。屢危復安。清夜自思。既慚且悚。祇以受故鄉父老之託。當中原縮轂之衝。一髮偶牽。全身皆動。忍辱負重。未敢告勞。夙昔拳拳。惟有默祝生靈。早登衽席。果使總統得人。國基鞏固。洪雖無狀。猶當率江漢子弟。維持南服。擁護中央。揚大漢之天聲。償平生之夙願。倘或有少數議員。垂愛個人。貽誤全局。在元洪爲損友。在民國爲罪人。惟有解甲歸田。長辭都市。惟天與日。實式憑之。敢布腹心。伏惟矜諒。

致大總統國務院報告季雨霖謀亂情形

近日鄂軍遵辦改編退伍。匪徒乘機倡亂。宣言推翻政府。私舉文武各官。徧送傳單。証券專收。退伍軍人。許以官祿。約期舉事。其已歸編制。不應退伍之兵。彼亦煽惑退伍。以削官力。而厚匪勢。所幸破獲尙早。疊據首要各犯。供稱季雨霖曾尙武爲原動。發起。並給黨人熊秉坤爲已經聯絡人。證據極爲確鑿。查季雨霖原充第八師師長。尙未交卸。

前月由省赴仙桃鎮師部。據查不知何往。曾尙武原充寶塔洲稅局總理。交代後。既不來省報銷。並且捲逃鉅款。熊秉坤原充旅長。甫經給資退伍。查無蹤跡。以致軍法處無從傳訊。該員等如果清白。乃心當此事涉嫌疑。自應早求剖白。乃或則擅離職守。或則聞風遠颺。即謂罪案未成。實已有玷官箴。喪失身分。除呈請大總統。先行免去勳位職官。以便歸案訊辦外。爲此通電布告。著限該犯官等。十日爲期。自行回鄂投案對質。有無其事。鞠訊自明。如係虛誣。尙當爲之昭雪。並可酌量情節。請復原官。倘仍恃符抗匿。逾限不到。則是情虛畏究。甘爲戎首。惟有懇請大總統。飭下院部。暨各都督民政長。交涉使。通飭所屬軍警。懸賞緝拿。按律治罪。以肅軍紀。備叙公誼。不勝急切待命之至。

致各省通告鄂亂情形（二）

本月二十四日。據報上海總機關。派人赴鄂。運動軍隊。機關在漢口。民國日報館。當令飭軍警會同法捕。搜獲證據。內有宣告湖北獨立。組織北伐軍。請各省協應。並起義宗旨。軍人條例等語。文電布告多件。并拿獲編輯曾毅等四名。交法捕房拘禁。查據會審供認不諱。各在案。隨即按照警備區域。臨時宣布戒嚴。派兵分段巡緝。本月二十五日。

探息亂黨機關多處。約於二十五夜。在省城南湖地方集合。口號成城。旗幟袖章均用白布爲號。經鄂軍輜重團拿獲爲首指揮人王泉明。幫同指揮趙大滿等三十名。甯軍第二團一營四連。拿獲陳金標羅漢臣等十八名。飭據軍法會審。王泉明等供稱改進黨在鄂起事。有代表鍾姓。併退伍黃姓。說是軍隊。多在聯絡南七省。都要動手。叫我等招兵。到南湖集齊。約一點鐘進起義門。併有某議員等多人主持等情。復據黎師長天才呈報。職師駐紮造紙廠後靠河邊。念五夜四鼓時。衛兵見有西裝兩人。扒越後牆入營。搜獲手槍四桿。子彈一百顆。又在牆外捕獲接應三名。捕時將手鎗炸彈拋棄河中。據供越牆爲時。倚方安漢兩名。牆外爲鍾仲衡。何作儔。黃天監三名。係由湖南江西廣東省來鄂運動軍隊。舉行暗殺。因欲推倒政府。故行二次革命。昨在東洋租界松迺家。九原公館。商定。夜三點鐘開船。到造紙廠運動軍隊。併云革命機關。無處不有各等情。當此戒嚴期內。亂機四起。情勢危急。已獲各犯。未便久稽。致滋變故。業經循據確供。按照軍法分別處決。本月二十六日。復由交涉員軍警會同德捕在漢口德租界日本所開富貴館。拿獲宵調元熊越山兩名。搜出日本鈔票三千餘元。銀洋三百餘元。名册一

分內分担任軍事。調查聯絡會計文牘庶務各科。并支付各種帳目一本。內有派人赴荆沙田鎮及鄰省等處。川資其甯熊兩名。業交德捕房拘禁。復在法租界伊達醫院第六號。抄獲旗幟多件。復探悉是夜口號忍耐。乃由起義門入攻。城內放火接應。本夜城內外三處放火。均經次第撲滅。查此次謀亂。導源上海。蔓延各省。而以佔據湖北爲根據地。并據供稱有外國兵船。爲其司令機關。帶固根深。已非一日。自維薄德。既不能輯奸宄之心。復不能安商民之業。至武漢三鎮風鶴頻驚。幸仗諸公之威。屢次破獲。慚悚何如。現在地方安堵。堪紓廛注。除一面仍嚴加防範。并呈明大總統外。特此電聞。再近日亂黨派人聯絡鄰近各省。往來不絕。并祈譚柏張各都督。歐陽護軍使。陳司令官。嚴密查緝。以保治安。全局所關。匪徒鄂人拜德已也。

致各省通告鄂亂情形 (三)

感電計達。此次亂黨擾鄂。勢雄計毒。較前愈烈。武漢等處機關四布。勾煽軍隊。招集無賴。萃於南湖。以攻起義門。以城內四處放火爲其接應。上游一帶。前岳口麻洋潭漲集港等處。所駐各營。同時兵變。均扯白旗。勒索水警槍械。劫奪縣署庫款。開放盜犯。擄掠

船隻自仙桃鎮以西。漢陽下游一帶。則派人勸測塘堤。擬決江水。以淹黃廣。使留駐北軍。同爲魚鱉。不惜以七縣生命爲殉。蓋異種相殘。亦無若是之酷者也。幸仗諸公之威力。將士之先事預防。次第撲滅。而公私無形之損失。已經鉅萬。當此民窮財盡。外患環生。舉國一心。猶虞不及。乃竟有元惡大憝。顛覆國基。滅絕人道。豈惟人神所共嫉。亦且虎豹所不容。元洪一年以來。顧全大局。屢爲含忍。上次改進黨之變。未戮一人。無非欲革面洗心。共遵軌道。乃陽竊革命之名。陰行盜賊之實。再接再厲。民不聊生。設使再事優容。何以對鄰省。何以對友邦。何以對無告之窮民。何以對起義之先烈。查此次亂黨總機關。設在上海。竊調元熊。越山季雨霖等。先後來鄂。攜帶鉅資。潛住租界。與詹大悲。鍾仲衡。彭養光等。分途運動。每以日本所開富貴館。松迺家等處。爲其合集之所。計在甯熊二犯寓內。搜出名冊一本。內開(一)空名(二)季良軒。卽季雨霖。(三)任調查者。鍾仲衡。鍾勛莊。(四)任聯絡者。鍾仲衡。溫楚理。楊子鬯。卽王鵬。趙鵬飛。彭養光。(五)任會計者。詹大悲。鄒永成。(六)任文牘者。曾毅。曾臬源。周覽。(七)任庶務者。溫楚珩。張秉文等。內鍾仲衡一名。因暗殺黎師長。天才被獲。正法。曾毅。周覽二名。已先在民國日報

館被獲。又在甯熊二犯寓內，搜出帳簿內開收入甯款季款等項，記載不明，其支付運動軍隊川資、武昌彭臨九德安張南星荊州楊子營各二百元、陽夏鍾仲衡三百元、田鎮劉仲州八十元、河南鍾勛莊五百五十元。此外冊列各名，經手支付千百十元不等。並尙存日本鈔票三百餘元，證據確鑿，無可掩飾。復據王泉明等供稱，在漢口會見姓鍾卽鍾仲衡，住在外國兵船，他說是一動手南七省都要動手的，他令我招兵等語，并先查獲民國日報館告白布告多件，其餘證據尙多，不必宣布。現甯熊二犯尙留德國捕房，曾毅楊瑞鹿成希禹周覽四犯尙留法國捕房，已飭交涉員請其引渡。其匪首詹大悲等十餘犯，由日本人保護乘岳陽丸下駛，該船抵九江時，疊據耿代鎮守使陳司令等報告，確見在岳陽丸有洋兵數人保護，船主不允捕拿，不待上下貨物卽行開輪等語。其餘要犯亦均四處逃竄，勢必仍潛集上海，捲土重來，慶父不除，魯亂未已。應請大總統、國務院飭下各省都督、民政長、護軍使，將以上冊開各犯懸賞購獲歸案訊辦，以杜亂萌。並飭外交部與各國公使嚴重交涉，不得庇護亂黨，擾害公安。大局幸甚。元洪德薄能鮮，弭亂無方，風鶴頻驚，實深慚愧。惟念自起義以來，對於政府則擁護統一。

對於民國則鞏固共和。固不敢開中央專制之萌。亦不忍見地方分裂之慘。前此推戴南京政府。此志生死不移。若同室操戈。甘爲戎虜。雖三尺豎子。猶知不可。苦心不諒。夫復何言。諸公老成謀國。當必同此悲憤。共矢素心。臨穎禱盼。不盡所言。

致中央及各省宣布寧熊謀亂確據

接劉總長先後來電。保寧調元熊越山二人。均悉。查甯熊二人。同屬漢口德租界。日本人所開富貴館內。携帶鉅款。勾結軍隊。由交涉員軍警會同德捕前往緝拿。在甯調元皮包內。搜出名冊一封（中略）並現存日本鈔票三千餘元。銀元三百餘元。皮包由德捕頭親啓。一切證據。現均存德捕房。甯調元親爲罪魁。實無可掩飾。熊越山同爲伴侶。亦確有嫌疑。此次亂黨謀鄂。聲勢浩大。二十六夜。省城縱火焚房。至七八處。已經三處成災。漢陽派兵渡江。至三四起。上游一帶。同時兵變。下游則勘測堤岸。擬掘江水。幸先時預防。不至破壞全局。爲諸公憂。諸公謂甯熊二人。熱心國事。奔走有年。元洪亦耳其名。誠不料甘心從逆。破壞共和。一至於此。讀廣東陳都督東電。深爲痛惜。諸公飭將開釋。或係不知內容。現正要求德領引渡歸案。訊辦。務期無濫無縱。以副雅命。惟劉工商

總長單銜來電。有南北漸慶和平。似可不再牽累。敝處一面轉呈總統等語。區區之愚竊所不解。元洪自起義以來。但知有民國。但知有共和。不知有南北。若謂分地域。則元洪亦爲南人。若謂慶和平。則元洪實求平靖。元洪承政府之命。受國民之托。但期擁護共和。剷除亂黨。天職所在。雖親不撓。果係無辜。雖仇不累。此次各犯供詞牽涉多人。元洪以證據不完。概不連及。蓋於懲辦亂黨之內。仍寓顧全大局之心。如若甯調元等。証據確鑿。何至謂之牽累。上次改進黨之變。未戮一人。無非欲革面洗心。共遵軌道。雖不敢自謂仁慈。亦何忍稍事殘酷。又何至飭其不再牽累。倘此種放火掘水之事。發於珂里。祖宗邱墓。寧忍恣然。大總統雖有特赦之權。然必俟訊明判決。呈候核辦。所謂面呈總統。意欲何爲。必謂此案有冤。不妨提京審訊。以昭公允。元洪對於忠告之言。惟有刻骨銘心。更何敢強顏置辯。惟雅不願加此大題。彼此惡名。知我罪我。付諸公論。臨電待誣。無任主臣。

致中央及各省通告季雨霖等犯案情形

查此次湖北軍官季雨霖。曾尙武。熊秉坤等。煽惑軍人。倡謀內亂一案。前因季曾等擅

離職守。携款潛逃。抗拒不交。經於青日通電。限期十日投案對質。否則通飭緝拏。旋於咸日通電。請中央各省派員會審。是日奉大總統令。先行褫奪季熊曾等勳位官職。歸案查辦。由鄂省組織軍法會審。提集一千人證。訊明呈請分別懲辦。復於巧日奉大總統電轉飭遵照前令。飭季雨霖等遵限投案。詳加研訊。分別發落。仍將詳供宣示等因。各在案。現在限期已過。此等要犯重案。勢難久懸。本都督業經遵令。組織軍法會審。懸案待質。該犯官等逾限不到。即係情虛畏究。前案默認。既已供證確鑿。自可照章缺席判決。請令執行。惟念該犯官等曾共患難。不無勞勩。著再展限十日。令其投案對質。予以呈訴之權。以示寬大。俾國人曉然於本案事理之是非。或共諒元洪不遺故舊。不濫法權之本意。如再踰限不到。則是自願喪失陳訴之權。至會審判決。呈奉大總統核准以後。無論如何陳訴。斷不能發生效力。國家惟有執法相從。元洪亦不能因私情而廢公誼也。至本案供證。一俟對質定讞。自當遵令宣布。刻下案情未定。供詞甚多。例不發表。惟現獲容景芳管新源王光漢各犯。均係陸軍官佐。與季曾等直接承辦之人。軍法處均係侍立審問。絕未沿用前清跪訊刑訊陋習。毫無強迫。所供季曾等各給鉅款。主

使租房購券，制定暗號字碼，聯絡軍人各情，均有摹印親筆各供，彼此同聲，前後一致，證據確鑿，合先電聞，免至傳聞異詞，誤生疑慮，並懇中央各省，飭登各公報，俾季曾等知悉，爲荷。

致各省爲季雨霖事

准柏都督文蔚通電，不勝駭異。元洪前日青電，係因犯官容景芳等口供，季雨霖曾尙武爲原動發起人，併各給鉅款爲租置房屋購辦證券之用，供詞甚詳，電難盡述。犯官尙在，非可示誣，法律手續，虛實均應傳案質訊。乃季則擅離職守，曾則携款潛逃，軍法處無從傳訊，重犯要案，未便久懸，無已乃有呈請免去官勳，通告限期投案，如有虛無，當爲昭雪開復等語，平情論事，自問不爲過也。不意來電不察，輒以張方案爲之比凶，並謂以辦土匪事加罪季曾諸人，輕聽人言，誤傷士類，因意見不合，構成疑案，興起大獄，請將佳電取消，並通告海內，以誤聽之故等語，信如所言，則直妬賢害能，殘忍嗜殺之所爲。元洪雖愚，抑何至此，不知青電，但稱匪徒，並無土匪字樣，加罪季曾者，係被逮之步兵中校容景芳等口供，並非誤聽人言。當此案未破之時，武漢一夕數驚，居民遷

徒商旅裹足。直至破獲始得安甯。皖鄂相去僅一日水程。事之虛實。不難查考。即不調查事實。亦須詳覽電文。人尙未到。案尙未訊。何得以外間揣測之詞。遽爾通電取消。談何容易。國家治亂安危。全賴法律爲維持之具。法律平等。無論有無官勳。賞罰則同。民國成立年餘。正患有賞無罰。循此不變。將成一麻木不仁之政治。讖者均引爲人心世道之憂。諒我執政諸公。各有治亂安危之責。對於此種密謀煽亂。供証確鑿之案。未必忍而出此。果如來電所云。取消前案。則有官勳者。可以犯去。密謀煽亂者。可以無罪。罪犯之供證無效。法庭之質訊。可以廢除。司法軍法各機關。皆可不設。如此尙有存在之國家乎。至上年張方一案。正係未經軍法審判之手續。至啓羣疑。浹月經旬。浮言盡消。並無震動全國之價值。則依法質訊。非昔之比。諸公手造民國。自當以維持國家治安秩序。保護人民生命財產爲前提。當茲急難危疑之際。所望主持公道。鎮定事機。慎勿不顧事實。輕信浮言。誣毀個人名譽之事。小貽誤國家全局之害。大尙祈共矢公忠。化除私見。根據法令。仍飭季雨霖曾尙武等到案對質。以微虛實。如慮鄂省審訊不確。即請大總統飭各院部並各都督。各派上級軍官一員。來鄂會審。以釋羣疑。元洪斷不願

季曾等確有是事。以爲鄂省軍官之玷。如果仍舊抗匿不到。正如來電所稱。搆成疑案。季曾等將終身無以自解。柏都督肝胆照人。素所契慕。此事雖傳聞失實。不能不詳實陳明。然古誼忠肝。要當私心感激也。專此布臆。敬侯公裁。

附柏文蔚爲季雨霖解釋電

自張方案發生後。全國人心浮動。險象環生。賴大總統副總統威德素著。鎮攝多方。得免意外之變。而輿論紛紜。至今未息。弓蛇杯影。日有所聞。蓋身在局外者。不情局中之喻事。故負天下之重者。一言一動。必期與眾共見。寧屈己身以伸眾論。夫豈畏人言而甘自退焉。要求國是之得當。寰宇之乂安而已。共和新建。百端待理。內憂未寧。外患迭作。我大總統副總統。憂勞惕厲于上。各省都督輔車夾持於下。羣一國之人。欣欣然得脫離專制絳軌。期共進於無疆之休。文蔚不才。忝附驥尾。每奉中央之教令。誦各省都督之讜言。輒喜指南有針。得所從事。而環顧大局。內審人心。又竊竊殷憂。懼世變之未已也。近讀副總統佳電。以辦土匪事。加罪季曾諸人。文蔚誠恐有不得已於言者。使諸人而爲匪徒。歟。殺之不可以不盡。殺諸人而非匪徒。歟。則是輕聽人言。誤傷士類。天下人聞之。其以副總統爲何如人。懷才挾能之士。多不理於人言。往往因固見不化。多成疑案。興起大獄。持國柄者。於此等事。不可不加詳察。況際宋案未定。國會初開之時。黨論囂囂。莫衷一是。正宜示以鎮靜。坐弭流言。豈可輕爲舉動。授人口實。文蔚從諸賢後。主張急進。



黎副總統書牘彙編 卷三

五十二

輒斥儒者持重之言。以爲迂緩。年來閱歷漸深。客氣漸化。乃知得人心者昌。失人心者亡。往哲名言。不可易也。故邇者對於舉措各事。必求根據法令。順從人心。兢兢自持。不敢稍緩。以此自勵。更望我大總統副總統。勤求民隱。俯納人言。反危爲安。慎終如始。收天下之重望。爲民國之完人。俾將來修國史者。無所訾議。於其後。斯實出於至誠。並非與季會諸人有別項交涉。而爲之辯護。區區之心。天日可鑒。更請我副總統立將佳電取銷。并通告海內。以前此誤聽之故。日月之失。無損於明。禹湯罪已。輿也勃焉。全國安危。爲重。個人得失。爲輕。不避疑忌。特貢狂言。是否有當。伏祈指正。仰各省都督。有以教之。



黎副總統書牘彙編目錄

卷四

致李烈鈞規勸贛事

致大總統力辭贛督

致大總統力保歐陽武

致贛省議會

致贛省商會 附贛商會覆電

覆歐陽護軍使

致歐陽護軍使及各機關

致歐陽護軍使

致各省通告贛省亂事 (一)

致各省通告贛省亂事 (二)

再致中央致各省通告贛省亂事

致各省代陳司令報告贛事

致各省都督通告贛亂

致朱都督

致沈仲禮君

致各省都督民政長

致朱都督

致大總統辭兼贛督

致浙民政長屈賀任

致國務院及參衆兩院論議員公費歲俸

致共和黨預辭選舉

致共和黨本部並兩院議員推薦總統

致參眾兩院請速編制憲法選舉總統

致贛督李嘉勞

致政府國會請褒嘉商會

致政府辭受文虎章

致各省痛陳時事

致沈仲禮君允飭軍隊保護紅十字會

致沈仲禮君謝捐贛款

致參眾兩院辭臨時副總統

致兩院議員請速行選舉盛典

復寰球尊孔會

復四川都督胡

致各省通告就任正式副總統

副 總 統 書 庫



黎副總統書庫彙編目錄 卷四

致中央及各省通告憲法意見

致大總統及各省通告啓行赴京

致李烈鈞規勸贛事

此次湘粵皖贛四督電爭借款。原本於愛國熱忱。直抒己見。元洪曾屢爲剖白。中央及各省都督共釋意見。然猶未深信於贛省者。則以贛自去年以來。拒民政長。逐鎮守使。中央雖再三退讓。而贛則愈接愈厲。似專與中央爲難。遂致疑此次抗爭。亦爲藉端反對。且露師江表。列戍連營。尤非湘粵皖空言辨護者。可以比例。以致中央之欲撤換各省之請公討。傳檄飛書。一夕數至。元洪或婉言勸止。或暫不置覆。毅然以調停自任。非有畏於贛也。誠以國基漂搖。民生塗炭。戰端一啓。大局尙未可知。而鄂贛兩省。已罹慘劫。曾屢託使人。請公潔身引退。舉賢自代。蓋公辭贛督。則可釋前疑。公舉贛督。則可弭後患。乃區區之愚。不蒙矜納。適尊委彭顧問來鄂。不得已委曲磋商。以爲欲圖解決。必先表我公之心迹。破政府之疑團。而後可。故擬定三條。請達冰案。(一)請公聲明服從中央。(二)歡迎趙民政長。實行軍民分治。(三)九江鎮守使。由中央簡員接任。竊謂軍



人服從中央是其天職。可允者一。軍民分治。貴省既已實行。且趙身未履贛。與贛無惡。非汪民政長可比。可允者二。鎮守使一職。將來應否廢止。應俟官制之解決。此時相沿既久。王上將辭職。自由中央另簡。可允者三。彭顧問旅行之時。曾與約十日爲期。俟覆命。並電告中央。請俟十日。方謂委曲求全。必爲我公所見納。乃未奉中央曲允之電。已先接贛省否認之文。並請元洪電達中央。元洪不難遵命也。特以中央懲前毖後。若何措施。非元洪所能逆料。公既無充分之理由。又無實在之兵力。負隅自固。徒苦吾民。前者公屢電抗爭。皆以民利民福爲職。今若此。是以義始而以利終。以功始而以罪終也。天下後世將謂公何。聞公新招之兵。多不足恃。所部之將。亦多被疑。且贛省商民積怨者衆。特無機以發洩耳。疆場之恫不足憂。而蕭牆之禍乃可懼。一朝決裂。公豈有高蹈之路乎。夫以實力則如彼。以虛名則如此。貪個人難得之權。而以贛爲殉。仁者所不出。逞一時無聊之忿。而以身爲殉。智者所不爲。明達如公。何至出此。無亦蔽於羣下。墮其中而不覺歟。元洪與贛有比鄰之誼。與公爲患難之交。誠不忍公之往而不返也。故敢拭淚陳辭。爲最後之忠告。請公毅然獨斷。或允或否。即日明白宣示。俾元洪委曲

調停之心。可以告無罪於天下。現在中央各省文電紛馳。詰元洪以調停之效。責元洪以被人欺玩。元洪皆無辭以對。恐再或遷延。人民不我待。元洪敢保鄂軍決不與我公相見。至北方軍士。本隸中央。元洪一分陝耳。將來政府明發命令。既不能聯名反抗。自不能勒令歸休。前路茫茫。實難逆觀。惟有約束鄂軍。嚴保武漢。以符維持之意。我輩軍人立言。當直截爽快。公對元洪。尤無妨掬誠相告。幸無閃爍其詞。而仍令他種機關爲公作傳聲電線也。臨電曷勝哀痛迫切之至。

致大總統力辭贛督

奉國務院佳電。大總統令。任命元洪兼署領江西都督事。驚悚莫名。伏念任免官吏。爲大總統特權。元洪何敢置喙。惟江西既設護軍使。節制全省陸軍。復有要塞司令。節制江防。直歸陸軍部管轄。責任既專。號令自一。屬在腹地。援應亦靈。似無設都督之必要。元洪才力綿薄。謬專鄂閩。負疚已多。若榮命更膺。必致以禍鄂者禍贛。禍贛者禍全國。且尤人自效。何以爲解。此次勸導李督之語。何以表平日淡視權位之心。伏乞收回成命。即責成贛護軍使。要塞司令。官民政長。維持秩序。俾中央得收統一之效。公私交感。

肅此電辭。

致大總統力保歐陽武

大總統侵電國務院。元兩電悉。已電知歐陽護軍使。迅速赴南昌接收李前督移交印信文卷等件。無庸送鄂。所有都督任內應辦事宜。均由該護軍使暫代施行。以免延誤。如有重要事件。仍可電商敵處協助。查贛省屬在腹地。實無設都督之必要。且歐陽使擁護中央。顧全大局。忠信果毅。有良將風。此次贛省之事。使非該護軍使深明大體。持重不撓。早不知若何變幻。元洪相距最近。知之最深。匪特視爲贛省之干城。亦且引爲鄂人之保護。現在贛省之患。時局紛爭。羣疑四起。該護軍使自拔贛幟。節制全軍。全仗中央誠感之孚。信用之篤。心有所恃。乃能著力。否則謠譟叢生。內外抵觸。當事者身先受制。何能治軍務。懇大總統推誠委托。掬誠慰勉。俾該護使力保治安。以安贛心。而定疑亂。苟有差池。元洪敢代負責。鄂贛本屬一家。力所能濟。自當隨事磋商。聯絡一氣。固不在兼領督職也。是否有當。敬乞惠覆。

致贛省議會

元洪此次權領兼署，係爲疏通隔閡起見。且軍民既已分治，都督職權僅限於軍事方面，卽能蒞贛，亦無干預民政之理由。日前賀民政長到任，貴會表示歡迎，足見貴會始終以地方爲重，毫無成心。元洪實深欽佩。所有貴省應興應革事宜，希與賀民政長推誠相示，妥議進行。至地方官制，未經國會議決以前，在中央用行政維持現狀，諒亦不至輕易紛更也。

致贛省商會

黃肖儂君轉交佳電，備悉種切。田鎮爲鄂省下游門戶，所駐各兵專爲鄂境防匪保民之用，原與贛省無關。兩年以來，鄙人對於贛事無不力主平和，耿耿寸心，當爲共諒。任命官吏，其權操自中央，如何措置，未敢臆斷。然國家設官，總以保持地方爲宗旨，有利無害則可斷言。現在都督去職，大局已定，所稱救荒無暇，伏莽堪虞，各節自有民政長護軍使分任責成，不難徐圖撫緝。鄙人兼職之命，實出意外，業已通電力辭，但諠屬比隣，素承友愛，凡有可致力之處，自宜竭誠協助，保持公共安甯，業與貴省軍民長官遇事磋商，並派員前來接洽一切，希貴總會轉致各商會各安生業，毋聽浮言，則鄙人所

厚望也。

附贛省商會覆電

威電奉悉。遑即通知贛事瀕危。迭蒙解救。仲連排難。武侯開誠。盛德覃敷。贛尤受賜。凡有血氣。感不能忘。現在大局粗定。未息謠言。軍警同心。當無意外。尤幸我公兼領贛督。泰山在望。磐石無驚。惶悚餘生。何修得此。痍瘡滿目。公未忘懷。此後設施。應俟請命。致電依馳。無任禱祝。

覆歐陽護軍使

武密歌微魚各電均悉。連日長江一帶。亂機四伏。一發難收。元洪鑒於武漢等處機關林立。約期不爽。適接九江要塞陳司令急告。恐猝不及防。是以一面電商執事。一面調兵赴援。以期迅速。其愛贛之心。與愛鄂一也。明河皎日。可鑒此心。元洪雖愚。亦安肯於和平親睦之時。無端輕開兵衅者。現據報告。並無重要變端。已經電飭李總司令即日調回鄂防。以固吾圉。但船隻未到。軍隊未回以前。仍希轉飭潯軍併地方商民。無徒輕信謠言。致涉誤會。甚為至盼。此事雖誤於陳司令之一言。惟有速圖補救方法。元洪信公有素。決不令其為難。慎勿輕信辭讖。致該聽聞也。

致歐陽護軍使及各機關

此次聞警調兵赴潯。專爲防禦匪亂。其宗旨在對外而非對內。已經申明來意。電達在案。鄂贛各軍。當守兄弟朋友之義。有變則來潯協助。無事仍調回鄂省。事理攸關。至無疑義。萬不可誤信奸人離間之說。互啟猜疑。以致無事自擾。徒傷同氣。爲天下笑。惟連日疊接贛省官吏商民來電無事。是以有調軍回鄂之宣告。昨接陳司令電。稱湖口又有變端。當經電詢護軍使查明見復。日來請留請退。各執一詞。事機重要。不得不審慎求詳。應請諸公切實查明。會定辦法。及其湖口九江等處。確無變故。或護軍使各師旅兼負保護要塞之責任。李總司令即當刻日調兵離潯。仍在鄂境擇地駐紮。總之元洪以擁護國家爲前提。故不憚披髮纓冠之往救。倘或悞信謠言。操戈同室。元洪固無以對贛省。亦非諸君子所以保桑梓之本心。元洪一本大公。毫無成見。如何進止。敬候公裁。即祈會復爲盼。

致歐陽護軍使

近日亂機四伏。往往猝不及防。此次鄂匪東竄。即有來潯謀亂之說。適據陳司令告急

請援。有匪徒煽動約期起事等語。情詞迫切。當以要塞隸屬中央。薄防隱關全局。與其焦頭爛額。不如曲突徙薪。一面電知護軍使。一面電飭李司令。就近派兵赴援。以期迅速。及迭接來電。潯江並無重要事故。維時命令已行。兵已出發。未便中途反轡。轉擾軍心。現已到各兵。專爲防範外匪而來。既係別無變端。自應調回鄂防。以固吾圉。決不長此致令地方驚恐。長官爲難。業已飭李總司令即日開拔回防。該隊未拔以前。各軍士仍須交相友愛。偶俱無猜。慎勿輕信謠傳。致涉誤會。希即轉告地方軍民一體知照爲荷。

致各省通告贛省亂事(二)

歐陽護軍使魚日通電悉。冬日接九江要塞陳司令電稱。萬急贛省自李督去後。人心浮動。伏莽甚多。九江湖口。爲長江要衝。匪黨往來如織。防不勝防。近聞煽惑上下炮台。尅期舉事。台官中有爲其所動者。現擬不動聲色。將一二不肖臺官。調充他差。一面派員前往接事。將軍械收繳。奪其所恃。以杜亂萌。惟禍機隱伏。一發卽不可收拾。並聞匪黨挾帶鉅金。前來運動。務懇速派軍隊。及兵輪來潯。以資鎮懾。除電稟太總統陸參兩

部外。即日派員赴鄂。面請方略。俾有遵從等語。復接參陸兩部電開。奉大總統令。據九江陳司令冬電。九江湖口爲長江要衝。匪黨往來如織。近聞該匪黨挾持鉅金。前往運動。煽惑上下礮臺。尅期舉事。台官中竟有爲所動者。務懇電商副總統。就近酌派軍隊。及兵輪來潯鎮懾等語。除飭徐司令。酌帶各艦。先行駛往駐守外。望即酌遣得力軍隊。迅速開往九江。妥爲鎮懾等因。當以要塞直隸中央。潯防關係全局。在次鄂省亂黨供詞。原有贛省響應之說。機關破後。復探聞趨赴下流。據陳司令電稱。上下六台。尅期舉事。是其情勢危迫。可想而知。若待與南昌往返電商。誠恐貽誤軍機。一發難制。將來推援兵不至之罪。誰所敢承。且奉命專救長江要塞。與贛無關。度歐使必能相諒。適武穴駐兵。自歐使蒞任後。業由元洪調防漢沔。因于支日電。飭靳春李司令。酌派軍隊前往鎮懾。并一面急電知歐使。免生誤會。微日接李司令電。稱遵派二十三團附機關槍一連。先往九江。業已上船等語。隨即致歐使歌電云。昨電計達。北軍駐紮鄂境。甚資得力。本不願飭其赴贛。轉啓猜嫌。惟要塞直隸中央。游防隱關全局。前日鄂匪暴動。事敗遠颺。原有竄擾江西之說。復因陳司令聞變請兵。事急情迫。萬難忍置。致誤機宜。是以懇

調李軍赴潯鎮懾以爲曲突徙薪防患未然之計現已派二十三團附機關鎗一連於本月赴潯駐紮已飭約束所部互相親愛特請貴護軍使轉飭駐潯軍隊申明李軍來意專爲協助贛軍保護地方鎮遏亂萌起見當以賓友相待請卽訓飭潯軍優加敬禮勿啓猜疑一俟地方平靖仍當調回鄂境并祈布告居民一體知照該軍紀律嚴明其分駐武漢各軍絕無騷擾情事地方亦歡極迎併以奉聞魚日上午接歐使歌電請阻調兵隨復歐使魚電云歌電悉大兵入境以贛省情形而論在我公論誠具有苦衷惟此次派兵來潯實因事機危急情不得已現在匪黨四出運動軍隊希圖竊據險要地點以爲倡亂之基礎前日鄂匪東竄即有來贛謀亂之謠旋據駐潯兵艦報告探悉匪情并有三個月內推倒貴護軍使之計委員余大鴻等九江微電此間亦有煽亂機關等語適陳司令告急請兵深恐潯防兵力單薄鄂省又無別兵可派與其禍機猝發爛額焦頭不如先發制人徙薪曲突此元洪協助貴軍保衛地方鎮遏亂萌之本心并無他意現到一團不過暫駐潯埠尙望彼此誥誡軍士互相友愛無起猜疑如其查無匪情卽行調回鄂境原防決不久留贛境尙望轉告政學紳商各界解釋疑慮是所切盼

并立刻電致海軍部。請飭徐司令緩率艦隊赴潯。下午復接歐使微電。請阻調兵。復立刻電致靳春李司令云。調潯軍隊。其未開拔者。暫緩啟行。候察看九江情形。如確有亂事。再行馳往。否則毋庸赴潯。以免地方驚惶等語。陽日接歐使陽魚二電。稱北兵已至。請急予調回。并請辭職。復接陳司令電。可望消滅。請飭李司令駐紮九江北岸。藉以鎮懾。竊以元洪調兵之心。原爲鞏固江防。顧全大局。既據歐使屢稱九江無事。請予調回。自應允其所請。當即飛電李司令。即日開拔回鄂。萬勿再行進兵。致滋口實。並覆歐使陽電云。微魚各電。均悉。近日長江一帶。亂機四伏。一發難收。稍縱即逝。元洪鑒於武漢等處機關林立。約期不爽。適接陳司令告急。又恐猝不及防。是以一面電商執事。一面調兵赴援。以期迅速。其愛轡之心。與愛鄂一也。明河皎日。可鑒此心。元洪雖愚。亦安肯於和平親睦之時。無端輕開兵釁者。現據報告。可望消滅。經已電飭李總司令。即日調回鄂防。以固吾圉。但船隻未到。軍隊未回。以前。仍希轉飭潯軍。并地方商民。無得輕信謠言。致涉誤會。是爲至盼。元洪信公有素。決不令其爲難。慎勿輕言辭職。致駭聽聞。此元洪此次赴援要塞之事實也。查以上往來電文。均用密碼。翻譯稽時。致歐使通電有

未奉覆電。本日僅奉電告及軍隊到潯在先。副總統電到贛在後等語。現既撤兵回鄂。歐使所慮衝突。自可無虞。惟歐使自蒞任以來。擁護政府。保衛地方。匪特爲鄂省唇齒之依。亦且爲中央腹心之寄。雖此次阻兵入境。似未察要塞專司之義。中央統一之權。然保護安甯。初心可諒。元洪忝綰疆地。相依如命。亂黨方深。人才難得。挑端播釁。宵小如麻。稍一猜疑。蕭牆禍起。請大總統切實慰留。各都督同加勸勉。使與陳司令和衷共濟。防患未然。勿得遽行辭職。致將士離心。奸邪乘隙。反使潔身引退之心。無以自白於天下。臨電禱懇。無任馳惶。(庚)

致各省通告贛省亂事(二)

庚電計達。李軍援潯。實迫於陳司令之告急。嗣因歐使屢電。稱九江無事。請予調回。復據陳司令來電。亦稱可望消滅。元洪爲安靖人心起見。因電調李軍回鄂。正在整頓起行。適蒸日接陳司令電稱。萬急據湖口台官來潯報告。砲臺已爲匪黨所困。李前督烈鈞。現住湖口水巡總監署。計畫反抗。其私黨某某等。均樂爲用命。湖口一失。江西難守。務懇添派軍隊。及兵輪來潯。以救危急等語。當電知歐使。迅速查復。眞日接歐使來電。

已派員赴湖口密查。即當電稟。同日復接九江劉師長急電。稱湖口風聲益緊。歐陽護軍使調回機關槍。及世均開來護軍各軍隊。均被該處截留。瞻望匡廬。危急萬分。自愧軍隊單弱。不能前往鎮懾。至於九江城內。及租界各地方。世均已與陳司令劃清警戒區域。分擔保護責任。萬不致亂黨侵入。惹起國際交涉。貽誤大局。此則世均區區之誠。誠天地神明所共鑒者也。事機急迫。懇即電飭李總司令相機前進。無事兼顧潯陽。致分兵力。事勢危迫。急不擇言。務希速示方略。共拯危局等語。是湖口有變。情迹顯然。無可掩飾。元洪受政府之寄。忝領兼圻。自不敢見好一隅。貽誤全局。所有前次援潯軍隊。應遵大總統真日電令。暫緩撤回。藉資鎮懾。除電知歐使及李司令外。特此電陳。免滋誤會。(文)

再致中央及各省通告贛省亂事

庚文元三電。計達公覽。頃准程都督譚都督唐都督電詢贛事。併悉有南昌全體軍官名義通電各省。誠恐遠近傳聞失實。不得不剴切陳明。查上月亂黨來鄂。分設機關運動軍隊招兵放火。約期攻城。當經拏獲募兵炸彈旗幟名冊文電布告等件。併鍾仲衡

等各犯。其季雨霖舊部駐紮天門潛江兩縣之章裕昆之一營及二十一團一營同時於二十五六七等日改懸白旗。大張布告。招兵劫餉。連戰始潰。爲感卅兩日通電所未載。查取供證。早有贛先響應之言。及該匪等敗竄東下。復有佔據九江。推倒護軍使之諜報。元洪鑒於鄂匪勢雄計毒。適接陳司令電。上下六臺。約期舉事。請迅派兵赴援。並奉大總統急電。飭鄂派兵。元洪深恐一發難收。猝不及防。不得不遵命辦理。爲曲突徙薪之計。此就近檄調李軍赴援之理由也。李軍到潯。元洪即嚴飭約束軍士。毋啓釁端。嗣接歐陽護軍使電。力言九江安靜無事。陳司令微電。亦以先事防範。可望消滅爲詞。元洪深恐主客猜嫌。無事自擾。不得不服從輿論。決計退兵。維時李部各軍。已奉令陸續出發。在先鄂寄李司令電。皆由田鎮第六師司令部轉達。兵在半途。無從奉命。事實當然。可爲共諒。此宣告退兵。而不能立刻遽退之理由也。李師正預備起行間。旋接陳司令蒸電。劉師長真電。併水陸軍報告。探明李軍督率同外人四名。乘輪於八號到湖口。駐水巡總監署。私黨林虎方聲濤等。樂爲用命。計畫反抗。會同九十兩團。調去輜重工程兩營。滿布要點。勒令各軍官交出。並電劉師長速集湖口。分兵進逼金鷄磯臺。步

哨距潯甚近。歐陽護軍使由潯調回之機關槍兩連。劉師長由省調來之護衛軍兩連。均被湖口截留。方旅長聲濤前招新兵一營。由潯開往湖口姑塘等處。集兵至一師以上。業已宣布獨立。據歐陽護軍使查復。亦云李烈鈞到湖口。確係實事。已調兩團往攻。足見陳司令前次請兵。並非誤報。贛省所言安靜無事。併未調查實情。復同日奉大總統令。李烈鈞竟藉異族以私人擅集軍隊。勒佔礮臺。自係作亂行爲。李司令所部。現無撤退之理。飭元洪酌調六師後方各團及二師旅團。迅速赴潯。并飭歐使嚴束所部。勿聽亂徒指揮等因。並由中央逕電李司令遵照。此取消前議。留防不退之理由也。林虎所部第一旅。原係南京留守府護衛軍。由李前督調駐德安。突向李司令所駐之沙河鎮進發。李司令質問。歐便據復。並未下令前進。又緝去李軍繪圖生一人。槍傷同伴一人。據歐使電復。此事林未稟報。是其目矜將令。擅開戰釁。已在誅討之列。猶復扣留火車。截斷電線。據陳司令元電。十二日上午八時。林軍高豎討袁軍白旗。突向李軍攻擊。兩時之久。李軍始行還擊。歷一晝夜。林軍死傷二百餘人。我軍獲勝等語。足見孽由彼作。非我開。其中央派送江西護軍使印信之余大鴻等。據報被湖口僞總統府扣留。

且宣布獨立。高豎白旗。叛逆昭彰。亂謀久伏。此豈平常主客衝突者比。而猶得以構軍逼變爲詞乎。此援軍防剿叛兵之理由也。查該匪等私結外援。遍招舊部。以利權抵押爲財源。以謠言煽惑爲能事。鄂亂未成。去而之潯。據李司令電稱。九江原有匪黨極多。加以近日武漢穴連次破獲機關。益爲逃蔽。聞前此風聲鶴唳。一夕數驚。陳司令廷訓情迫無已。電請派兵。幸仗德威。純部已到。混成一旅。有奇。實出匪黨意料之外。未敢驟然暴動。第我軍到潯之始。猶復增加軍隊。扣留火車。以示反抗之意。經純迭電歐陽護軍使。並派員持函分赴九江各機關。詳爲剖白。相見以心。猶恐顧慮未周。人心惶惑。復於所到之地。張貼佈告。曉諭兵民。純今午抵潯。陳司令廷訓派員接待。各機關及各界亦極表歡迎。歐陽護軍特派參謀帶洋千元來潯犒勞。現時據表面判斷。或不致有意外之慮。純本輕材。謬荷艱鉅。倘能委曲求全。消除隱患。上可以仰副鈞座維持大局之苦心。下可以免贛省生靈塗炭之慘禍。區區之愚。未審能如計慮否。至昨懇增兵一節。乞飭準備。非萬不得已。不敢冒請開拔等語。是亂黨謀據九江之計。及李師維持大局之心。當可共見。幸防範迅速。未敢遽然作亂。乃甫下撤兵之令。遂豎獨立之旗。襲我

不意攻我不備。乘危攻擊。至於兩時。使李軍忍無可忍。不得不正當防衛。試問總統府與自何人。討袁軍義於何取。鄂省前次搜獲證據。即命名爲討袁軍。今竟高揭於贛境矣。果使政治不良。自有國會解決。乃當此一髮千鈞之際。蒙藏風雲。曾不過問。竟敢託庇外人。背叛民國。假改革之名。行攘奪之實。駢亂吾鄂。復亂吾贛。百兆生靈。擲諸孤注。事敗何以免列強分割之慘。事成何以爲外國報酬之資。試問吾父老子弟。何仇於亂黨。而必供其屠門之大嚼。此種元兇。當爲神人所共憤。天地所不容。猶復冒稱軍界全體。僞報連日勝仗。通電各省。希圖響應。其居心。尤不可問。李軍駐紮鄂境。歷有數旬。地方居民。向無侵擾。果如該電所言。何以歐使屢次通電。均未一述。北軍到潯。寢席未安。遽整歸旆。李烈鈞自滬返贛。計程亦須數日。何以北軍甫到之時。李烈鈞已來湖口。尤見逆謀有素。非臨時電請可知。查贛軍第一師長歐陽護軍使。已派兩團往攻湖口。並有以死圖報之言。第二師劉師長保護潯城租界。至以軍隊不能前往爲愧。兩公手縮兵符。維持統一。文電具在。足見贛軍全體之通報。全爲亂黨僞造。諒我各省忠義軍人。深明大義。斷不至爲其所愚。元洪對於亂黨。愧無感格之方。對於江西。空負維持之願。

使平日委曲求全之心。付諸流水。天乎天乎。夫復何言。李烈鈞以退職平民。竟公然稱兵獨立。破壞共和。爲德不終。深爲悲痛。查二六兩師。向隸中央。上次共進團之變。大總統調赴鄂省。藉資鎮攝。此次派赴九江。下迫於陳司令之乞援。上懷遼大總統之命令。嗣歐使屢電請退。亦既允其所請。並電請中央緩派軍艦。乃陳司令劉司長復電告危急。大總統復電止撤退。並飭李司令激勵將士。滅此醜類。現李司令已被簡爲九江鎮守使。責有專司。湖口方面。亦竟僭設總統府。妄稱討袁軍。是亂黨反抗中央。中央征勦亂黨。大局所關。決非鄂贛相爭之事。元洪處軍人之職。受國民之託。惟知服從命令。擁護共和名譽生命。皆所不計。竊見以湖口一隅地。而顧抗中央之師。其出無名。天倖不可屢邀。民心不可過拂。勝敗之數。無俟著龜。惟念我劫後生靈。填尸溝壑。軍界同胞。暴骨原野。及爾無罪。淪胥以鋪。何辜於天。遭此慘劫。弭我無術。咎在元洪。耿耿寸心。死不瞑目。應請正元洪之罪。以謝天下。臨電徬徨。不知淚之交墮也。諸公老成謀國。當必有深謀毅力。奠我邦家。引領鈴轅。禱何能盡。

致各省代陳司令報告贛事

(上略)頃據九江要塞司令官來電文曰。北京大總統府軍事處。呈大總統。轉參陸海三部各報館。武昌副總統。轉各省都督民政長。上海各報館。轉各公團。均鑒。前因江西人心浮動。伏莽滋多。九江湖口均爲長江要衝。匪黨往來如織。迭據調查員秘密報告。匪黨挾帶鉅金。來潯運動。尅期舉事。始請副總統派軍隊及兵艦來潯。以資鎮攝。請兵之初。以禍機隱伏。未便通知各界。及李軍統率師抵潯。各界不知底蘊。電請副總統調回正磋商間。匪黨公然起事矣。既舉前贛督李烈鈞爲長江總司令。復招柏文蔚前來湖口。指揮一切。宣布獨立。以湖口水巡總監部爲總統府。擬順取皖省。下駛金陵。組織新政府。贛省水巡總監何子奇。爲湖口司令官。印文曰。湖口守備軍司令官之印。其餘第一旅長林虎。第三旅長方聲濤。第九團長周璧階。第十團長李明揚。機關鎗營長卓仁機。前水巡總監蔡銳鏗。均授僞職。更由徐秀鈞輸來洋五十萬元。藉裕軍餉。乃竟高懸白旗。大書特書曰。討袁軍。聲勢浩大。遐邇震驚。爰於本月十二日晨。林虎先甘作戎首。卽率領所部進攻沙河方面之李軍。比越兩小時。而李軍始行還擊。歷一晝夜。迄未停戰。林虎兵則爲李軍傷亡約數百餘人。稍挫其銳。但釁端一開。民國前途。不堪設想。

廷訓統轄要塞。保守江防。本有專責。業經查出匪黨真相。告急請援。弭患無窮。分所應爾。非徒保衛贛省。實欲顧全大局。擁護共和。庶免陷人民於水火之中。地方糜爛。不可收拾。區區寸衷。當爲天下所共諒。知我罪我。公道自存。其惟諸明公詳察。謹此電聞。陳廷訓叩寒印等語。合特轉達。

致各省都督通告贛亂

疊接程譚唐蔡四都督電詢贛事。經於刪日四次通電詳陳。翌晨接九江陳司令電。亦經照轉在案。前日倉猝調兵援潯。實因該省確有鉅變。情跡未著。不便明言。所幸兵去甚早。使林虎之兵與湖口隔絕。潯城不至爲匪所據。現李烈鈞爲北伐總司令。林虎爲副司令。已高懸討袁白旗。林擅由德安進逼沙河。首先攻擊北軍。湖口截留潯贛所調軍隊。劫奪中央派送護軍使印信之余大鴻等。並有設立總統府之說。可見蓄謀已久。取勢甚大。必非主客兩軍嫌疑衝突之尋常事故也。查本年鄂省屢次破獲匪黨證據。及此次贛亂情形。均以討袁爲名義。以煽惑各省軍隊。嚮應爲後援。以土地利權抵押某國。接濟餉械。託庇租界洋場。爲入手辦法。並有洋兵隨行保護。洋員幫同謀議指揮。

而東隣某黨乘機煽惑。惟恐吾國之不亂不亡。彼計一行。瓜分立見。若輩以南北之意見。總統之權利。不惜將中華民國斷送外人。誠所大惑不解。夫選舉總統。權在國會。一兩月間。即可發表。若輩豈不之知。而顧出此勞民傷財亡國敗家之下策。毋亦別有所圖。超軼民國法定之外者。諸公手造民國。同處南疆。所望對於半壁。痛加忠告。以期早日和解。存亡所繫。間不容髮。惟我諸公實圖利之。焦急陳詞。千萬禱盼。

致朱都督

東電頃始奉悉。贛寧倡亂。浙當要衝。我公內撫軍民。外遏匪勢。經營慘淡。煞費苦心。祇以文電不通。內容難悉。中立之說。自係誤會。現在舟楫巨川。業經出險。善後辦法。定有勝籌。仍希不時見示。

致沈仲禮君

兵士受戮。生靈塗炭。藐躬不德。悼慊交深。天不厭禍。亂機驟發。贛境可望平靜。我軍不忍窮追。貴會人道爲重。應予組織醫隊。隨時救應。九江分會業已撥款資助。素仰高誼。毅力進行爲幸。

致各省都督民政長

連日戰事甚利。不難尅日戡定。此間軍心民情。均極安堵。貴省近狀何似。風傳塗說。易惑聽聞。嗣後擬彼此隨時知照近情。以通消息。而免淆惑。乞復。

致朱都督

馬電悉。執事砥柱中流。維持半壁。偉略雄才。極所欽仰。滬局昨戰獲勝。據探貴省已派他旅來援。甚佩高誼。滇蜀鄂黔防守甚固。西南無憂。湘軍集中岳州。譚都督曾以保境安民爲約。贛事本日已奪獲湖口西砲台。易於解決。張軍乘勝南下。寧垣勢難久支。日來謠譟繁興。惟望彼此嚴加防範耳。

致大總統辭兼贛督

李護軍親定贛亂。聲望甚隆。觀其入贛佈置各政。條理完密。恩威並用。其才識實堪勝任。疆寄且汪民政長趙宣撫使。皆爲贛人所信仰。善後諸事。措置裕如。元洪兩年以來。日處憂患之中。精神消耗過度。現治鄂事。猶虞不及。萬不能再問贛事。致滋貽誤。

致浙民政長屈賀任

東電誦悉。此次東南不靖。貴都督竭力撐拄。軍書旁午。日昃不遑。民政一端。現得貴省長一心辦理。整軍察吏。相與有成。造福浙江。佇臻上理。特慰並賀。

致國務院及參眾兩院論議員公費歲俸

連日接各方面來電。僉謂兩院原訂公費。及參議院自定歲俸。值此財源枯竭。國民不堪負擔。並屬轉進忠告。元洪竊以爲此項款額。與其他法制不同。姑無論美制法制。歲給日給。要當以本國財力。與夫官吏俸給。及各省議員薪公之規定。爲加減比例之差。考各國財政。美國歲入二十萬萬元以上。英國十六萬元以上。法國十四萬萬元以上。吾國歲入不足三萬萬元。至選舉議員。以人口爲律。吾國議員較各國爲多。而財政較諸國爲絀。此其不能援他國爲比例者一也。查吾國官俸。就中央言。惟各部次長月給五百元。與參議院議員現定歲俸六千元之數相埒。外省除都督民政長外。無盈此數者。刻因庫款空虛。尙在籌議削減。議院諸君。半負義務。員額多寡。亦迥不侔。此官俸之可借爲比例者一也。國會省會範圍。雖有闊仄。等級究無區分。查各省議員。歲俸約千元內外。議長倍之。兩院諸君。初處京華。服食較費。照省倍給。似屬相當。卽以前臨時參

議院爲衡。其時衆院未集。員額尙簡。亦祇月給三百元。此近今議員之可援爲比例者。又一也。前者五國借款。參議院反對。謂恐如埃及印度。積債亡國。實出於良心之主張。茲者國步艱危。更倍前日。湘豫皖贛。災歉時聞。衆苦獨甘。寧忍出此。兩院諸君。號稱明達。區區愚忱。唯採擇焉。

致共和黨預辭選舉

函電誦悉。正式選舉一節。早經通電宣誓。總統爲國之元首。御極居中。必其才足以制馭四方。力足以維持統一。當局身肩大任。戡定中原。攘外安內。炫今震古。華盛頓當平定南北。已正式受任。當局勳績。足與匹倫。徵之全國心理。早已一致贊同。望勿拘黨義。謬相推舉。元洪迂拙成性。與世無爭。但得長處於匡救調和地位。與五大族人民同謀樂利。爲幸實多。若復徇愛個人。致墮成局。則惟有擔筇携屐。徜徉湖山。決不與人間事也。雲天在望。特布腹心。

致共和黨本部並兩院議員推薦總統

大局顛危。列強環伺。正式總統。關係全國安危。袁項城雄才大略。富有政治經驗。自任

臨時總統以來。中外翕然。非舉膺繼任。不足以奠危局。撥逆亂。元洪推荐實秉大公。望本黨議員諸君。贊同斯意。一致進行。毋受他黨所搖惑。爲國民所唾罵。吾黨前途。更當日上。除通電外。專此奉告。

致參衆兩院請速編制憲法選舉總統

民國成立。已越一年。對內無統一之實權。對外無交涉之能力。因循泄沓。上下滔滔。開國之時。已成暮氣。憂時之士。羣歸咎於臨時政府之不善。環球各國。未有戰事久終。而猶以臨時之名苟延旦夕者。國會初開。美書首至。巴墨等國。聘使聯翩。譬如積年淫雨。忽覩微陽。海隅蒼生。喁喁望治。方謂議定憲法。選舉總統。組織強健政府。締造完全民國。共和之願。指日可償。乃爭議朋興。黨見紛起。根本問題。概未解決。推波助瀾。枝節叢生。遂使友邦尊重之念。變爲鄙夷。國人期望之心。化爲厭惡。以言內政。則亂民載道。伏莽載途。若火燎原。罔知所屆。以觀外交。則庫患方熾。茫茫邊塞。夜有哭聲。以觀財政。則收租蹂躪。借欺垂盡。冰洋戈壁。草木俱窮。以觀軍事。則餉械支絀。軍隊囂張。刮骨磨膏。坐供驕子。國民將國陳請。政府則諉以方更。政府苟有措施。國會則責其不待。此尙得

謂有國家乎。種必自滅。而後人滅。國必自亡。而後人亡。誰生厲階。至今爲梗。此真可爲痛哭者也。今更有甚於此者。贛亂發生。東南鼎沸。野心梟桀。圖竊政權。屠我名城。殲我良將。播遷我婦女。蹂躪我商民。虔劉異黨。則川谷爲丹。搜刮編氓。則山林俱赭。猶復鬼嫉朝陽。盜憎夜雪。誣詆政府。逆電紛飛。假敵國爲護符。挈齊民爲代價。視從前編訂約法之議院。則去比餽羊。視此後選舉總統之國會。則擲同芻狗。當此殘喘稍舒。真元未復。百年培之而不足。一日斲之而有餘。試問禍患所生。何莫非諸公遷延遲誤。有以召之。明知而坐視。是爲助亂。不知而坐視。是爲溺職。公等何以甘心棄天下乎。夫公等非他。乃將士授命。商民捐資。擲價以購之。代議士也。前年義師之起。遠者姑不具論。即徵諸武漢。童叢婦食。帶病扶喪。觀勝則雷歡。聞敗則雨泣。豈有他哉。蓋來日之生可樂。則今日之死亦甘。今國會已成立矣。而國家之阽危如故。人民之痛苦如故。墊隘流離。且倍清季。皇皇代表。寧不疚心。竊謂總統爲全國安危所繫。憲法爲立國強弱所關。呼吸存亡。間不容髮。豈兩院英賢。見不及此。設使舉棋不定。剖豆交乘。諸公寧有從容討論之餘地乎。爲今日計。應請將一切議案。概從緩議。同心協力。編制憲法。先訂總統選舉

之一則。即從選舉總統入手。或將憲法全部。從速制定。即行選舉總統。兩月之內。一氣呵成。國本既定。人心遂安。尤望於各種法律。內審國情。外斟世局。不泯近以味遠。不執私以妨公。不以久遠之法典。而箝制個人。不棄固有之精神。而盲從他國。折衷羣義。斟畫全規。從此總統得人。政府成立。既無掣肘之虞。亦免踰閑之患。五族共和。胥遵軌物。內外維繫。猶可有成。則是諸公大有造於民國也。元洪等對於國會。擁護不遑。敢言干涉。惟蒿目危時。借鑒往事。誠不欲以莊嚴燦爛之民國。陷入漩渦。況行政之籍。不屏乎要荒。請求之權。不遺乎輿皂。壞崩天壓。城火魚災。屬在患難與共之時。尤有涕泣而道之義。諸公如必欲絕中國也。昊天不弔。夫復何言。倘肯以悔禍之心。爲探源之脉。我邦人昆弟實禱祝之。元洪等忝爲公僕。敢不惟言是聽。臨電觀縷。不盡所懷。再國會爲法人機關。勿復以個人答覆。貽譏當世。謹以附陳。（各省都督民政長會銜）

致贛督李嘉勞

冬電悉虛光謙德。景仰莫名。然竊以爲過矣。公當贛亂之初。懸軍深入。艱難險阻。卒奏膚功。湖口一平。六省瓦解。幹旋之勳。當推第一。元洪曾迭電力保。至再至三。誠以酬庸

之見。國家所以勵戎行。寄命之專。國家所以資保障。非敢以同舟之誼。阿其所好。贛省餘孽未清。秩序未復。急欲重煩。盡略。藉觀全功。臥鎮北門。舍公莫屬。贛安則鄂安。鄂安則全局安。希望之殷。如同手足。患難相交。全仗知心之雅。干戈未息。尤非引退之時。公愛元洪。當必不忍遐棄也。務望垂念民生。顧全隣誼。力疾視事。毋復固辭。唇齒相依。當與我竭力同心。勉持艱局。章江引領。無任瞻依。

致政府國會請褒嘉商會

竊維此次變亂。醞釀經年。牽掣至六七省。耗損幾數千萬。乃時未兩月。以次救平。固我中央政府處變有方。神聖軍人。將事用命。實則人皆厭亂。天不佑奸。不韙之徒。其亡也忽。至於抵拒邪謀。主持正論。則尤以各處商會察輿情。從違之準的。查該黨倡亂。亦何嘗不以擁護共和爲徽幟。迹其對於商民。始雖託名保護。繼乃按戶搜括。獨立省鎮。現貨爲空。心毒計狡。直與劫盜無異。各省商團。預燭其奸。動色相戒。滬粵兩埠。通海最早。程度較優。故抗拒殘暴。亦最力。贛潯寧皖。商力較薄。曲從不甘。顯拒不納。卒因默示反對。使該黨籌款無著。失其後盾。至如湘謀獨立。亦因不獲商會之贊同。故宣佈最遲。取

消亦最速。是知戡亂之師。所至克捷。滔天之禍。轉瞬清夷。則我商民之大有造於民國也。因念前年鄂軍起義。武漢商會首表歡迎。此次厲階潛生。各屬商團全體反對。在該黨翼援昔以例。今乃商民忽轉嚮而爲背。足見順逆之理。辨之甚明。去就之權。審之最決。用能維渙散之人心。挽艱難之國步。按諸時局。裨益良多。茲者大禍已弭。巨浪垂平。擬請大總統明頒命令。優事褒嘉。交院飭部通行各總商會。傳知各分會。並轉海外各僑商。俾逆首遁。逃餘生以後。亦無所施其煽惑。幸亂源已絕。邦本不搖。敢貢愚忱。敬俟裁擇。

致政府辭授文虎章

頃奉大總統令。以湖口之役。授元洪一等文虎章。聞命慚慙。不知所裁。伏念義軍羣起。宣布共和。下翕輿情。上孚天聽。自南自北。如絮隨風。萬衆一心。豈繫人力。二三偉人。忝竊祿位。攘天功爲己有。謂衆目爲可欺。運動叛軍。勾串死黨。明搶暗劫。撞我家居。羽檄不居。刁斗無睡。茫茫大陸。載浮載沉。元洪念先烈之艱難。痛邦基之漂蕩。叢尤府垢。曲意調停。悉索苦衷。冀紓兵禍。大廈將圯。寸桷難支。潢池弄兵。卒嬰慘劫。譬如驕子傲弟。

習與性成。感誘無方。至於前撻。洪實涼德。於人何尤。夫于羽不格。聖人所矜。蒲鞭倡施。循吏所上。何況患難之交。一朝斷絕。離羣索處。腎不痛心。警諜朝至。則黯然消魂。捷書夕來。則潸然出涕。耿耿寸心。莫可告語。束身可敗。亦復何辭。夏季六月。長天無雲。烈日鑠金。炎沙沸樹。苦我健兒。遠離鄉井。攀嶠涉海。露宿風餐。長鎗不施。短刃相接。病不交睫。傷不裹創。上下同心。憎無怨讟。元洪足不履戎行。目不睹戰線。風簾持筵。則哀重甲之疲。露帳陳饑。則念乾糧之苦。幸得要塞蕩平。中流底定。總統之靈。軍長之略。將士之力。兵艦之威。洪何有焉。伏乞大總統收回成命。另賞功人。尤望愛國軍士。指日肅清。從亂黨徒。幡然悔悟。奠共和於不斂。與兆庶以更新。異日者。載整干戈。嚴守邊圉。元戎十乘。以征鬼方。元洪得以未死之身。躬逢斯盛。勒燕然之石。築單于之臺。竊所願也。敬布腹心。

致各省痛陳時事

軍事救平。閣員更易。磨光刮垢。如月重輪。元洪迷在下風。獲邀純嘏。桓桓羣力。敢不拜嘉。然天步方艱。禍源未弭。干戈可以定亂。而不能攻心。羅網可以除奸。而不能防口。一

年以來。政府於亂黨亦既周旋曲至矣。卒之貌合神離。始親終叛。一隅倡亂。全國騷然。高台召電。空谷生風。毋亦謹於防閑而疏於修省歟。夫大功者。罪之導也。奇福者。禍之媒也。今者渠魁四逸。餘孽未清。潛藏者豹將養毛。就撫者鷹猶帶眼。亂離之後。繼以凶年。潰敗之餘。成爲流寇。明烈帝撤邊兵以防闖。既虞根本之動搖。唐代宗勅勛將以開藩。復慮威權之潛降。人以爲卿雲旭日。洪以爲虎尾冰淵。人以爲磐石金湯。洪以爲羊腸劍閣。前事不忘。匹夫有責。當此改組更張之際。竊敢與朝野上下一商榷之。政府之弊。待革多端。要其大者。可得而詳。民國初立。綱領未張。節削枝披。爲日不足。行政則多於用智。而少於推誠。理財則明於治標。而昧於培本。交鄰國則曲爲遷就。而無先機疾赴之方。待功人則虛與羈縻。而無默化潛移之術。有一於此。未或不危。尤以用人最貽口實。任賢之道。貴在深知。祁奚舉親。聖人所許。然豐沛舊人。濠泗宿將。囿於一系。反似不公。可議一。霸道既創。英主疊興。必任中才。以爲易制。使貪使詐。相習成風。然其興勃焉。其亡忽焉。況在民邦。迭爲公僕。何猜何虞。不爲遠計。可議二。處士虛聲。謬相標榜。譬彼畫餅。不可療飢。勝國濁流。何裨國是。殷浩誤國。前鑒匪遙。邦本漂搖。豈堪輕付。可議

三遊士叫囂。元功跋扈。挾持朝政。自昔已然。餌位則驕。餌權則憤。折鼎覆餗。莫敢誰何。可議四。利民福國。政黨所崇。吾國政客。茫如矇瞶。或阿以營。或攻以挾。終南捷徑。廉恥蕩然。別派開山。分支樹幟。鳴儔嘯侶。二三爲朋。官職有涯。黨會無畔。調停敷衍。雖聖猶窮。可議五。凡此數端。無能曲諱。甚至趙內閣成立以後。六閣員否決之時。政府竟以下駟充乘。散材架屋。泄沓因循。載離寒暑。自隳國勢。輕失人心。誰爲政府畫此策者。豈不大可慨哉。然而害必由於所啓。弊每生於所防。元洪竊肝。衡禍始。未嘗不太息痛恨於約法也。夫同意彈劾。兩不相容。徵諸法理。尤難強合。晚近以來。宦途愈靡。二三豪傑。每超然於政黨潮流之外。或蟄居窮巷。或退處閑曹。或辱充下僚。或廁在遠地。韜光斂曜。惜羽珍毛。誰肯呈身於國會之前。以供其否決。而鬪茸柔靡者。乃得以拔茅連茹。旅進旅退。上承總統之頤。中伺國會之息。下迎司員之心。國家大計。墮諸冥漠。賢俊日遠。政治愈頹。迨其失職。國會不敢彈劾也。彈劾則無解於前日之贊成。政府不敢罷斥也。罷斥則最難於後人之繼任。卒至勢不相安。決然舍去。一總長堅辭。而全部停矣。一總理潛逃。而全院停矣。漢武丞相。明恩輔臣。庸材相尋。元樞迭易。如奕若然。豈有結局。何意。

非同意之弊。有以致之。况絕續之交。屢陷於無政府乎。且定法諸公。豈不以是裁抑僉壬。防閑專制。然鑽營之夫。何孔蔑入。知利祿之可以階致也。則皆聯絡議員。奔走政客。以聲氣結英俊。以金錢賄貪頑。託黨魁爲揄揚。獻證書爲援繫。區區同意。予取予求。衆口既箝。高官自賞。誰復爲國家負重任者。而政府用人失當。行政日非。轉得以國會牽制之言。自解於天下。此豈立法諸公之始願哉。夫用人者。治國之本也。制法者。立政之基也。未有私念參於其間。而可久安長治者。伏願大總統開誠布公。與民更始。求才必慎。用才必堅。砥礪廉隅。滌蕩瑕穢。虛己以聽。立賢無方。國務諸員。各啓乃心。嚴守權限。堅忍沈毅。不爲外撓。毋輕入而不量。毋曲學以取容。毋畏難以苟安。毋避罪而求去。尤願兩院諸賢。詳定憲法。規畫遠謨。俾各部總長。悉聽政府之自擇。而一切莽糾擾攘之制。皆所當刪。信之也專。則責之也重。善無顧慮。惡無遁詞。其爲裨益。豈有涯涘。元洪忝治軍旅。人微言輕。况當戰勝之時。爲逆耳之論。免罪爲幸。誰所願聞。然狂夫之言。聖人擇焉。夫差驕於會稽。而舉國爲墟。若敖狃於蒲騷。而全軍盡沒。蓋存亡治亂之機。判於寸心。移於俄頃。不可不慎也。伏願大總統無忘京畿之被刺。元洪無忘陽夏之被圍。兩

院諸賢。無忘請願滿廷之被逐。勵精明慎。相與有成。或者吾國猶有豸乎。江波不澄。雲方黯。獨行踽踽。維音嘒嘒。瞻望首都。曷其有極。

致沈仲禮君允飭軍隊保護紅十字會

卦電悉。甯省大兵之後。滿目瘡痍。貴會濟衆博施。救民水火。宏茲願力。愜我頌私。已查照來電。分轉張都督雷副使。請飭軍隊一律保護矣。知念特復。

致沈仲禮君謝捐贛款

卦電悉。執事垂念贊助。慨捐鉅款。仁漿義粟。欽感莫名。謹爲章贛遺民。額手稱謝。惠款請滙交南昌汪民政長。會同趙宣撫使查收。業已轉達前途。知照矣。

致參衆兩院辭臨時副總統

參議院衆議院公鑒。共和肇造。國慶再周。值臨時政府告成之期。乃正式總統當選之會。普天望幸。萬國觀光。甚盛典也。伏念元洪一旅。欣逢景運。義旗甫建。五族同風。當統一之初基。承副貳之重寄。自惟德薄能鮮。時懼弗勝。兩年以來。國信未昭。民生重困。鳴驚桴鼓。既窮感格之方。岬起蕭牆。終乏調和之術。安內攝外。莫挽時艱。權變經常。

未行遠略。所幸大總統文明武健。主張於上。中央地方。政府諸公。羣策羣力。維持匡救。於下。元洪得免隕越。以貽國民羞。久思退讓名賢。詎敢久辱高位。今者憲法開張。次第選舉。元洪謹對我中華民國會兩院。辭謝臨時副總統職務。我國民代表。必能登明選公。爲國得人。俾四萬萬人民。陰受其福。元洪亦得以退藏拙鈍。託庇嘉蔭。則大有造於民國也。四方多士。實試圖之。昭告國門。統祈察照。

致兩院議員請速行選舉盛典

亂黨既平。人才輩出。名流夙望。拔茅連茹。兩院諸賢。共遵軌道。宜若可以久安長治矣。然而元洪獨默觀世變。終日繞床。覺總統一日未舉定。儼若禍在眉睫者。非無病而呻也。立國之本。惟民與財。自亂軍肇興。蔓延六省。攻城據地。殺人如麻。今所遺者。皆刀餘也。哀鴻嗷嗷。莫由安宅。中國尙得謂有民乎。五國借款。剝肉醫瘡。桂苒半年。政費告竭。中經兵事。虧損愈深。供者已窮。求者無厭。再借再押。國其餘幾。中國尙得謂有財乎。夫民維邦本。食維民天。民財俱盡。縱外患不侵。猶將立稿。况禍原有急於此者哉。元洪不敏。與兩院諸公論痛心之交涉。亦不敢求邦人昆弟。恕辱國之愆尤。但稽弱國之專重。

外交未經承認。不能爲國人求人。惟欲所逞。靦顏道歉。飲恨吞聲。縱至萬無可忍之時。猶能聊勝於亡之想。究之得隴望蜀。豈有窮期。國體淪失。不亡何待。日俄近事。可爲寒心。元洪身歷艱危。未嘗不泣血呼號。淚數行下也。以大總統雄才偉略。卓絕一時。再造共和。易如反掌。豈惟元洪信仰。卽環球各國當無異詞。使果能憲政措施。以籌遠略。對內對外。豈不裕如。卒之事與願違。舉襟見肘。豈眞明於見前而暗於見後哉。若使正式政府早日觀成。名分旣眞。事權攸屬。政府有強固之力。鄰邦無窺伺之心。元洪得與各都督民政長擁護中央。翊贊民國。五色之旗。抑何至慘淡若此。然則追原禍始。坐失事機。兩院詎能辭其咎。前側聞憲法起草會已決定先舉總統。爰採美洲之先例。察中國之現象。崇論所傳。海內懽欣。乃遲遲數日。闇寂如故。遲之數旬。而闇寂仍如故。在院諸公。豈不以天下奠安。無妨稍緩須臾。從容磋商。庸詎知耽耽者之伺其側。方惟日不足也。俟河之清。人壽幾何。再或遷延。人豈我待。元洪與諸公寧尙有相見之日乎。伏乞兩院速定大計。舉行盛典。浹旬之間。期於竣事。亡羊補牢。猶未晚也。抑元洪更有請者。昔之以人事君也。內舉不避親。外舉不避仇。今以人事國也。何獨不然。吾國政府分門

別戶。然欲達福國利民之目的，必先求截危濟變之才。舍舊謀新，殆難斯選。若以一黨之好惡，而輕拂輿情，以一己之是非，而動搖國本，來日大難，必有噬臍莫及者。舉不得人，其害將甚於不舉。此尤爲兩院諸公馨香禱祝者也。元洪天性慳直，素不屑阿諛取容，且身非議員，何敢於國會之前，嘵嘵瀆論。然必膺切膚之痛，乃肯負妄言之謗。愛國之忱，迫不暇禁。雖言出禍臨，亦有所不能息者。伏乞從元洪之言，以爲中國治安之計。仍請議元洪之罪，以杜軍人干涉之萌。庶於行政立法，均有裨益。含酸待譴，無任屏營。

復寰球尊孔會

頃接瓊函，倍欽璫采。過蒙獎飾，慚愧奚如。來書所述孔道如日月經天，江河緯地，民國建設伊始，百度維新，尤以人心風俗之所關，爲立懦廉頑之大要。執事昌明聖教，握要以圖，元洪不敏，何補高深。囑書匾額，謹題聲教洋溢四字，勉隨諸君子後，守循墻之訓，爲馨香之祝。特此佈覆。

覆四川都督胡

宥電悉。廢省存道之說，久爲一般學者所主張。良以省治沿乎元初，地廣而控制不便。

共和先進。莫法美若。法分爲六十七郡。美分爲四十五州。吾國幅員廣袤過之。而分少。僅二十有二。面積皆與一國相埒。論者早以吳元濟淮西之事爲憂。此次逆黨叛亂。皖贛甯粵。均以憑藉一省之力。始敢與中央抵抗。前車不遠。來軫方適。其關係固不止耗費一端也。魯論以聯邦藩亞爲戒。主張廢省之制。劃全國爲若干道。以治理言。無鞭長莫及之患。就統系論。更少尾大不掉之虞。循誦再四。佩企莫名。極表贊同。

致各省通告就任正式副總統

疊接國會政府電告。元洪於十月七日當選副總統。並承大總統就商日期地點等因。元洪欣逢景運。疊荷殊榮。佐國踰年。治軍叢咎。乃甫遞辭書。復膺次選。反辱高位。益懷深淵。惟有服從公意。協贊中央。本共和立憲之精神。盡匹夫天下之責任。尙望大總統時頒教令。諸僚友共錫箴規。幸託寵光。免貽隕越。茲於國慶日就兼領湖北都督任內。拜受嘉命。謹陳謝悃。併以通聞。

致中央及各省通告憲法意見

大總統有電敬悉。民國奠定。編訂憲法。是其先務。惟憲法爲國家根本大法。議定之時。

宜外觀大勢。內審國情。若徒襲他國之皮毛。削趾就履。適足以速亡而已。今憲法委員會所定憲法草案。可議尙多。何敢知而不言。至貽民國前途之累。謹就大總統電所舉各節引申言之。國務員之任命同意權。與不信任投票制。僅行於法美二國。然其性質則兩不並行。美採事前監督主義。其閣務員對於內閣。不負責任。故不妨以同意權界之。有參議院資格之上院。然不同意者。從未一見。我國既採責任內閣制度。臨時政府期內。卽已實行此制。因之閣員迭更。屢瀕於危。則此制之不容存在於憲法也明矣。至不信任投票。造端於法。法弊所極。較同意權爲尤甚。不同意之結果。僅不得國務員而已。當局者。猶可藉異黨以解嘲也。若旣身爲國務員。崇朝而任事。難保反對票之不夕至也。自好之士。孰肯坐待吹求。無不潔身以去者。法國採用此制以來。未嘗一次實行。內閣員卒以迭更者。實係於此。我國人材缺乏。達於極點。而尙氣節重廉恥之風。又較他國爲盛。此制一行。必致中材以下。亦視政界爲畏途。國無人其何能國。元洪等以爲國會對於國務員。僅宜有彈劾權。而不宜有同意制。及不信任投票制者。一也。行政訴訟。英美二國。雖有屬於法院之例。然皆緣於歷史上之習慣。自非他國所宜通行。口國

及日本雖試行之。卒以種種不便。旋即廢止。德意志各邦。則多取鑒於法。使行政裁判與司法裁判截然分離。於是平政院制。遂爲行政裁判與司法所採。權今草案第八十七條。竟舍約法上之平政院。而以行政訴訟屬之法院。元洪等竊期期以爲不可。行政裁判爲行政監督之作用。即使存而不用。亦足使下級官吏有所嚴憚。若屬於法院。是以司法干涉行政官吏。其不可者一。行政上之自由裁量。較司法上之自由裁量不同。往往因地因人。因時因事。不能無所出入。自非嫻於行政法規。且具有行政上之特別智識者。其判決難期允當。而國與民交受其病。其不可者二。判決之結果。必執行乃徵有效。使受判決者之上級官廳。不以法院之判決爲然。則爭執易起。爭執不已。進而軋轢。軋轢不已。至於紛擾。皆爲事實上必有之結果。其不可者三。人才之進退出處。隨國法保障之厚薄爲轉移。今此法院裁判行政事件。其信用固已不厚。設使少失平允。則潔身自愛者。必至望而却步。在職者又以疑畏之心。幸求免過。全國政治。必將淪於萎縮之地。而不自知。其不可者四。又况我國司法尙在幼稚時代。一意扶持。猶虞不及。設再益之事務。被涉牽混。恐行政訴訟之效未收。而司法獨立之實已失。元洪等以爲宜。


另設平政院專管行政訴訟者二也。國會委員會爲各國憲法所無。今草案規定國會閉會時由兩院各舉委員二十人組織委員會。職權之廣直與國會相等。是不但以少數人專制多數人。不足以代表真正民意。且能使國家命脈。惟其操縱。而無如之何。即如緊急強命處分。爲國家元首憲法上之大權。在事實上萬無可以反對之理。今草案竟以同意權予之數十委員。是直剝奪元首憲法上之大權。而使總統無臨機應付之餘地也。元洪等以爲國會委員會萬無存在之必要者。三也。審計院爲國家監督會計之機關。其功用在防制政府支出。超過預算。爲將來提出決算時之預備。非爲輔助國會檢核決算而設也。故各國現行制度。除一二小國外。無不直隸於行政首長。今草案竟反多數立法例。改由議員組織。是以立法機關。侵越行政職權。誠如有鈞電所云。綜其法弊。皆使行政一部。傾爲國會附屬品。勢非消滅行政獨立權不止。且國會對於政府。財政既有預算之協贊。復有決算之承認。固已徹頭徹尾。實行其監督之職權。今復於會計中途。許國會時加干涉。是何啻以審計員數人。侵奪全體議員承認決算之權耶。況行政權官吏應受行政法規之支配。對於國會宜負完全責任。今審計院既由議



員組織。是否亦受行政法規之支配。設令審計不當。將使何人負其責任耶。元洪等以爲審計院。應由總統選任。勛望最高。全國信仰之人。而不宜以議員組織者。四也。總之我國正式政府甫告成立。法律造端。實爲憲法。稍有不善。則民國前途非常危險。務望兩院諸公。共體時艱。顧全大局。將憲法委員會所擬憲法草案。詳加討論。重行量定。務期與我國歷史習慣。現時情勢。適合。以祛流弊。而鞏邦基。無任企禱。懇直之言。諸維諒察。署湖北民政長饒漢祥。漢口鎮守使杜錫鈞。荊門鎮守使丁槐。會銜。

致大總統及各省通告啓行赴京

元洪忝廁戎行。材薄任重。屬滄海橫流之會。當中原板蕩之秋。溯自陽夏媾和。及乎贛甯肇變。荆山欲崩。漢水幾沸。幸賴我大總統當機幹運。先事綢繆。奠民國於無疆。投元凶于有昊。元洪得依餘蔭。幸保虛聲。未嘗不喙若懷波。茹禾念露。燕雲楚樹。道阻且長。雖顏色未親。而神魂久嚮。祇以周旋鞭弭。軼掌軍書。親從汜水之師。致後塗山之會。盲騎莫適。警笑爲勞。天命更新。楚氛幸靖。風前退蠲。疆堅向路之心。浪後頽魚。愈切登門之念。謹於本月九號。親戒行裝。面聆迪誨。本府一切事宜。應懇大總統派員代理。俾專責成。專此縷陳。並行通告。



黎副總統書牘彙編目錄

卷五

公牘

咨文

鄂軍政府咨臨時議會文

爲漢口建築借款事

令文

劃分行政軍事訴訟權限文

遣散軍隊諭文

通告注重實業文

傳知選舉教育總會職員文

誥誡軍人文

嚴令各軍人遵守軍紀文

黎副總統書牘彙編目錄 卷五

黎副總統書牘彙編目錄 卷五

嚴禁私自結社文

通令各軍遵守法律文

限制招兵文

示諭

示諭漢口商市照款歸結文

示諭維持漢口商市文

維持鈔票示

嚴禁抑勒國民捐示

整飭人倫道德示

綏靖地方示

解散亂黨示

准旗族自由入籍示

佈告

懲辦匪首佈告

韻示

徵兵示

副 總 統 書 版



副總統書版彙編目錄 卷五

黎副總統書牘彙編卷五

公牘

咨文

鄂軍政府咨臨時議會文

爲漢口建築借款事

爲咨會事。案准國務院咨開。奉大總統發下參議院咨開。准國務總理呈稱。接黎副總統電稱。漢口市面亟應建築。以維商務。已向洋商議借建築費二百五十萬磅。約九三五或九四交。長年五釐息。二十五年還清。六年後起還本息。如中央認可。款即現交。希裁奪速覆。等因前來。查漢口爲全國第一商埠。亟應從速建築。以蘇商業。向洋商借款建築。請大總統咨詢參議院。如得同意。即請認可。等因前來。相應咨詢貴院查照見覆。等因。並據政府委員于來院陳述時。交到借款草合同十五條。經于五月二十七日常會討論。僉以此案可決定三義。一按照草合同第七條。此款借還之責。全歸地方担負。與中央無涉。二此款既供漢口興築市場之用。不得移作他用。三以漢口地方稅爲抵。

押品則償還之法甚爲確定。又詢據政府委員所討草合同，已得鄂省議會及漢口商會之承認。本院自可同意。惟草合同第九條，需其擔保四字，應刪以上各節，均經公衆可決。應將議決情形，咨請查照施行等因。除電達外，相應咨行貴副總統查照可也。等因。准此。除諭漢口市街建築處、漢口商務總會外，相應備文咨會。爲此合咨貴議會，請煩查照施行爲荷。須至咨者。

附武昌政府建築借款合同

- 第一條 此項借款限於二十五年內還清
- 第二條 自正式訂合同之日起算當以第六年終爲第一次還款期
- 第三條 每次所抽之還款債券當合全數二十分之一
- 第四條 每次所還之款其數與債券之價相等
- 第五條 此款以九七折發賣
- 第六條 每百磅由上海振興中國實業公司以九三四折交與武昌政府所折之數作爲發賣債券及他種費用
- 第七條 借款及息金當以漢口地方稅及漢口歲入作爲抵押品無論何時如以上稅項尙不敷每次

應還之款息則由武昌政府另行撥款補足

第八條 此項借款每年以五釐行息

第九條 此項借款須得中華民國中央政府許可需其担保

第十條 凡關係收回債券之費用均由湖北武昌政府擔負

第十一條 此項借款須照每次議定應付之數交與湖北武昌政府其數由正式合同核定後以兩方面籤押爲憑

第十二條 借款利息由交付武昌政府之日起算

第十三條 償還利息與債券之價值當由兩方面於償還期前十四日議定之銀行匯兌

第十四條 於訂正式合同時此草合同內條件如兩方面視有爲不合者均可更改此草合同不過爲兩方面商議之基俾達圓滿之目的

第十五條 此草合同由湖北武昌政府及上海振興中國實業公司在武昌於議定之日簽押

令文

劃分行政軍事訴訟權限文

照得共和憲政最貴權限分明鄂省兵興之初各行政機關爲治安起見收受詞訟原

屬一時權宜之計。現上訴高級審判各所業已次第成立。凡民人與行政軍事無相關聯案件。如有冤抑之處。應逕赴各該所起訴。或上訴。勿得來府牽瀆。至各該所爲執行法紀之機關。必能秉公判斷。不致使我同胞有不伸之屈抑也。

遣散軍隊諭文

照得我軍起義。深賴各兵士努力疆場。不避艱辛。推倒專制政府。達到共和目的。惟自軍興以來。庫藏告匱。閭閻凋敝。財政困難。達於極點。農商各業。諸多廢弛。茲當戰事已息。庶政遂舉。非極力振興實業。節省銷耗。不足以圖元氣之恢復。而謀生計之發達。故前本都督傳知各軍隊兵士。如有願請假回籍者。若在本年六月以前發給一月恩餉。以示體卹。六月以來。概不發給。各兵士深明大義。共體時艱。自願回籍者。所在多有。茲值六月發給恩餉之期限。將次停止。誠恐各營兵士。猶有未及周知者。合亟再行傳知。仰各軍隊轉飭所屬官長。目兵一體知照。如有自願退伍請假回籍者。迅即呈明該本管長官。稟領恩餉。自七月初一日起。一律停止給發。以示限制。

通告注重實業文

爲通諭事。四月十八日奉大總統命令開。現在國體確定。組織新邦。百務所先。莫急於培元氣。興實業。東南各省。自上年重罹水患。又迫軍興。農商之業。損失已多。困苦流離。言之淚下。現屆春令。耕作既貴得時。而絲茶又將上市。仍警耗時告。人心未安。設誤農工。荒商市。則收獲無望。闔闔大傷。富者化爲窮民。貧者流爲餓殍。民不聊生。何以爲國。此本大總統所最痛心者也。應責成各省都督。勸諭農民。及時耕種。嚴飭兵警。鎮懾地方。保護市面。使農勤於野。商悅於途。庶幾可期。商市漸復。民皆有以瞻其生。而殖其產。以迓幸福於無既。凡有軍民地方之責者。其共體此意焉。此令等因奉此。查實業爲富國之源。農商兩端。尤屬國民生命所繫。鄂省自軍興以來。風鶴頻驚。農輟耕作。縱或資畜有得。而土貨價值日落。小民終歲勤動。無以自存。倘盡失業。咎將誰屬。況漢口被焚。商人受禍最酷。金融阻滯。十市九停。重以土匪騷擾。豪強勒索。商業零落。亟待振興。茲奉前因。合卽通行諭飭各司。卽便遵照辦理。並轉飭一體遵行。毋稍疎忽。

傳知選舉教育總會職員文

爲傳知事。湖北自起義以來。學校停止。將及半載。現在教育行政機關。業經成立。自應

籌畫一切。以便開學。更應組織言論機關。以補其進行。倘招集全省人士。開會組織。必致延曠日久。貽誤事機。查前清教育總會職員。暨現在發起教育會維持教育會各代表。均爲全省學界所選舉。對於教育事宜。應負責任。仰各會職員代表等。於本月二十三日。在臨時議會會場。遵照此次所頒教育總會簡章。選舉職員。屆時由本都督派員蒞視。以重學務。而饜衆望。此傳。

詰誠軍人文

元洪不才。謬膺重任。客歲迄今。夙夜恐懼。幸天不絕漢。一舉恢復漢土。脫滿清之羈絆。變專制爲共和。重睹天日。如遊化宇。我同胞必且以爲長此昇平。永享幸福。閉戶不防盜。死灰不復燃耳。殊不知元洪綜觀大局。日夜焦慮。南北洋直隸之內亂迭起。湘甯皖鄂之革命屢興。種種無意思之暴動。不但耗盡民財。流盡骨血。並惹起外人之干涉。滿人得以乘其隙也。否則大局已定。民國成立。滿人得一線生路。自顧不暇。豈能有宗社黨之發現。使我同胞受其權術。爲其紛擾者乎。推原其故。類皆多數無愛國心之同胞。貪其財利。受其蠱惑。有以開導引誘使然也。他不具論。卽以鄂省言之。開革命之先河。

借民國之元功。猶復入其彀中。甘作奴隸。擾害大局。未知所居何心。並聞謠言四起。我軍界同胞。亦混跡其中。嗚呼。我軍界同胞也。曾亦思創革命之初心乎。亦思客歲之起義乎。不憚犧牲性命。馬革裹尸。爲黃帝雪恥。祖父復仇者。我軍界同胞也。爲大同胞造幸福。重履今日之共和時代之土地者。亦我軍界同胞也。一旦反去初心。不爲功首。並作罪魁。不爲共和時代之偉人。反作專制時代之牛馬乎。元洪清夜自思。五臟焦裂。況軍人開通最早。豈不知種族之宜分。大局之宜保。稍一破壞。影響立見。滿人稍一得志。揚州嘉定之慘。倚馬可待。且外人環伺。投機之會。間不容髮。使內地操戈。難免不從中干涉。瓜分我土地。蹂躪我同胞。亡國滅種之慘痛。恐爲有識者所逆料。我軍界同胞。其亦思之否乎。務望有則改之。無則加勉。元洪不勝翹首厚望之至。

嚴令各軍人遵守軍紀文

外氣日亟。內力未充。欲大局之安全。恃軍警相維繫。自馬隊案破。數月以來。情形日臻平靜。此皆我程度優美之軍警。爭相服從。各守法紀。乃有此安寧之現象。本都督引以爲殊榮。迺道路傳聞。流言四起。有謂某某將勾結軍隊。藉圖破壞。或訴之武力。以遂推

翻者。衆口悠悠。本難遽信。第恐輾轉相播。搖動軍心。大局前途。何堪設想。本都督率軍旅維持秩序爲本能。各軍警保衛同胞。尤以鞏固爲天職。除派員分途密查外。合行通令所有軍隊。務安守本分。毋稍游移。並嚴查奸宄。以靖閭閻。倘有不顧大局。甘爲匪人運動者。一經查出。定以軍法從事。仍治各該管官弁以應得之罪。本都督爲大局起見。特此諄諄誥誡。凡我軍人。務各體時艱。嚴守軍紀。則本都督不勝榮幸之至。

嚴禁私自結社文

照得共和開幕。億兆同心。凡屬血氣之倫。均負袍澤之誼。故功成身退。人鑄范蠡之金。實至名歸。家繡平原之像。夙哉尙已。至於政黨組織。胥守法律之範圍。社會趨勢。要之人民之意思。乃譏時之眞俊傑。亦愛國之眞精神。近查有某會某團。名目離奇。情詞憤激。其集合不過失意之閒員。其奔走儻亦熱心之志士。惟是眞僞難別。玉石錯陳。或因誤聽妖言。遂至終罹法網。究其流弊。不可勝言。本都督有人民負托之權。卽有保障人民之責。用特掬誠相示。豈忍不教而誅。勉誥將來。宜悔既往。爲此諭仰軍民人等一律知悉。如有巧立名目。倡設機關。著卽自行取消。勿得輕於嘗試。但愧孤寒大庇。無杜陵

之廈萬間。須知奸宄難容。有廷尉之法三尺。其各凜遵勿違。

通令各軍遵守法律文

照得法律作用。原爲懲治不善。而儆戒將來者也。所以漢高入關。首約三章之法。夏禹雖聖。徒彰泣罪之仁。蓋不敢以姑息市恩。破壞定例。乃自民國肇新以來。凡百均期統一。而軍法一項。尤爲整飭紀綱之具。更不能彼此爲政。上下與援。以侵其司法獨立之權限。乃查陸軍監犯。不待監禁期滿。各軍事機關爲之具保。呈請開釋者。日必屢見。此侵權越俎。微特有失軍法統一之精神。而守法者。亦將視軍法爲人情之變態。若長此不整。必將有以軍法爲嬉游之事。則前途之壞。何堪設想。嗣後無論何種機關。遇有犯罪人等。曾經定刑監禁。或尙未定刑而在押者。均係軍法範圍辦理之事。各機關毋得擅行呈請保釋。以清權限。而重司法。

限制招兵文

庫事發生。各處將校。或請編新軍。或招集舊部。以冀荷戈前驅。直搗朔漠。其心殊堪嘉許。但現時軍隊爲數甚多。祇患餉械軍裝之不足。不憂軍隊之難敷。況財政支絀萬分。

費幾許辛苦。而謀遣散。決不能率行招集。以重民困。至事機之應付。須由中央主持。各軍之集團勸捐者。已咨內務部通令限制外。希通令各軍隊。一律遵行。

示諭

示諭漢口商市照款歸結文

照得漢鎮爲通商大埠。自兵變後。各商皆紛紛逃避。市面幾乎無存。商務零落。已達極點。現在大局已定。亟應籌辦漢口市面。招集舊時各商。清理帳項。調查損失。以便設法重整事業。至發達市面。端賴金融活動。銀號錢莊。尤須從速招集。特別維持。以期挹注。各幫藉資周轉。商務始能振興。業經本都督擬定辦法。招集銀錢各商。限期來漢。示諭在案。現據漢口商務總會報告。銀錢各幫均已陸續回漢。清理往來帳項。頭緒紛繁。調查損失。自爲入手辦法。在漢言漢。損失固屬一律。均有應直接間接之分。而各處情形不同。尤當有本埠外埠之別。除洋商借款。已另有辦法不計外。遠而各毗連。近而外府州縣鄉鎮口岸。向與漢商有銀錢交易。所欠之款。自應一律照款歸結。不得藉詞推展。意圖倒騙。倘有奸商狡獪。其原買地方。未遭損失。或置原貸於不理。向別地運用現銀。

或藉兵亂以爲名，隱瞞帳項，希圖脫卸，則是居心狡詐，既失商人資格，一經查覺，或被告發，除勒追欠款，並即照律治罪，本都督以恤商保民爲宗旨，此等積弊不除，不足以維商業而資整頓，除分咨各省都督，嚴申禁令，並通飭本省各地方官轉飭遵照外，爲此出示曉諭，仰各埠商業人等一體知悉，凡向與漢口各幫往來帳項應還之款，務各激發天良，從速歸結，俾損失之家，得資周轉，徐圖重理舊業，事關中外全國商務，實非淺鮮，慎勿再蹈從前積習，致干重咎，其各懷遵，毋違切切特示。

示諭維持漢口商市文

爲示諭事。照得富國莫要於通商，通商莫先於立市。中國商務不能發達，由於市道素少講求。然如周官所制，司市次敘分地而經市，縣師量地辨物而制域，則市廛區畫，建設之權，應歸國有。可知匠人營國，九經九緯，經涂九軌，環涂七軌，縱橫有定衡，闢狹有定式，則市道之整齊可知。爾雅四達謂之衡，五達謂之康，六達謂之莊，七達謂之劇，駮八達謂之崇，期九達謂之達，聚集愈繁，容積愈闊，則市道之寬廣可知。前代經商之遠謨，早寓列邦開市之法意。近百年來，五洲大通，商戰劇烈，每於要津當道，財貨集合之

點。開闢商埠。吸鄰邦之精髓。握環球之利權。考其著手之方。則以場面之廣闊。塵舍之整齊。空氣之流通。法式之精美。不惜棄地於市。以博社會之歡迎。使商賈皆欲藏於其市。行旅皆欲出於其途。是以能角富爭雄於世界。遠觀於各國都會。近觀於各省租界。是其明效大驗。吾國以市政不修之故。致洋商裹足不入。不惜捐棄重金。另闢市場。而華商反託庇於其宇下。是誠吾國商界之大恥。漢口以全國水陸之中樞。四通八達。天然第一絕大商埠。從前街道。湫隘污穢。災疫時作。而櫛比鱗次。無法改修。早為中外通人所詬病。適有上年兵燹之厄。民國政府。乘茲時會。遣派工程師。開設建築公司。籌辦處。繪圖帖說。將漢鎮市道。全體改革。煥然一新。為吾國第一次開闢商埠之偉大事業。凡屬商業中人。應如何協力贊成。俾與東西各國操奇制勝。乃聞近日商民。頗生異議。或謂棄地太多。或謂尖形不便。或謂拆卸耗工。掉換滋擾。種種偏見曲論。均由不識時務。不明學理之故。誠恐該商民等。輾轉誤會。不得不剴切言之。漢鎮前阻江漢。後繞湖溪。地面似不及京津上海之闊綽。然舊時漢市。祇一萬七千方丈。今則拓至十七萬方丈。而強且姑嫂樹萬家廟。諶家磯。韓家墩等處。周陸所至。皆足為他日拓殖之準備。則此

寬十數丈之路綫。何靳此而忍弗能予。觀於倫敦之五層樓。而知該公司所留之地。諒然有餘。觀於香港之填海爲市。而知後湖低窪之地。皆屬可用。此棄地太多之可無慮也。民居以深藏爲宜。商店以顯露爲貴。衝繁是其趨勢。斷無欲贏爲惡囂之理。至於尖形商店。居夾道之前提。邀三方之環顧。以視正街平面。僅得一方之視線者。其利市奚啻三倍。此尖形不便之可無慮也。安土重遷。畏難憚改。此吾國人之慣性。以營個人之私業。尙且不可。何況大局所關。豈能曲徇遷就。以商民學術之未精。閱歷之未徧。既無世界之觀念。安有全局之統籌。如謂就原有之路綫。則雜亂而不成章。如謂縮當街之房屋。則滅裂而不適用。不知灰燼之餘。勢難仍舊。拆卸之工。萬不能省。該商等原有繁盛。或偏僻之地。概由公司按方估價。依次掉換。不敷之地。由公照賠。不過移步換形。於該商等並無損失。亦何固執而不爲此。明知民窮財盡。何忍過事鋪張。惟今日之新造。尙易。他年之改作更難。與其苟安寒儉。喪失無數之利權。不如權用生產的外債。忍一時之痛。收數世之利。尙不失爲一勞永逸。事半功倍之計。此拆卸掉換耗費滋擾之可無慮也。然其必須改建之理由。則尤不止此者。一則五都之市。攘往熙來。汽電馬車。分

途並進，稍形梗塞。即有意外之虞。香港電車之傷亡人數，可爲殷鑒。若照新圖，則車馬行人，各有界線，均留餘地，可無危險之慮。一則舊時火警，動輒延燒千百十家，皆由街巷逼窄，致救火者不便往來，受火者無路逃避，每每傷亡之慘，狼藉不堪。若照新圖，道寬而牆高，火力既不能延燒，且救火與避火者，通行無阻，可無災殃之慮。一則繁盛之地，人烟稠密，一切殘廢渣滓污穢腐敗之物質，亦與之加增爲比例差，疾病易生，傳染最速。前此漢鎮時疫及各處鼠疫喉證，職是之故。若照新圖，市面既寬，溝渠既潔，得以吐納空氣，而無烟火淤溼毒氣之薰蒸，可無妨害衛生之慮。一則舊時街道，錯雜橫斜，形式既不雅觀，歧途易於迷失，銷場冷落，商力脆薄，是其一大原因。今若築室而道謀，勢將削足而適履，徒費鉅款，貽笑大方。而商旅仍然不利不便。若照新圖，則街衢通達，一覽易了，縱橫經緯，貨別隧分，洋商華僑，聞風爭至，可無阻滯營業之慮。以上各端，特其大較。此外各公園水電等項，應有盡有，必須有豐亨豫大之財力，蕩平溥博之地形，庶足以發揚商務之精神，規制人民之秩序。光大中華之名譽，開拓列強之觀聽。當此炫異矜奇，誇多闢靡之世界，夫豈拘文牽俗，因陋就簡者所能爲功。語曰：論至德者不

諧於俗。成大功者。不謀於衆。又曰。凡民可與樂成。難與慮始。此爲專制時代人民程度不足者言之。不謂今日。民國共和。而我最新通最繁盛之商埠人民。仍爲此祀人之過慮。豈果程度之不足。抑亦私利之所蒙。果如所言。則是開闢市埠。改建商場之事。洋商能爲之。而中國不能。青島能爲之。而漢口不能。毋亦自慮卑弱。甘居人下。永無增廣勢力範圍。與列強並駕齊驅之日耶。須知世界文明。程度日高。權利競爭日亟。小市爲大市之所并。弱商爲強商之所役。積久不振。必至入其羅網。吸盡脂膏。窮蹙以至於亡。該商民等。毋得畏全盤翻動之勞。貪一時省事之利。知二五而不知一十。以坐昧經國大計。今日之事。非改頭換面。破除從前陋習。不足以開風氣。非捐棄金錢犧牲土地。具宏遠之規模。謀商情之便利。不足以挽利權。是以本都督不憚改革之煩難。不惜成本之浩鉅。全力專注。以佇候漢市之觀成。爲吾國經營市埠之發端。而他日中央都會之模範。現在事勢已定。無可轉移。誠恐該商民等。未盡周知。是以申明誥誠。本盤庚告民之意。爲司馬論蜀之文。尙其範我馳驅。共圖進取。毋謂陋劣之商場。枵薄之財力。得以生存於天演商戰之世界也。其各凜遵。毋違。切切特示。

維持鈔票示

照得本月二十五日。准北京財政部電開。奉由國務院鈔交文電開。軍興以後。大清交通兩銀行鈔票。無從兌換。多有減成出售者。請速議辦法宣布。免致商民虧累等因。除交通銀行鈔票辦法由本部會商交通部妥籌外。大清銀行鈔票。本部自應設法籌還。業於該行股東呈中。批示宣布。謹先電聞。並祈宣示商民知悉。准此合行出示曉諭。爲此示仰武漢各商民一體知悉。如有大清銀行鈔票。勿得減成售賣。自取虧累。其各凜遵勿違。切切特示。

嚴禁抑勒國民捐示

民軍起義以來。公私財產損失甚鉅。軍需政費。支應浩繁。財政困難。達於極點。是以黃留守倡辦國民捐。各省響應。踴躍輸將。此亦我國民愛國之熱忱。民國初基之大好景象也。所有全國辦法。中央政府行將規定公布。鄂省現以武昌官錢總局。漢口商務總會爲收捐總機關。凡軍政等界。助捐義士。悉合該兩處投納。掣取收條爲憑。並由該局應隨時彙齊。登報廣告。務期欸歸實用。以達我同胞救國之目的。惟是國民捐屬純粹

義務籌辦員只可鼓吹提倡，不得騷擾抑勒。如有地方不肖匪徒，以愛國之舉，行爲擾民之致，在外招搖撞騙，搯詐鄉愚，勒捐肥己。一經本都督訪聞，或被人告發，定卽拿案嚴懲，不姑寬決。

整飭人倫道德示

照得前據南京留守黃興電稱，民國肇造以來，年少輕躁之士，誤認共和真理，以放恣爲自由，以蔑倫爲幸福，綱紀隳喪，流弊無窮。請講明孝弟忠信，禮義廉恥，以提倡天下挽回薄俗等情。仁人之言，聞之感喟。本總統深維中華立國，以孝弟忠信，禮義廉恥，爲人道之大經。政體雖更，民彝未改。蓋共和國體，惟不以國家爲一姓之產，而公諸全體之國民。至於人倫道德之原，初無歧異。古人以上思利民，朋友善道爲忠，原非拘於君臣之際。其餘三德，雖廣狹有殊，而人羣大紀，包舉無遺。自茲以來，人心浮動，於東西各國科學之精微，未能通曉，而先醉心於物質文明，以破個人道德。緣改哲學，比附名論，厚誣彼賢，私遂己過。抑知立國各有本末，豈能將吾國數千年之嘉言懿行，一掃而空前述入德。百姓與能乃妄者，以爲不便於己，棄於弁髦，造作莠言，誤人子弟，幾欲化全

國人民爲不孝不弟不忠不信無禮無義無廉無恥而後快。孟子有言。去人倫無君子。率獸食人。人將相食。若任其自然。不爲別白。則五季之薄。無法紀。復見於今。必爲人類所不容。環球所共棄。言念及此。憂心如焚。爲此申明誥誡。須知家庭倫理。國家倫理。社會倫理。凡屬文明之國。靡不殊途同歸。此八德者。乃人羣秩序之常。非帝王專制之規也。當此存亡絕續之際。固不必仍守舊說。拘拘於一家之言。亦豈可侵軼範圍。毀冠裳而隨鱗介。惟願全國人民。恪循禮法。共濟時艱。其或倡作詖詞。引入入阱。國有常刑。豈能寬縱。本總統痛時局之阡危。怵紀綱之廢弛。每念今日大患。尙不在國勢。而在人心。苟人心有向善之機。卽國本有底安之理。凡我邦人父兄子弟。其敬而聽之。

綏靖地方示

照得國家要素。不外土地。人民。政事。三大端。其有危害此三端者。卽爲寇讎。其能悍禦此寇讎者。則惟軍隊。鄂軍自上年起義。專以國利民福爲前提。近自共和成立以來。各軍士於城鎮地方。嚴密巡查。不稍疏懈。是以屢次破獲巨案。要犯防患未然。所以勤職守。卽所以報民國也。惟是武漢等處。輪軌四通。五方雜處。游土各匪。最易溷跡其間。每

每布散謠言。圖謀不軌。大之則攘奪政柄。小之則劫取資財。以我軍士。斷頭流血。我人民傾家蕩產。造成此民國。瘡痍未復。基礎未固。若輩乃包藏禍心。再圖破壞。使人民失自由之幸福。國家無共和之精神。震懾我生靈。誣蠱我榮譽。此種喪心病狂。全不度量。力。恢恢天網。罪豈能逃。是宜妥爲防範。布置有方。俾奸宄不致潛生。閭閻得無驚恐。本都督念國計民生之重。豈能姑息養奸。業已督飭所屬。四出探巡。不遺餘力。所幸軍警各員。均將深明大義。共矢公忠。發伏摘奸。不憚艱險。亂黨無所託足。死灰不至復燃。卽令餘孽尙存。各軍警均足任捍禦保護之責。斷不至擾害民間。本都督並與各軍警探巡。及地方人民約。嗣後有拿獲圖謀不軌送辦者。賞銀一千兩。拿獲造謠惑衆送辦者。賞銀五百元。查知前項情事告密者。賞銀二百元。其有與同謀議爲之嚮導者。戮其人。其有引同居住。俾作巢穴者。沒其產。並監禁其人。以上如虛究坐。法所不宥。令出惟行。以期弊絕風清。四民安枕。合行出示曉諭。爲此示仰軍民人等一體知悉。尙其綏靖乃心。各安本業。勿得輕信謠言。自相驚擾。以維秩序。而保治安。其各遵照。勿違切切。

解散亂黨示

照得法律爲國家之綱紀。凡有圖謀不軌。犯上作亂。無論何國。皆在不赦之列。現在民國初定。基礎未固。內而法令多未施行。外而列邦尙未承認。加以財力窮困。雨水爲災。時局阡危。險象迭見。凡我軍民。皆有國家之關繫。應如何萬衆一心。顧全大局。各捐小忿。共矢公忠。政府不致動搖。國基乃能鞏固。迺自共和成立。鄂中造謠生事。時有所聞。皆由不逞之徒。喪心病狂。自羅法網。經本都督出示嚴禁。何止三令五申。乃有祝制六。卽羣英會正長。江光國。滕亞綱等會員三人。分布武漢。私立機關。假改革政治爲名。主持極端破壞。以致閭閻聞風。驚避。外省報電紛傳。實屬民國寇仇。罪大惡極。幸而天牖其衷。事機敗壞。業於日昨四時。明正典刑。地方不至受害。否則一隅有警。牽動全局。後患何堪設想。須知民軍起義。武漢首當其衝。拋棄無數頭顱。漂流無數膏血。破壞國家人民無數財產。以造此共和國。迄今創鉅痛深。瘡痍滿目。秩序尙未恢復。豈堪再罹破壞。興言及此。爲之痛心。亂黨業已就誅。此外概不追究。其煽惑脅從爲之黨羽者。各須激發天良。洗心革面。本都督坦懷相與。毋得二三其德。自蹈刑章。致政治如有不良。議會有糾舉彈劾之責。地方人民。如有政見。儘可照章向議會陳請。斷不容干犯名議。

以危害政府者，塗炭生靈。此後軍民人等，尙其各安本分，毋得胥動浮言，以保治安。而維風紀切切。

准旗族自由入籍示

照得共和成立，五族一家。凡屬滿蒙回藏人民，同係中華民國國民，即應風同道一。修好釋嫌，更無種族畛域之見。查上年清廷與民軍議和條約內載：待遇滿蒙回藏第六條，從前營業居住等限制，一律蠲除。各州縣聽其自由入籍等語。當經變方簽押，萬國周知，成爲定案。所以尊重人道，鞏固國基，示大同而收統一法，至良意至美也。但此四族人民，除藏人遠處西陲，罕至內地外，回人則散處中原，已成習慣。業與漢族耦居，無猜。蒙古人則元代已有隨便居住之制，亦在同化之列。惟滿族及蒙古旗民，當前清開國之初，限制過甚，以致人無執業，家無恒產。生齒日衆，額餉不敷，貧困無依，情形可憫。前清之糲政，殊有乖人道。是以民軍義師一舉，各省旗民順從。本省荊州駐防，以經繳械領餉。該旗民等所以舍清廷而歸民國者，原以希望休養生息寬大之政。但發給餉糧，乃維持現狀之事。其根本至計，仍須按照前議，聽其自由入籍，必使旗民有自謀產業之

方而後國家無生計之累。須知民軍革命專爲政治改良。平等自由。五族有同享之利益。斷無令該旗民獨自向隅之理。誠恐各地方人民未盡周知。或妄生疑慮。爲此仰各府縣軍民人等一體知悉。嗣後各該地方遇有旗人入籍置買田宅營業居住等事。著與本籍人民一律平等看待。聽其自由。並由各地方官出示保護。各自自治紳董力予維持。務須親愛同胞。共臻上理。慎勿此疆彼界。我詐爾虞。所有土民客民從此親仁善鄰。講信修睦。婚媾相結。財貨相通。不得有需索把持。欺生排外等弊。如有造謠生事。違背法理。擾亂治安。一經發覺。即仰該管地方官按律治罪。以符民國大道爲公。不使一人失所之至意。其各遵照勿違。

佈告

懲辦匪首佈告

爲佈告事。照得武漢縮穀中原地形衝要。往往有匪徒匿迹其間。圖謀不軌。本都督爲保守地方秩序起見。迭次嚴飭各軍警嚴拿究辦在案。乃竟有不法莠民。自滬來鄂。組織秘密機關部。據云黨徒頗衆。一部分鼓吹社會。以破壞本都督名譽爲主義。一部分

煽惑軍隊以實行倡亂爲主義。經本都督查知確實消息。派員嚴密緝拿。於二十四夜。在省城內紫珠街。將其機關部破壞。拿獲散放票布黨徒要犯。顧斌。顧開文。羅子常。干達等四名。當經本府開軍法會審。供認倡亂不諱。即將該犯等正法。以靖人心。尙有一同緝獲之張伯樸。郭玉山。劉安壽。馬麗等。暫行監禁。俟訊取確供。再行懲辦。又於今晨緝獲該犯同黨阮寶山一名。約同該犯等倡亂。供認不諱。當即正法。該犯此次煽惑軍隊。希圖倡亂。幸城內各軍。深明大義。多方誘惑。堅不爲動。駐紮城外馬隊。受其簧鼓。當即暴動。幸同駐地之砲隊。不與聯絡。一氣。馬隊經城內軍隊轟擊。全標拋棄。軍械逃竄無遺。惟念鄂中簡練軍隊。原以收緩急之效。自去秋倡義後。鄂省軍人。久爲民國所矜式。此次變出倉卒。其城內各軍隊。與城外砲隊之堅持。洵不愧知方有勇之稱。即馬隊敢於倡亂爲首者。亦不過數人。其餘皆被迫脅。本都督憫其無知干罪。止拿首犯。絕不株連。竊思武漢爲全國中樞。倡義以來。元氣大損。風鶴之驚。茲已四見。言之痛心。雖經本都督迭次覺察亂事。藉以救平。然損失軍隊。驚擾市廛。對於我最親愛之同胞。實多歉仄。任職無狀。深用疚心。久思退處山林。避讓賢路。實因地方秩序。一日未甯。所負責



任一日未盡。一俟大局又安。即當終老窮山。決不計此區區名位。前致中央電。想共聞知。至於剪除姦宄。保衛治安。在事一日。即有維持之責。爾等幸勿以身試法。自取愆尤。除通飭緝拿外。爲此示仰軍民人等一體知悉。該犯既已伏辜。其餘脅從一概免究。爾等各安生業。勿得驚惶。其各凜遵。切切此佈。

韻示

徵兵示

照得中國古制。	原係寓兵於農。	各國遠師成法。
常備續備後備。	各依年限相從。	必須良家正業。
無事按期退伍。	有事赴召從戎。	此後通國皆兵。
似此良法美意。	遠勝召募忽忽。	國民當兵義務。
諭我故鄉子弟。	其各奮發爲雄。	



黎副總統書牘彙編目錄

卷六

批牘

批佛教會立案呈

批外交部特派湖北交涉員胡朝宗辭職呈

附錄

愛國歌

補遺

上大總統呈請辭去兼領湖北都督文 附大總統覆文

領銜呈大總統請諮詢政治會議各員以救國大計文

致段都督 附覆電

致鄂省各機關人員慰勉

黎副總統書牘彙編目錄 卷六

黎副總統書牘彙編目錄 卷六

告別鄂中父老宣言

致各僚屬人員函

賀段都督

致政府及各省條陳任官方法

呈報取消地方議會國民黨員文

覆川督胡贊成廢省存道

題小萬柳堂寫本首楞嚴經

黎副總統書牘彙編卷六

批牘

批佛教會立案呈

稟及公佈均悉。查化人西至。詳說禦寇之書。恒星夜明。瑞應春秋之義。溯宗教之最古。與孔者以同源。繇來尙已。惟至道高遠。末法陵替。濫觴於東漢。波蕩於六朝。河汾尊之。昌黎闢之。頽流所激。正信未孚。聞者惑焉。然而平等之法。屢阨於專制。慈悲之旨。允信於共和。精神之團結。始尊之於前。形勢之集合。宜持之於後。該員等發宏誓願。轉大法輪。本三藏十二部之洪文。爲四衆二十九派之警舌。建立斯會。實獲我心。按政教分離。於權限本不相侵越。矧緇白畢集。於經旨尤有所發明。在昔天台大師。黃梅五祖。均五楚之先進。爲法界之偉人。曩哲匪遙。瓣香所在。所願祛澁句之邪說。無易初衷。演如來之妙文。大宏法教。在會旨爲大悲之救世。在法規爲信徒之自由。若夫三界惟心。識家教之揭發。四大和合。啓科學之權輿。無執邪迷。無貪福利。會章具在。無俟重陳。從茲發

海潮音能獅子吼。悟百佛千佛萬佛。原是一佛。參一乘二乘三乘。總歸一乘。證由信菩提。作佛門龍象。人天應供。與世界關係以無窮。法惠雙圓。於民國前途其有補。本都督有厚望焉。

批外交部特派湖北交涉員胡朝宗辭職呈

據該員呈請辭職歸田。俾得推本公法。注釋條約。以爲修正約章之先導等情。虛懷勗學。深堪嘉尚。惟民國值建設之始。鄂省號首義之區。雖藍筆山林。未臻完美。而雍容樽俎。端賴通才。該員仍勉爲其難。恪供厥職。以實驗充學識。以大局爲前提。勿庸遽萌退志也。本都督有厚望焉。此批。

黎副總統書牘彙編

附錄

愛國歌

我中國。峙亞東。政體由來帝制崇。倡革命。首鄂中。義旗一麾列省從。
 開軍府。堵要衝。陽夏戰役何洶洶。湘蘇繼。浙閩訂。秦晉粵蜀皆合從。
 聯軍起。巨雷轟。贛皖滇黔聲勢雄。講遜讓。息兵戎。南北構和銷煙烽。
 纔四月。奏膚功。車軌書文告大同。東和滿。北連蒙。新疆西藏洽華風。
 五大族。意見融。共和立憲本至公。採美制。步歐踪。中央統治萬機叢。
 最可慘。是戰攻。烈士碎身血殷紅。最可寶。舊疆封。帶礪河山物產豐。
 最可慮。貌象恭。爭權攘利逞頑凶。危大局。惑羣聰。文明法律斷難容。
 首軍界。責任重。今日破壞已告終。號神聖。矢公忠。保衛治安莫放鬆。
 次警學。暨商農。大家詳聽警世鐘。第一義。要和衷。休因簧鼓受欺蒙。

黎副總統書牘彙編 附錄

黎副總統書廣彙編 附錄

我胞與。慶遭逢。民國成立賴天工。玉步改。杼柚空。宜求根本戒彌縫。
廣教育。斂兵鋒。振興實業利交通。外患弭。內治隆。千萬億載運無窮。

黎副總統書牘彙編

補遺

上大總統呈請辭去兼領湖北都督文

敬呈者竊元洪屢覲 鈞顏。仰承優遇。恩逾於骨肉。禮渥於上賓。推心則山雪皆融。握手則池冰爲泮。馳惶靡措。誠服無涯。伏念元洪忝列戎行。欣逢鼎運。屬官吏推選之衆。承軍民擁戴之殷。王陵之率義兵。堅辭未獲。劉表之居重鎮。勉力難勝。泊乎宣布共和。混一區夏。蒙大總統俯仍舊貫。悉予真除。良以成規久圯。新制未頒。不得不沿襲名稱。維持現狀。元洪亦以神州多難。亂黨環生。念瓜代之未來。顧豆分而不忍。思欲以一拳之石。暫砥狂瀾。方寸之材。權撐圯廈。所幸仰承偉略。乞助雄師。風浪不驚。星河底定。獲託威靈之庇。免貽隕越之羞。蓋非常之變。非大力不能戡平。無妄之榮。實初心所不及料也。夫列侯據地。周室所以陵遲。諸鎮擁兵。唐宗於焉弛靡。六朝玉步。蛻於功人。五代干戈。胎自驕將。偶昧保身之哲。遂叢誤國之愆。災黎填於壑。而罔聞敵國入於宮。而不

值遠稽往乘。近覽橫流。國體雖更。亂源則一。未嘗不哀其頑梗。憐莫懲嗟。前者贛水弄兵。鍾山竊位。三邊酬諸異族。六省訂爲同盟。元洪當對壘之衝。亦尙盡同舟之誼。乃罪言勿納。忠告罔聞。哀此苦心。竟逢戰禍。久欲奉還職權。藉資表率。祇以兵端甫啓。選典未行。暫忍負乘致寇之嫌。勉圖扶杖觀成之計。孤懷耿耿。不敢告人。前路茫茫。但靳救國。今者列強承認。庶政更新。洗武庫而偃兵。敵文國而弼教。際四海困窮之會。急起猶遲。念兩年患難之場。迴思尙悸。論全局則須籌一統。論個人則願乞餘年。倘仍恃寵長留。更或陳情不獲。中流重任。豈忍施於久乏之身。當日苦衷。亦難曝諸無稽之口。此元洪所冰淵自懼。寢饋難安者也。伏乞大總統矜其愚悃。假以閒時。將所領湖北都督一職。明令免去。元洪追隨鈞座。長聽教言。汲湖水以澡心。擷山雲而鍊性。幸得此身健在。皆解衣推食之恩。倘遇邊事偶生。敢忘擐甲執兵之報。伏居待命。無任屏營。謹呈。

附大總統覆文

來牘閱悉。成功不居。上德若谷。事符往籍。益歎淵衷。溯自清德既衰。皇綱解紐。武昌首義。海風從。國體既更。嘉言益著。調停之術。力竭再三。危苦三詞。書陳累萬。痛洪水狂獸之禍。爲千鈞一髮之助。國紀民彝。

賴以不墜。執事之亂。坐鎮上游。七粵不驚。指揮若定。呂梁既濟。重思作楫之期。虞淵弗沈。追論搃戈之烈。凡所規畫。動繫安危。偉業豐功。彪炳寰宇。時局趨定。得至京師。昕夕握譚。快傾心膺。褒鄂英姿。獲瞻使坐。遐規同志。永矢畢生。每念在莒之艱。輒有徵管之歡。楚國寶善。遂見斯人。迭據面請。免去領湖北都督一職。情詞懇摯。出於至誠。未允施行。復有此釐。誣長心重。慮遠思深。志不可移。重違其意。雖元老壯猷。未盡南服經營之用。而賢者久役。亦非國民酬報之心。勉遂謙懷。姑如所請。國基初定。經緯萬端。相與有成。期我益友。嗣後凡大計所關。務望遇事指陳。以匡不逮。昔張江陵恒言。吾神游九塞。一日二三。每思茲語。輒爲敬服。前型具在。願共勉之。此覆。

領銜呈大總統請諮詢政治會議各員以救國大計文

共和國。以法治爲歸宿。當破壞之後。亟宜爲建設之謀。所有應行法治。千端萬緒。雖急起直追。猶恐不及。民國初創。以參議院爲立法機關。而成立年餘。制定法案。寥寥無幾。惟以黨爭聞於天下。適爲建設之障礙。決無進行之計畫。中外士庶。乃移易其渴望之心。屬諸國會。以爲國會既成。必可將各項法制。依次制定。不意開會七閱月。糜帑數百萬。而於立法一事。寂然無聞。欲僅如前參議院。尙能立東鱗西爪之法。而亦不可得。民國前途。豈堪久待。蓋因各議員被舉之初。別有來由。多非人民公意之所推定。謂爲

代表。夫將誰欺。其有愛國思想者。固不乏人。而爭權利。徇黨見。置國家存亡。人民死活。於不顧者。反佔優勢。且人數過多。賢者自同寒蟬。不肖者如飲狂水。餘皆盲從。朋附。煙霧障天。雖有善者。或徒喚奈何。甯與同盡。上下兩院。性質相同。無術調劑。因之立法成蹟。毫無進步。中外援爲詬病。國家日益阽危。上無道揆。下無法守。賴我大總統以救國。爲己任。毅然剛斷。將亂黨議員資格一律取消。令候補當選人以次挨補。願候補人員。與前次人員資格相同。無論一時斷難如額。即使如額。而八百餘人築室道謀。仍恐議論多而成功少。現在國本初定。重要法案。何啻數百件。由今之道。以七閱月而未立一法。雖遲以百年。亦復何濟。而強鄰環伺。破產在即。豈從容高論之秋。我不自謀。必有起而代我者。欲不爲人之牛馬奴隸。何可得耶。元洪等行政人員。亦國民一分子。國苟不存。身於何有。苟利於國。遑論其他。用敢聯名切懇大總統。始終以救國爲前提。萬不可拘文牽義。以各國長治久安之成式。施諸水深火熱之中華。歷考中外改革初期。以時勢造法律。不以法律強時勢。美爲共和模範。而開國之始。第一次憲法。即因束縛政府。不能有爲。遂有費拉德費亞會議修正之舉。是役也。全體會員。無不有政治之經驗。其

會議之所議決。多軼出原有憲法範圍以外。而自操制定憲法之全權論者。不詆爲違法。先例具在。可爲明徵。現在政治會議。已經召集。與美國往事。由各州推舉之例。正同。請大總統飭下國務院諮詢各員。以救國大計。若衆意咸同。則共和政體之精神。即可因茲發軔。卽例以南京政府。以十四省行政官代表之參議院。其完缺大相懸殊。正與華盛頓修正憲法若合一轍。元洪等承乏地方。深知人民心理。痛惡暴亂之議員。各國論調。亦極公允。我大總統何所顧忌。而不爲之。所以文明國議員。無論何黨。皆以扶持本國爲宗旨。斷無以破壞阻撓爲能事者。現在國民黨員。悉經解散。其餘穩健議員。素知自愛。聞已羞與噲伍。憤欲辭職。雖欲固結。已屬無從。留此少數之人。旣無成立之希望。應請大總統給資回籍。另候召集。各議員皆明達廉潔。決不戀戀於五千元之歲俸。而浮沈於不生不滅之間。以誤國家大計。狂夫之言。聖人擇焉。伏乞鑒核施行。民國幸甚。(各省都督民政長署名)

致段都督

元洪自鄂頻行過勞遠送。至感厚意。茲於本日早七鐘到京。卽入覲大總統。面諭代理

一節。已有令命公暫兼等因。自維治鄂兩年。深愧無狀。得公替我。知免愆尤。聞命之餘。敢爲全鄂軍民額手稱慶。特電馳賀。兼致謝忱。卽維垂察。元洪現任小蓬萊。並以奉聞。

附覆電

在鄂奉教。優禮逾恆。極感盛意。接讀真電。敬諭旌旆蒞都。至爲慶慰。過承獎借。愧弗克當。瑞以垂材。隨公之後。雖暫承乏。敢不兢兢。勉守成規。冀免隕越。尙乞隨時箴誡。是所盼禱。祺瑞。

致鄂省各機關人員慰勉

本副總統。因公入京。於本月初九日自鄂起程。十一日早抵京。追維在鄂兩年。同舟共濟。諸賴匡襄。此次行期匆促。不及言辭。深懷歉仄。現在鄂都督事。已奉大總統令任段總長兼領。段總長威信素著。憂國爲懷。必能造福地方。維持秩序。尙賴諸君子各盡職務。相與有成。本副總統有厚望焉。軀安好。知念并聞。

告別鄂中父老宣言

元洪不德。濫握軍符。義旗一舉。蒙鄂中軍學紳商各界推舉。都督一席。力辭不獲。勉竭綿薄。陽夏之役。屢戰屢敗。孤城介立。岌岌可危。卒得保全。無恙。實賴人心歸向。衆志成。

城。迨共和肇建。南北統一。而意見紛歧。黨爭激烈。雖極意周旋。而彌縫無術。致使風聲鶴唳。頻湧漢江。商場元氣一喪再喪。本年鄰境亂作。禍患幾遍於東南。鄂省踞上游門戶。扼南北咽喉。控制濱江。各省埠之生命。鄂省之安危。南方數行省之視線所趨也。元洪本此意。以籌畫調駐重兵。緊急防維。晝夜焦思。絕粒數日。遂使破獲機關百餘起。保守疆界。化險爲夷。是固各將士之勇往服從。各商民之公同協助。有以致之。旋而沙陽叛亂。棗隨陷害。邊界內河。干戈擾攘。匪徒所至。搶掠難堪。痛剿數月。未報肅清。未必非元洪之不德階之厲也。其他災民流離。米食恐慌。金融停滯。紙幣浮濫。并一切鄂人之盼望。於元洪者。元洪卒無一增幸福於鄂人。遺憾抑何深也。今者燕京之行。原因磋商要政。將來駐都回鄂。兩難預揣。惟段代督明達精幹。軍事上尤擅特長。必能補元洪之缺點。登鄂民於衽席也。遙望漢江。不禁淚下。謹此宣言。

致各僚屬人員

元洪一武夫耳。在鄂以來。幸無遺誤。全諸賴君子大力維持。同舟共濟。故得保全萬死一生之身。患難經年。曷忍言別。此次北行倉猝。未獲握手。良用疚心。但中央人多事少。

經濟尤困。務希抱國家主義。化個人私見。各盡厥職。自謀生理。切勿遠存希冀。有誤精英。如有需才之處。自當電召函聘。其介紹而至私自前來者。不獨無可安插。抑且未能招待。追念故人。不禁感傷。臨穎落淚。諸維諒察。

賀段都督

江電敬悉。前奉台端督鄂命令。共慶得人。武漢自兵燹後。民力困窮。今借重長才。藉蘇元氣。欣聞履新之日。軍情肅謐。經武整軍。聲威遠播。利民福國。氣沚潛銷。曷勝欣慰。謹馳電遙賀。

致政府及各省條陳任官方法

國家之敗。首在官邪。官常不節。百弊隨之。溯自民國成立。省自爲風。布政理刑。悉爲土著。推其本意。亦欲以溝通隔閡。洞達民情。然民害日深。紀綱愈壞。括其流弊。約有數端。交誼既廣。利害太明。情昧於前。勢劫於後。百鍊之剛。化爲繞指。一也。親族實繁。關防不謹。招權納賄。寄社憑城。刑則傷恩。縱則枉法。二也。先入易深。媒聽中惑。愛省之誼。不知愛鄉。羔斷不公。百僚皆靡。三也。凡此三端。賢猶不免。更又甚焉。盤踞機關。援引私暱。素

營伴食。炫耀里閭。公署變爲宗祠。官廳成爲鄉社。下情莫能達。內患莫能除。其害一勾結權要。利用爪牙。賄賂公行。愈趨愈巧。搆冤獄。則夏霜有聲。舞弊竇。則秋鷗無迹。上虧國脈。下失民心。其害二。聯絡社會。號召黨徒。擁戴報酬。以官爲市。鷹鷂得食。則雖繞其前。螳螂捕蟬。則雀襲其後。來如擲注。去如奕棋。其害三。攘權竊利。蒂固根深。外府不能貢其才。中權不能行其令。名爲一統。實則聯邦。外重內輕。本根愈撥。其害四。省界既深。內訌愈烈。道界縣界。因緣以生。大陸裂爲纖塵。中邦返爲部落。違五族共和之實。開別削分割之端。其害五。元洪等盱衡危局。軫念窮閭。弢弧不絃。搏沙盡散。內無強健之政。府外無安聚之居民。黨獄繁興。政治愈廢。實誰階厲。良用疚心。粵自武漢起兵。東南響應。潮流所播。撓蓬隨風。舊政前規。矯枉過正。廻思往事。深負故鄉。痛旣椎心。窮當思變。今者正式政府。幸慶告成。刮垢磨光。在斯嘉會。竊謂此風不改。圖治無由。國滅種亡。可操左券。應請嗣後行政官吏。自簡任官以上。均不得用省本人。司法官吏自薦任官以上。均不得用本省人。各縣知事。均須距籍五百里以外。至各省合格人才。得由都督民政長高等審檢廳長保送中央。按文官試驗法。錄用簡放。外省用人之權旣專。則中央

便於行政。薦賢之途既廣。則各省免於遺才。正本清源。此爲先務。如蒙允許。卽乞大總統明發命令。垂爲令典。去此囂風。明知此議一興。反對必烈。然達人知遠。良藥利疴。耿耿此衷。實爲救國。去年倡軍民分治之議。衆口交尤。卒至順逆攸分。公私終判。狂夫之言。終蒙採擇。愛民憂世。猶抱初心。太息陳詞。佇祈明教。鄂民政長饒漢祥列名。

呈報取消地方議會國民黨員文 領銜

真電計達。查國民黨勾結爲亂。証據確鑿。既奉大總統命令。一律解散。凡屬省議會國民黨議員。及各縣議會國民黨議員。自不能聽其把持。特予寬免。鄂省國民黨暴子實繁有徒。尤以省縣各議員操其主動。檢閱該廳所呈案據。情迹顯然。當宋案借款發生。黃興等利用機會。傾覆邦家。該支部有假託全省公民名義。致各縣議事會參事會令。總統總理解職歸案函。有省議員楊瀚芳（中畧）等。致參特兩院請彈劾袁趙退職就審之電。軍政府請調國軍。原所以保衛治安。該黨致函本部。則謂北方開來軍隊。姦殺異常。致函孫文。則謂黎督閣橫電調北軍。摧殘民黨。致函滬交通部。則謂岑西林到後。已商渠密電中央。將駐漢北兵撤回。致函李烈鈞。並特派該黨省議員方震。黨員項傑。

赴贛接洽。則謂黎督續調北軍。執迷不悟。民政府改選自治。原所以力圖治本。該黨致函孫文黃興李烈鈞。則謂各縣自治改選在即。敝支部不得不從各縣自治預備基礎。鄂省據長江中心。爲東南門戶。有敝支部在。尙足爲本黨坐鎮北門。作全國之樞紐。綜觀前後文電。破壞統一。增壯聲援。與該黨本部黨員國會議員同出一氣。然猶謂亂未發覺也。迨贛寧將亂之前。該黨省議員詹大悲趙鵬飛等。發難於漢口。贛寧已亂之後。該黨省議員梅鍾漢等。任職於上海。羅雲錦等。從逆於沙洋。或懸賞緝拿。或查明正法。播案具在。無可諱言。其餘該黨省議員請假四出。更不勝數。洎大局已定。始行陸續回省。現據京滬各屬人民之控告。知事軍隊之報告。均謂前次亂事。牽涉議員。溯自兩年以來。屢起風潮。省垣則眠食頻驚。各縣則流亡載道。追原禍始。寧不痛心。此等殃民禍國之徒。豈惟法律所不容。抑亦神人所共憤。鄂省伏莽甚多。瘡痍未復。若長令此等議員。憑藉機關。挾持政治。後患之來。何堪設想。本都督民政長有守土牧民之責。斷不敢養癰貽患。致蹈庇護亂黨之嫌。自應援照大總統鈞令。斷自湖口倡亂之日起。所有省縣該黨議員。一律追繳証書徽章。限令即日出會。以清根本。其才具可用者。仍當隨時

考查其暴亂最著者。尤須嚴加管束。以仰副大總統除暴安良之意。除令飭警察廳暨各縣知事遵照辦理外。合行通告。(湖北民政長列名)

覆四川都督胡贊成廢省存道

省制沿于元初。不廢而控制不便。共和先進。莫如美法。法爲六十七郡。美分四十五州。吾國幅員廣袤。過之而分省僅二十有二。面積皆與一國相埒。論者早以吳元濟淮西之事爲隱憂。此次逆黨叛亂。如贛皖甯粵均以憑藉一省之力。始終與中央抵抗。前車不遠。來軫方遘。其關係固不止耗費一端也。尊論以聯邦藩鎮爲主張。悉廢省制。劃全國爲若干道。以治理言。無鞭長莫及之患。就統系論。更少尾大不掉之虞。循誦再四。佩企莫名。極表贊同。

題小萬柳堂寫本首楞嚴經

願亭林謂南方學者。晚年每好學佛。佛非不可學。特學之不至耳。桐城吳女士芝瑛。生有慧德。遭時多故。懺悔遂生。其夫廉君泉。曾發聖湖北高峯十三級浮圖之想。女士爲寫大佛頂首楞嚴經以實之。經凡十卷。六萬餘言。中經患難疾苦。幾於廢輟。亦越兩年。

竟成其志。書法廉勁。疏宕得魏隋人清氣。有功德於是經之流傳者蓋廣。殆可謂堅苦卓絕。願力宏大者歟。在昔印版未興。儒家原以寫經爲業。是何足異。獨怪士夫酣嬉。古典荒落。其勤者復惟權利是競。不屑屑爲講學修道之事。人心益以不靖。抑知天壤間。潛心梵典者。尙有環佩其人也。可不敬哉。

中華民國三年一月黎元洪題。

中央政治學校研究部
圖書室

- 1、請加意愛護勿失原有形狀
- 2、損壞或遺失應照原價賠償
- 3、借閱以二星期為限期滿欲
續借者請持書至本室
聲明

5257

中華民國三年四月初版
中華民國廿三年五月再版

(黎副總編輯)
定價八角



版權
所有

編輯者 寧汪鈺孫

印刷者 新中國圖書局

發行者 新中國圖書局

發行所 上海廣益書局
棋盤街中市
電話四一三八

印刷所 上海中新書局

分售處 廣州廣益書局
漢口江西
開封廣州
北京長沙

特約總發行所
上海棋盤街廣益書局

7131
洪云

917